

萬有文庫

第二集七百七種

王雲五主編

讀史方輿要紀

(四)

顧祖禹輯著

商務印書館發行

萬有文庫

第二集七種

總編纂者

王雲五

商務印書館發行

讀史方輿紀要

(四)

顧祖禹撰

國學基本叢書

讀史方輿紀要

卷九

歷代州域形勢九

惟明受命奮起淮甸首定金陵。

史略太祖初起濠州。

興濠錄元至正十一年太祖春秋二十五矣時潁州劉福通徐州芝麻李蘄州徐壽輝等相率起兵攻陷城邑太祖欣然欲往從之明年定遠人郭子興與其黨孫德崖等起兵襲據濠州太祖遂馳入濠隸子興

麾下以材勇見親信久之子興與諸帥不相能軍中多故太祖乃別將一軍略淮南地

略定遠諸山寨。

定遠今鳳陽府屬縣

馮國用進說曰金陵龍蟠虎踞真帝王都。

願先拔金陵定鼎然後命將四出掃除羣寇天下不難定也於是南下滁州進克和州。

時郭子興自濠州南入滁既而卒於

軍。

渡采石。

采石圻在太平府北二十里見前

取太平路乃分遣諸將下溧水溧陽句容蕪湖。

溧水溧陽句容今應天府屬縣蕪湖今太平府屬縣

進攻集

慶路。

應天府元曰集慶路

遂克之建府治焉於是東取鎮江廣德常州江陰以扼吳寇。

常州府江陰縣時為江陰州

西保太平池州。

以拒漢兵北取維揚泰興以窺淮泗。

元至正十六年太祖取集慶遂取鎮江廣德路明年取常州路江陰州遂取揚州路

南收宣歙出昱嶺。

昱嶺關在今杭州府昌化縣西七十

里詳浙江重險

取建德、婺、衢、處、信諸州以控閩粵

開國事略元至正十七年太祖取寧國徽州明年取婺源州又取建德路蘭溪州進克婺州又明年克諸暨州然後取衢州及處州路二十年始取信州路建

德路今嚴州府婺源今徽州府屬縣蘭溪今金華府屬縣諸暨今紹興府屬縣元時皆為州

而形勢強根本固矣

顧氏曰太祖既定金陵未聞圖度兩淮北首中原也而亟亟焉出昱嶺取浙東諸郡何哉或曰元人方強姑委之羣盜以疲其力因乘間為南出之謀耳是不盡然也夫方國珍陳友定之徒皆盤據閩浙之交而友諒有江西州郡與浙東接壤浙西諸州已盡屬之士誠使或盜有數州謂衢處信諸州羣寇之交合則東南之勢分而窺伺之隙多根本之備疎矣故急取而守之士誠友諒既中梗而不敢肆國珍友定亦屏息而不敢爭據吭背而絕要脅不必陳師決勝彼數寇者已在我掌握中者也上兵伐謀此之謂也

西靖湖湘東兼吳越

史略初陳友諒陷我太平稱帝旋還江州明年復引而東

元至正二十一年也

約張士誠東西並舉謀襲建康太

祖恐兩寇合發勢必震動因以策先致友諒友諒果帥舟師至龍江

今應天府西北儀鳳門外有龍江關

敗去我師乘勢追

擊復取太平池州及安慶既而安慶復為友諒所陷太祖尋親帥舟師抵安慶破其水砦攻城未下劉

基請徑抵江州。傾其巢穴。遂長驅而進。過小孤。

小孤山在九江府彭澤縣北九十里江中。

越湖口。

湖口縣也。見前。

距江州五里。友諒始

覺懼。夜奔武昌。我師入江州。復進拔蘄。黃諸路。旋師收安慶。又遣使招諭江西州郡。於是龍興而下。皆

望風降附。

時太祖引軍至龍興。於是建昌。饒州。袁州。寧州。吉安。皆來降。寧州元置。今屬南昌府。

太祖乃東還。友諒憤其疆域日蹙。遂大造戰艦。悉師趣洪

都。

太祖取龍興。路改曰洪都。攻圍數月。太祖引軍馳救。相持於鄱陽湖之康郎山。

鄱陽湖在南康府城東五里。即彭蠡湖也。西接南昌。東抵饒州。長亙三百里。詳見江西大

川康郎山在饒州府餘干縣西北八十里。當鄱陽湖之南涯。

至涇江。

即禁江也。在湖口縣東北九十里。下接小孤。上通九江。

王師前後夾擊。友諒戰死。其將張定邊奉其子

理遁還武昌。復立為帝。太祖進攻未克。留兵守之而還。尋復自將伐漢。陳理出降。於是湖廣。江西州郡。

次第平定。思黔諸蠻亦內附。

思黔二州見前。又今湖廣辰州府西南至貴州境內。皆曰思黔。開國事略。至正二十三年。太祖敗友諒於鄱陽。二十四年。太祖建國號曰吳。復攻武昌。陳理降。因進取中興路。及歸峽。潭。衡等

州郡。明年。取寶慶路。友諒故將熊天瑞以贛州。韶州。南雄降。尋又破安陸府及襄陽等路。後二年。又取沅州等路。楚地始悉定。

初。太祖謀用兵。吳漢孰先。劉基曰。士誠自守虜耳。友

諒據上流。且名號不正。宜先除之。陳氏既滅。張氏囊中物矣。太祖曰。然。友諒剽而輕。士誠狡而懦。若先攻士誠。友諒必來救。是我疲於二寇也。及友諒滅。喜曰。此賊平。天下不難定矣。先是。士誠屢謀西侵。以

舟師寇我鎮江。又陷宜興。

宜興。常州府屬縣。

於是太祖命將攻常州。別將由廣德取長興。

長興。今湖州府屬縣。

常州既下。進

克江陰。皆以重兵鎮守。

事在元至正十一年。

三城形勢聯絡。東南屏障始固。遂進復宜興。又取武康、安吉諸州邑。

武康。湖州府屬縣。安吉。湖州府屬州。

以騎士誠之後。因得專意西討。太祖既平漢。遂取廬州路。明年取泰州。

泰州。今屬揚州府。是時兩淮之地。多為士

誠所據。

既而盡收兩淮地。

時取高郵州及淮安、安豐等路。又收濠、泗、徐、穎諸州。先是太祖南下濠、泗諸州。士誠皆遣兵掠取之。

士誠羽翼既剪。心腹漸虛。是時其將張

士騏拒守湖州。呂原明拒守杭州。而紹興、嘉興亦皆分兵屯據。士誠坐擁姑蘇。城堅粟多。太祖知其未

可猝拔。因命徐達率大軍先攻湖州以疲之。而分遣華雲龍向嘉興。李文忠自嚴州趣杭州。徐達發兵

龍江。聲言直搗姑蘇。潛師自宜興出太湖。徑趣湖州。圍其城。士誠遣兵來救。輒敗去。其舊館兵戰敗來

降。

舊館。在今湖州府東三十里。

州城亦下。嘉興、杭州、紹興聞之。率先歸附。徐達乃移師攻平江。別將俞通海分兵略太

倉、松江諸郡縣。

太倉。元時立水軍萬戶府於此。張士誠復城其地。今為蘇州府屬州。松江府即今府。

悉下之。達等旋拔平江。

蘇州府。元曰平江路。

士誠亡。其地悉平。

事略。士誠既亡。通州無錫二州始歸於我。通州今屬揚州府。無錫今常州府屬縣。

是時方國珍以浙東三郡來歸。復懷反側。乃命湯和等討之。克台州

及溫州路。又取其慶元路。國珍窮蹙來降。浙東西悉定。陳建曰。當士誠北有淮、泗。南據浙西。江陰、長興、

皆要害也。長興據太湖口。陸走廣德諸郡。江陰枕大江。扼姑蘇。通州之要衝。得長興。則士誠步騎不敢出廣德而窺宣。歙得江陰。則士誠舟師不敢泝大江而上金焦。

金山在鎮江府治西北七里。焦山在府治東北九里。二山相望十五里。為大江中流之險。

故

雖全軍西出。可以無東顧憂。而士誠卒於不振。亦以此也。

於是遣將北伐中原。南征嶺徼。

史略。吳元年。

元至正二十七年也。

太祖以江南既定。命徐達等北取中原。諭之曰。元建都百年。城守必固。若懸師

深入。屯兵堅城之下。餽餉不繼。援兵四集。非吾利也。今宜先取山東。徹其屏蔽。旋師河南。斷其羽翼。拔

潼關而守之。

潼關見前。

據其戶檻。天下形勢。入我掌握。然後進兵元都。彼勢孤。援絕。不戰可克。既克其都。鼓

行而西。雲中、九原、

雲中謂大同。九原謂河套地。

以及關、隴、

關。關西。隴。隴右。

可席捲而下也。達受命渡淮而北。至沂州。

沂州屬兗州府。

守

將王信以城降。莒、嶧、諸州皆來附。

莒州。今屬青州府。嶧州。今兗州府。嶧縣。元曰嶧州。

達命別將韓政率精銳扼黃河衝要。

黃河衝要。謂曹單諸

也。州以斷援兵。進攻益都。

即青州府。

拔之。濟南、東平、濟寧、東昌等路。次第皆下。山東遂平。

事略。達克益都。即進取般陽路。於是西下濟寧。東取

萊州。遂收濟南。東平等路。明年。乃克東昌。取棗州。
山東悉下。般陽見前。棗州。即今濟南府武定州。

洪武元年。達等沂河西上。遂克永城。歸德。

永城。今歸德府屬縣。

分兵下陳。

許諸州。大軍至陳橋。即陳橋驛也。見前。

汴梁降。諸城邑悉下。乃入虎牢。見前。

趣河南。謂河南府。

敗元兵於洛水北。遂克

河南。進克陝州。入潼關。取華州。李思齊等西遁。於是命將守潼關。別將鄧愈又討平南陽。汝裕諸山寨。

南陽府及汝州。裕州也。河南州郡悉入版圖矣。先是太祖之遣將北伐也。即命胡廷瑞等由江西取福建。楊璟等由

湖南取廣西。廷瑞遂自建昌出杉關。

建昌。即今江西建昌府。杉關。見前。

取邵武。攻建寧。

今福建屬府。

未下。復命湯和由明州海

道取福州。

自寧波府定海縣沿海而南。即南取福州之逕道。

和奄至城下。一鼓拔之。遂趣延平。

初。陳友定分省延平。後遂移軍府於此。

克其城。執陳友定。

胡廷瑞亦下建寧。尋又進取興化。

即今興化府。

於是汀、泉、漳、潮諸路悉降。既又命廖永忠自福建海道進取

廣東。陸仲亨自贛州進兵。

時仲亨為贛州指揮使。因就命之。

由韶州擣德慶。

今肇慶府德慶州。

為犄角之勢。永忠取惠州。至東莞。

見前。何真迎降。廣州亦下。仲亨悉平英德、連州、肇慶、德慶諸州郡。

英德。今韶州府屬縣。元曰英德州。

與永忠會於廣州之龍

潭。即龍江也。西江下流經廣州府順德縣北。謂之龍江。

廣東境內悉來降附。復奉詔引軍趣廣西。遂由肇慶沂西江而上。

西江自廣西梧州府會黔鬱桂。

三江之水東流歷肇慶府境至廣州府城南注於海詳川濱盤江及廣東大川

抵梧州州郡望風迎附時楊璟方克永州南攻靜江

靜江見前事略初寶慶歸於我既而復失洪武

元年楊璟引荆襄之衆出湖南取寶慶路進克永州及道州又取全州遂攻靜江復分兵略郴州及桂陽路下之桂陽今衡州府屬州

永忠等自平樂而進合兵攻城克之廣西境內悉

定

事略洪武元年別將朱亮祖克梧州進攻平樂廖永忠分兵收藤州進次潯州及南寧路貴象鬱林諸州悉下亮祖等與楊璟會師攻靜江遂克之既而海南海北來降右左江諸蠻亦相率歸附

顧氏曰太祖之取天下善於用因而已夫郭子興齷齪常才也太祖因之而集虓虎之師韓林兒廝養豎子也太祖因之而成開闢之業雖然委曲以脫子興之難猶可能也至南征北伐功業既赫然矣乃

龍鳳紀年終林兒之身而後已

林兒歿於元至正二十六年明年始稱吳元年次年遂即位改元洪武

豈非善自遵養因以成無競之烈者歟故

曰居天下之後始可以承天下之弊辭天下所共爭乃能集天下所難成此太祖締造之功所以紹漢軼唐也彼汲汲然稱王僭號自逞雄心者豈足與語此哉

汛掃幽燕芟除秦晉

史略太祖以河南平乃北巡汴梁召諸將授方略取元都徐達等分布士馬經略河北檄山東諸將悉會於東昌達遂由中灤渡河

中灤鎮在今開封府封丘縣南二十六里

衛輝彰德悉下進收磁州

今彰德府屬州

取廣平路又克趙州

今真定府屬州。取經清。今東昌府屬州。東昌諸將皆來會。於是大軍北發。下德州。今屬濟南府。舟師步騎。夾河而進。夾白河而進也。白河

源出宣府鎮龍門所東。下流經順天府通州東。又南流合於直沽。大破元兵於河西務。河西務在通州武清縣東北三十里。遂入通州。元主由居庸北走上都。居庸關見

前上都見元都邑攷。徐達督諸軍進至元都。攻齊化門。今京城東南門也。填塹登城而入。軍民安堵。於是遣兵守居庸。古北

諸阨口。古北口在昌平州密雲縣東北見前。以斷敵人窺伺之道。復下永平諸路。以固東藩。然後旋師西討。取保定。中山。中

即定州。見前。下真定。趣太行。真定府西去太行山百里與山西分界。選將守要害。即太行諸山口。如紫荆。倒馬。諸關之類。時擴廓據山西。慮其乘間侵突也。紫荆見前。倒馬在定州西北二百五十里。詳直隸重

險。并收未附諸山寨。於是井陘故關。及平定州諸險隘。井陘關在今真定府獲鹿縣西十里。見前。故關在真定府井陘縣西五十里。與山西太原府平定州接界。次第

就平。又檄河南守將馮宗異等由懷慶徇太行。太行山南去懷慶府城二十里。宗異遂克武陟。武陟今懷慶府屬縣。下壞慶。拔盃子

城。盃子城山在懷慶府北五十里。有關當太行山道。至為險要。取澤潞二州。擴廓遣兵分道拒守。會元主召擴廓出太原。由保安入居庸。

保安今直隸保安州也。侵燕京。擴廓引衆而東。徐達等謀曰。燕京守備足以拒敵。今若乘其不備。直抵太原。傾其巢

穴。彼進不得戰。退無所依。引兵還救。爲我牽制。必成擒矣。遂由平定徑趣太原。擴廓自保安還救。軍於城西。達等襲敗之。擴廓北走。遂克太原。常遇春等追至大同。擴廓復西走甘肅。大同亦下。於是南收汾州。入霍州。進克平陽。略定隰。絳。諸州。

汾州。今爲府。隰。絳。三州。今俱屬平陽府。

二年。克河中府。山西悉定。乃造浮橋。由蒲津渡

河。

蒲津關在蒲州城西。見前。

克同州。

時鄜州守將亦以城降。

趣鹿臺。

鹿臺在西安府高陵縣西南。見前。時張思道等軍鹿臺。聞大軍將至。遂遁去。

渡涇。渭。

涇。小去西安府城六十里。渭水去城五十里。

於奉元城北。奉元降。進向鳳翔。李思齊遂棄城奔臨洮。時張思道在慶陽。諸將議先取之。達曰。慶陽城險兵悍。未易猝拔。思齊乍走臨洮。衆心未固。以大軍蹙之。彼不走絕徼。則束手降矣。臨洮克。旁郡可不

攻而下。遂趣隴州。克之。進取秦州及鞏昌。前軍抵臨洮。思齊果降。慶陽聞之。震恐。

時張思道懼。乃留其弟良臣守慶陽。將步騎走寧夏。

遇擴廓。爲所執。

會擴廓引兵窺境。出沒平涼。徐達遣顧時等略蘭州以西。自引軍入安定。

今鞏昌府屬縣。元爲定西州。

克會州。

今鞏昌府會寧縣。元徙會州於此。

下靜寧。隆德。

靜寧州及隆德縣。今俱屬平涼府。

道蕭關。

在平涼府鎮原縣北。見前。

取平涼。會張良臣既降。復叛。達遂趣涇

州。分命諸將。抄其出入之路。又以精兵守原州。斷其外援。慶陽平。擴廓等皆遠遁。陝西悉爲王土。三年。復詔達等東西進討。平元遺裔。於是劉益亦以遼陽來降。自是窮追遠討。威行漠外矣。太祖嘗從容謂

徐達等曰。向者朕圖北伐。或勸朕先平羣寇。後取元都。或勸朕直走元都。兼舉隴蜀。皆非朕意。朕所以命卿先取山東。次及河洛者。先聲既震。幽薊自傾。且朕親駐大梁。止潼關之兵者。知張思道、李思齊皆百戰之餘。未肯遽降。急之非北走元都。則西走隴蜀。并力一隅。未易定也。故出其不意。反旆而北。元衆膽落。不戰而奔。然後西征。張李二人。望絕勢窮。不勞而克。惟擴廓猶力戰。以拒朕師。向使未平元都。而先與角力。彼人望未絕。聲勢相聞。困獸猶鬪。勝負未可知也。較之士誠友諒。事勢正相反。用兵固不可以一例論也。

乃平巴蜀。進取滇南。

史略初。徐達既定關中。引軍南下漢沔。取興元路。

漢中府。元曰興元路。時爲蜀所據。

留兵戍守。

事略。洪武三年。達等出秦州。拔略陽入沔。分兵由鳳翔入連雲棧。合

攻漢中。克之。蜀人震恐。尋以饋運不繼。還軍西安。略陽。即今漢中府寧羌州屬縣。沔。今寧羌州沔縣。元曰沔州。連雲棧。即入蜀之道路。古曰褒斜道。起自漢中府鳳縣以北。南達褒城縣。皆曰連雲棧。

洪武四年。詔遣湯和等帥

舟師由瞿唐趣重慶。

瞿唐峽。在夔州府東八里。見前。是時明升都重慶。

傅友德由秦隴趣成都。又密諭友德曰。蜀人聞我西伐。必悉

精銳東守瞿唐。北阻金牛。

金牛峽。在漢中府寧羌州北三十里。又自沔縣西南至保寧府劍州之大劍關口。皆曰金牛道。漢中入蜀要路也。

若出其意外。直擣階文。

階文。今鞏昌府

階州文縣元謂西安府。門戶既隳。腹心必潰。友德至陝。非陝州也。聲言出金牛。而疾趣陳倉。即鳳翔府寶雞縣。徑抵階州。克之。

進拔文州。出江油道。江油道見前。渡白水江。在今龍安府青川所東三十餘里。為東西往來者必經之道。趣綿州。據其城。會漢水漲。即雒水也。在漢

州城南。亦曰中水。見前劉豫伐譙縱。伐山造戰艦。渡漢江。圍漢州。蜀人出戰。大敗。又敗其援兵於城下。遂拔漢州。蜀人震懼。

時蜀固守瞿唐。湯和等自夷陵入峽。即西陵峽。在夷陵州西見前。次歸州。進攻未克。帝聞友德屢捷。詔和乘機速進。於

是廖永忠以奇兵出瞿唐上流。而分兵兩道。水陸急攻。遂奪其險。師入夔州。湯和亦至。和率步騎。永忠

率舟師。並趣重慶。永忠至銅羅峽。峽在重慶府城東二十里有銅羅關。明昇母子以城降。友德方攻成都。其守者聞重慶以

下。亦出降。友德復進克保寧。蜀地悉定。十四年。命傅友德率諸將討雲南。諭之曰。進取雲南。當自永寧。

今四川永寧宣撫司。元為永寧路。宜先遣一軍向烏撒。今四川烏撒軍民府。而大軍繼自辰沅入普定。貴州普定衛。元曰普定府。分據要害。乃進兵

曲靖。雲南曲靖軍民府。曲靖雲南之噤喉。彼必并力於此。當出奇取之。既下曲靖。即分一軍取烏撒。應永寧之

師。而大軍直擣雲南。彼疲於奔命。破之必矣。雲南既克。乃分兵趣大理。先聲既振。勢將瓦解。其餘郡邑

部落可撫而有也。友德至湖廣，即分遣郭英等出四川，自永寧趣烏撒。英擊破蠻兵於赤水河。

赤水河在永寧

宣撫司東南百四十里

雲南大震，友德乃率大兵由辰沅趣貴州，克普定，境內諸苗悉降附，復攻普安，下之。

貴州安順府之

普安州元曰普安路

進兵曲靖，敵果以重兵拒守，友德等進擊，大破之於白石江。

江在曲靖府城北八里

遂下曲靖，於是遣沐

英、藍玉兩軍趣中慶，自引軍向烏撒，為郭英聲援。沐英等未至，把匝刺瓦爾密先自盡。英駐師金馬山。

山在雲南府東見前

父老迎降，澂江、武定、臨安、威楚諸路次第悉下。

威楚今為楚雄軍民府

友德至烏撒，大破蠻兵東川。

今四川東

川軍民府

烏蒙軍

烏蒙軍民府

芒部，諸蠻皆內附。沐英進攻大理，破下關。

在大理府城西點蒼山南，亦曰龍尾關，山北有關曰上關，亦曰龍首關。

遂拔

其城，擒酋長段世。

時大理總管段明卒，叔世權國事。

分兵略鶴慶、麗江、破石門關。

關在麗江軍民府巨津州西百里，詳雲南重險。

下金齒。

永昌軍民府元曰金齒宣撫司。

於是車里、

今車里宣慰司。

摩些、

在麗江軍民府西，徼外吐蕃種也。

和泥、

亦曰倭泥，在車里司西。

平緬、

今隴川宣撫司，元曰麓川路。

諸蠻相繼臣服，雲南平。

顧氏曰：太祖起自東南，奄有西北，為古今異數，嘗攷其用兵之法，實一出於孫吳。攻瑕擣虛，是以所向無敵。夫有取天下之志，而無取天下之略，自開闢以來，未見有成功者也。太祖明於先後緩急之宜，分

合向背之理。始則決機於兩陳。繼直制勝於廟廊。大略同於漢高。精密媿於光武。猗歟。豈非百代爲昭者歟。

王氏曰。太祖自渡江之日。親御戎行者九。而戰苦蹈危。久而後決。者惟鄴陽之役。自克武昌後。下僞吳。取中原。六飛俱不在行間矣。

六合同風。宸居首奠。體國經野。載在職方。

都邑攷。太祖初入京陵。改曰應天府。洪武元年。詔以開封府爲北京。應天府爲北京。

尋罷北京。而應天爲京師。

二年。

以臨濠府爲中都。

又改臨濠府爲中立。府七年。改曰鳳陽府。

太宗永樂元年。建北京於北平府。

七年。始改北京爲順天。時仍以南京爲京師。而巡幸則駐於北京。

正統

以後。遂以北京爲京師。而南京爲陪都。

史略。太祖有天下。高麗、安南、占城、日本、西域、海外諸蠻夷。悉來朝貢。聲教所被。盡禹迹而止。是時雖定都金陵。而建北京。營中都。西北諸邊。屯戍相接。揆文奮武。中外宴然。猶屢命儒臣。編列天下地理形勢。爲書藏之太府。又令州郡以及沿邊衛所。各繪圖來上。山川險易。道里遠近。城池倉庫。關津亭堠。無不畢載。聖謨蓋深遠矣。

黃氏曰。太祖締造規模。彬彬盡善。惟建都金陵。未愜創垂之義。蓋有天下者。慮萬世之安危。不計一時之勞逸。權九服之輕重。不徇一己之從違。奈何狃目前而忘後患也。他日陸寢未安。禁廷蹀血。謂非偏重之

勢。有以致之歟。成祖卜宅燕都。南臨中夏。較之金陵。形勢爲勝。然肩背有單露之虞。西南有遙隔之勢。居廟廷之上者。未可習爲已然。不爲之長慮却顧也。

京師一。領應天等府十四。徐州等州四。今為南京。

布政司十二。會典。洪武九年。改故行中書省為布政使司。凡十二。十五年。始增置雲南布政司。凡十三。以分領天下之府州縣。大約州縣俱隸府。縣又或隸州。州或直隸布政司。
曰浙江。領杭州等府十一。
曰江西。領

昌等府十三。
曰福建。領福州等府八。
曰湖廣。領武昌等府十三。安陸等州五。
曰山東。領濟南等府六。
曰山西。領太原等府三。潞州等州五。
曰北平。領北平等府八。隆慶等州二。今為京師。

曰河南。領開封等府七。
曰陝山。領西安等府八。
曰廣東。領廣州等府十。
曰廣西。領桂林等府十。江州等州八。
曰四川。領成都等府七。潼川等州五。東川等軍民府四。龍州等宣撫司二。播州等宣慰

司二。又黎州安撫司一。平茶洞長官司一。曰雲南。領雲南等府十二。曲靖等軍民府七者。樂甸等長官司二。又羈縻孟定等府二。車里等宣慰司五。鎮康等州四。干崖長官司一。

顧氏曰。三代而上為九州。漢為十三部。唐為十道。宋為十五路。太祖定天下。京師而外。分為十三布政使司。此即唐虞分州建牧之義。監數代而得其中者也。世俗不之攷。乃襲元人舊稱。猶目之為分省。謬矣。

又於邊圉疆索。置行都指揮使司七。以安內攘外。曰遼東。洪武三年。遼東來歸。四年。遣馬雲。葉旺。鎮守其地。時故元將納哈出屢入寇。雲等拒却之。二十年。馮勝等破納哈出於金

山。悉平其衆。於是遼東守衛益固。邊略。洪武八年。置遼東都指揮使司。十年。盡革所屬州縣。改置定遼等衛。以制防朵顏三衛諸部落。兼東限高麗。南備倭寇。金山在三萬衛西北三百五十里。
曰大寧。洪武十二年。遣馬雲征大寧。克之。二十年。馮勝討納

哈出始修葺故城。奏置北平行都指揮使司於此。又列置興營等二十餘衛屬焉。自是屢由此出師北伐。邊地益闢。邊略大寧鎮撫降夷。控扼北邊。西翼開平。南衛遼海。藩屏要地也。興州衛於故興州置。在今廢開平衛東二百里。營州衛於故營州置。在今大寧廢衛東三百里。

曰萬全。

洪武二年。常遇春追擴廓於大同。即遣兵下順寧府。於是山北州郡皆歸於我。四年。命墟其地。悉徙其民入關。二十六年。置萬全都指揮使司於此。邊略萬全犄角大同。翼衛畿輔。屹爲重鎮。

曰大同。

洪武二年。常遇春下大同。留兵

駐守。既而元將脫列伯等入寇。李文忠赴援。大破之。於是守將金朝興等。遂略取東勝諸州地。四年。置山西行都司於城內。邊略大同。控禦漠南。唇齒幽冀。時又置東勝左右衛於大同。降城相望。河套以內。兵民耕牧。寇不敢窺。蓋備邊之策。是時爲得全算也。東勝州在大同府西。降城三受。曰甘肅。洪武五年。遣徐達等分道北伐。馮勝與傅友德出西路。自蘭州趣西涼。下永昌。略甘肅。收瓜沙河西。悉內屬。二降城也。俱見前。

曰甘肅。

十六年。置陝西行都指揮使司於甘州衛。邊略甘肅。制馭西域。隔絕羌部。爲必守之地。又是時吐番西域諸君

長。俱奉朝貢。即其地設司衛所三十。有六。俾統理降夷。西藩益鞏固矣。

曰建昌。

洪武二十五年。降將月魯帖木兒以建昌叛。藍玉討平之。以便宜請增置衛所。從之。二十七年。置四川行都指揮使司於此。邊略建昌。外控番夷。內馭蠻獠。界滇蜀之間。封守攸重。

曰貴州。

國初既平湖廣。四川於是八番順元。諸蠻夷悉內屬。因建置貴州等衛所。八年。設貴州都司以統之。邊略貴州。綏輯谿峒。式遏苗夷。爲川湖之屏蔽。大政攷。洪武八年。於各省會設都指揮使司。九年。改行中書省爲承宣布政使司。其不與布政司並治者。

爲行都指揮使司。七司而外。別有福建行都指揮使司。置於建寧。大抵無事則屯田練兵。慎固封守。有事或命將專征。隨宜調發。既畢。則將還於朝。士歸於伍。一時軍政最爲嚴肅。

而開平。

洪武二年。克開平。三年。李文忠自興和北伐。克應昌。五年。文忠復追元裔

於土刺河北。至稱海而還。自是遣將北討。往往以開平爲中屯。太祖嘗曰。北騎南寇。不趣大寧。即襲開平。因屯軍置衛於此。以扼寇衝。興和應昌。俱在今大寧廢衛境。土刺河及稱海。俱在故元和林境內。

洮州。

洪武四年。置衛。十年。命鄧愈等討西番。取朵甘。納鄰

七站地。於是增置岷州衛。又命與河州衛相聯絡。以控番部。太祖嘗曰。洮州西番門戶。築城戍守。是扼其咽喉也。朵甘。即今西番朵甘諸部。

亦皆置軍戍守。東起朝鮮。西接吐蕃。南至安南。北

距大磧東西一萬一千七百五十里南北一萬九百里。

顧氏曰太祖挈漢唐舊壤還之職方比於去昏墊而之平成功烈有加焉獨是大寧設矣而不知營州爲五服故封東勝城矣而不知三受降城爲馭邊遠略豈功倦於垂成歟抑當時謀國者無深識遠猷之士也嗚呼創造之初一或不審日蹙百里之虞遂伏於此焉君子觀於履霜之占童牛之象未嘗不反覆而三嘆也。

太宗起自燕藩舉兵內向戰勝攻克纘承大統。

史略初太祖大封諸王秦晉燕齊地逾千里又以北方邊警沿邊諸王俱得典兵征伐太宗英武夙成屢立戰功建文卽位朝野皆疑燕有異志會來朝車敬密奏曰燕王智慮絕人而北平者強幹之地也宜徙封南昌以絕禍本夫萌而未動者機也量時而爲者勢也勢非至勁莫能斷機非至明莫能決不聽旣還遣張昺謝貴等相繼赴燕防察日迫建文元年有詔逮燕官屬燕王遂定謀殺昺貴等據北平舉兵略定通薊諸州邑乃曰居庸者居庸見上北平之噤喉必據此始可無北顧憂遂引兵趣居庸拔之又

曰懷來未下。懷來卽宣府鎮懷來衛

居庸有必爭之理復引兵襲破之於是山後諸州鎮多爲燕有永平灤河皆降

附。灤河即永平府灤州。朝廷遣耿炳文帥師屯真定。燕兵破其前鋒於雄縣。縣屬保定府。又破別將於莫州。今河間府任邱縣北三十里。

莫州城也。進至真定。炳文迎戰。大敗。詔遣李景隆代炳文將大軍駐河間。燕王以景隆易與。議北取大寧。誘

景隆進攻北平。乃還師扼之。會遼東兵攻永平。燕王馳救。遼兵遁走。遂謀北向。諸將曰：大寧必道松亭

關。關在薊州遵化縣東北。志云：縣東北七十里至大喜峯口關。又東北百二十里乃松亭關也。關門險隘。守備方嚴。恐難猝拔。燕王乃從劉家口徑趣大寧。

劉家口關在永平府遷安縣北。襲破之。松亭遂來歸。因誘執寧王。盡擁大寧諸戍卒而南。燕兵益盛。李景隆方渡盧溝橋。

橋在順天府城西南三十里。跨盧溝河上。築壘攻城。不能克。燕王還至會州。會州在松亭關東北百二十里。國初築城置驛於此。整軍而南。渡白河。白河經昌平州順義縣東。

即是時渡處也。攻景隆營。時景隆營於鄭村壩。在順天府城東北二十里。景隆大敗。走德州。二年。燕兵取廣昌。下蔚州。廣昌蔚州屬縣。進攻大同。會

李景隆復聚兵北向。燕王引還。大破之於白溝河。白溝河經保定府新城縣南三十里。即景隆敗處。遂乘勝南下。拔德州。攻濟南。鐵

鉉固守。力攻不克。乃還。鉉等進復德州。詔盛庸將兵屯守。又分兵守定州。滄州。以拒燕軍。未幾。燕王襲

滄州。拔之。時燕兵出遼東。既而移師還通州。渡直沽。趣滄州。破之。尋至臨清。東昌府屬州。攻盛庸於東昌。時庸自德州移營東昌。庸出戰。大破燕軍。追至

真定燕王還北平

先是詔庸等將兵北進庸進軍德州燕王自臨清移屯館陶進至汶上略濟寧庸引兵躡之營於東昌燕軍至庸出兵合戰燕王大敗退屯館陶庸乘勝追北燕王引還汶上今東平州屬縣館陶今臨清州屬縣

三

年燕王駐保定議所向時盛庸復屯德州平安等屯真定吳傑屯定州邱福以定州備弱議先取之王

曰野戰易以成功攻城難於奏效若屯師城下庸等合勢來援勝負未可知也今真定距德州二百餘

里真定距德州五百餘里

我出其中敵必迎戰先破一軍餘自破膽矣遂南行盛庸拒戰於夾河

夾河在直隸武邑縣

北三十里自清漳水分流東入滹沱

敗績走還德州燕軍西渡滹沱敗真定諸將於藁城

滹沱河自真定府東南經藁城縣北又東流入晉州界是時平安吳傑合兵保真定盛庸

既敗而南燕王遂謀取真定誘諸將來戰前渡滹沱平安等逆戰於單家橋大敗復戰於藁城又敗遂潰還真定閉門固守單家橋在河間府獻縣南二十里

進次大名略順德廣平諸郡皆下之燕王

以南兵萃德州資糧所給皆在徐沛遂遣輕師破濟寧掠穀亭沙河沛縣

穀亭鎮在山東魚臺縣東二十里沙河鎮在江南沛縣西北六十里皆餉

道所經也

水陸糧運軍資器械悉爲煨燼京師大震德州軍聞之氣益沮庸遂謀南還四年燕兵破東阿東

平東阿卽東平州屬縣

南至沛縣分軍攻徐州及宿州燕王南駐渦河

渦河自河南鹿邑縣東南流至江南懷遠縣城東入淮燕王駐兵處卽懷遠之北也

平安引兵

躡其後燕王設伏於淝河以待之安大敗

淝河自宿州東流經懷遠縣入淮徵信錄平安先自真定引兵扼燕餉道不克又以大同守將房昭東下保定燕兵圍之於西水寨分兵赴救敗還尋又敗燕

兵於楊村。進攻通州。不克。聞燕軍深入。乃趣而南。爲燕王所敗。
西水寨在直隸易州西南百里。楊村在直隸武清縣東百里。
徐、宿、二州皆降於燕。會何福敗燕軍於小河。小河即睢水。自河南

陳留縣東南。流至江南。宿遷縣東南而合於泗。詳見江南大川。何福戰處在宿州靈壁縣北六十里。
徐輝祖亦敗燕軍於齊眉山。山在靈壁縣西南三十里。燕師小却。旋召輝祖還。

何福勢孤。移營靈壁。燕軍攻拔之。遂入泗州。渡淮。下盱眙。縣屬泗州。時諸將分屯鳳陽、淮安。燕將或請先攻

鳳陽。或欲先取淮安。燕王曰：「二城兵多食足。攻之不易。今乘勝鼓行。揚州、儀真、儀真揚州府屬縣。軍弱備寡。可

招而下。既得真、揚、淮安、鳳陽。人心自懈。我耀兵江上。聚舟渡江。京城震駭。必有內變。可計日而收效也。」

遂趣天長。泗州屬縣。入揚州。江北諸州多來附。又克儀真。立營於高資港。在儀真縣東南四十里。近大江南岸。命將集艦於瓜洲。

揚州府南四十里。瓜洲渡。鎮江守將亦送款於燕。徐輝祖迎戰於浦子口。浦子口渡在應天府江浦縣東五十里。燕師不能勝。盛庸復戰。大

敗。舟師悉降於燕。燕軍濟江。次龍潭。在應天府東北九十里。大江南岸。進攻金川門。在應天府城西北面。守者以門獻。建文出亡。燕王

入京師。即大位。內外悉定。
顧氏曰：成祖以幽薊赴桓之旅。加江淮脆弱之師。處既形便。勢有地利。當時之事。不戰而已。知其爲燕

矣。雖然南國君臣亦未始不足有為也。合管秦之步騎乘西山而入三關萃江海之舟航扼天津而斷
午道。午道糧道也。一隅之燕豈遂足以當天下之衆。乃賢如方卓諸君子曾未聞以出奇制勝選將訓兵為
先務既已喪敗日聞猶汲汲焉取太祖制度而更張之若不知問罪者已在戶外也。吁此實人事之不
臧論者概謂之天道豈其然乎。

既又北逐亡元。

史略永樂八年親征蒙古餘裔至斡難河以北。

斡難河見前是年賜名元冥河。

俘獲而還十二年北征瓦剌。

瓦剌為韃靼別種其長馬哈朮

等既降復叛因討之

追敗之於土刺河。

在斡難河西數百里

乃班師二十年復征蒙古。

其長阿魯台復叛也

獲其輜重於殺狐原。

原在臚胸河西斡難

河之東永樂八年賜臚胸河名曰飲馬河

乃移師征兀良哈。

洪武二十二年元族屬故遼王阿里失禮等內附因置三衛以授之曰朵顏泰寧福餘統名曰兀良哈故營州北境地也是時叛附阿魯台因移軍討之

大破之

於屈裂河。

河在朵顏北境

二十一年復征蒙古。

追阿魯台不及而還

明年復北征至答蘭納木河。

在元故和林城東北境亦曰闊闊納吾兒海

不見

敵而歸蓋五出塞北窮追伏影千乘萬騎勒銘殊庭自古帝王未有之烈也。

南平交趾。

史略初安南黎季犛弑其主陳日焜而代之。國號永樂元年表請署國事詔封其子蒼為安南國王明

年老搃送陳天平來朝。老搃宣慰司屬雲南天平故安南王孫也。詔詰季犛季犛詭請天平歸國四年天平還入境季犛賊殺

之於芹站。芹站在安南諒山府北。并害使臣因遣朱能等進討。能至龍州卒副將張輔代總其事龍州廣西屬州也。五年張輔等至交州屢敗賊

兵尋大破之於富良江。在安南國城北三十里見前。窮追至奇羅海口。在安南境內又安府東南。擒季犛父子安南平。詔求陳氏後無所得。因置

交阯布政司統其地六年交阯賊簡定等復叛定尋自稱上皇推其黨陳季擴為帝國號越復命輔等

討擒之時定黨陳季擴等猶出沒海上沐晟討之未克尋請降詔授交阯布政使司。復叛稱越國王。九年復命

張輔進討破賊於月常江。在安南清化府境內。十年大破之於神投海口。在安南建平府南。明年破之於愛子江。在安南順化府東北。十

三年擒季擴悉平其黨交阯復定。
西藩哈密。

史略永樂元年元裔安克帖木兒入貢明年設哈密衛。安克帖木兒本蒙古族屬襲封肅王至是改封忠順王統回回畏吾兒哈刺灰三種仍設都督授其部長。衛本

漢之伊吾廬。唐之伊州也。唐衰。不屬於中國。至是始內附。其地爲西徼噤喉。自是制定。凡西域諸夷入貢。必哈密譯其文。乃得發。又設沙州及赤斤蒙古。曲先等衛。與哈密相表裏。以故西藩。

沙州。赤斤蒙古衛。永樂二年置。曲先

衛。四年置。先是太祖置罕東。阿端。安定。三衛。至是又增置三衛。與哈密爲七。六衛在嘉峪關西。哈密又在六衛之西。而甘肅益爲境內矣。

東靖女真。

史略。永樂九年。遣將將水軍。駕巨艦。至混同江上。招集女真諸部落。於是女真悉境內附。置努兒干都

司。其地卽金會寧府也。元置合蘭府。水達達等路於此。授其封爵。兼分置衛所。城。站。以授其部族。自是建置益廣。凡衛百七十九所。二十。又地面五十八。站七。寨一。悉屬於都司。正統中。復增置

五衛。其後代有添設。萬歷中。多至三百八十餘衛。又置馬市於開元城。卽今三萬衛。俾貢馬給值。賜賚以時。爲遼東外蔽。

建北京。改北平布政司爲北京。

何氏曰。成祖之建北京。何異成王之營洛邑。夫兩都並建。自周以前未有也。漢魏而降。五都四京。後先相襲。然近者相去數百里。遠者亦不過千里。若懸隔三千里之外。踰江越淮。泝河浮濟。而欲巡幸會同。

歲時無失。此又必不得之數也。然則何以爲善法。成周曰。金陵財賦所萃。幽陵士馬所資。控西北以震疊河山。綏東南以供輸京闕。此成祖繼述之善。冠古燦今者也。或者曰。漕河絕續。則咽喉可慮。關隴遙闊。則肩背爲虞。毋乃未攷於馭邊籌漕之初制乎。

列交貴。

永樂五年。設交趾布政使司。領交州等府十七。廣威等州五。屬州四十二。縣一百五十七。十一年。設貴州布政使司。領貴州宣慰司一。思州等府六。普安等州四。金筑安撫司一。

威略赫焉。然棄大寧。移東

勝。慮亦稍疎矣。

史略初。太祖分兀良哈爲三衛。居潢水北。

潢水見遼起臨潢。

領於北平行都司。三衛斂息順命。建文元年。太宗

劫大寧兵南下。并召兀良哈三衛率部落從行。永樂元年。徙北平行都司於保定。

興營諸衛俱移置於順天永平境內。

遂以

大寧分界三衛。自廣寧前屯。歷喜峯。

廣寧前屯衛屬遼東都司。喜峯見前松亭關注。

近宣府者。屬之朵顏。自錦。義。歷廣寧。逾遼河。

錦州。今廣寧中屯衛。義州。今廣寧後屯衛。俱屬遼東都司。遼河在廣寧鎮東北二百里。與遼東都司分界。見前。

至白雲山。

在遼河東。或曰即廣寧衛東北九十里之白雲山。非是。

屬之秦寧。自黃泥窪。

在瀋陽衛西北。

三百里。逾瀋陽鐵嶺至開元者。屬之福餘。朵顏於三衛最強。地形亦最險。自是防維單外。誘導北兵。連屬

諸部漸萌窺伺。又是年議者以東勝孤懸難守，乃移左衛於永平府，右衛於薊州遵化縣，河南沃野遂成棄壤。他日邊釁紛紜，蓋肇於此也。

宣宗當寧復廢交趾。

史略：先是交賊黎利復叛。

黎利本陳季擴將。永樂十二年來降。授清化七官巡簡。十六年利據清化以叛。稱平定王。遣兵討之。不克。十八年赦利。授清化知府。二十二年復叛。清化在交州西南六百里。

宣德初。

遣軍進討。敗績於茶籠州。

在又安府北。

既而大發兵討之。皆敗績。

二年黎利攻交州。尋敗。官兵於昌江。進陷隘留關。大帥柳升進討。至鎮夷關。敗沒。昌江在諒江府南。隘留關在

諒山府北。關南為鎮夷關。故雞陵關也。永樂五年改曰鎮夷關。

會黎利請撫。朝議以損威棄財於計非便。遂許其請。命諸將班師。所建官吏。

亦皆北還。黎氏遂據有其地。

又棄開平。

史略：宣德三年。議者以大寧既棄。開平懸遠難守。因城獨石。徙置開平衛於此。

今衛屬宣撫鎮。

棄地三百餘里。

遂失灤河、龍岡之險。

灤河在舊開平衛南。下流經永平府境入海。見直隸大川。龍岡即舊衛北三里之臥龍山。

而邊陲斗絕矣。

迨土木告變。

土木堡在宣府鎮懷來衛西二十五里。

四海震驚，非少保之忠勤，社稷幾於不守。

史略：英宗在位，屢興大兵，南北騷動。

正統六年，大發兵討麓川叛酋，平之。八年，再叛，復遣兵進討，并進破緬甸。是年，又分兵五道出塞討三衛。十二年，浙東賊葉宗留反，明年福建賊鄧茂七反，而麓川酋仍

伺間出沒。又湖廣貴州羣苗皆叛，所在遣兵撲勦。遠近騷動。麓川今爲隴川，宣撫司與緬甸俱屬雲南。

正統十四年，瓦剌也先犯大同境。

時北部分道入寇，脫脫不花犯遼東，阿剌犯宣府，圍赤城。也先寇大

同至貓兒莊，赤城今宣撫鎮赤城堡。貓兒莊在大同府北百二十里。

太監王振勸上親征，出居庸，歷懷來，宣府，至大同，兵氛甚惡，乃班師。大同帥

郭登請上從紫荊關入。

關在易州西見前。

振不聽，還至宣府，敵自後追襲，遣將拒戰，皆敗沒。次土木，人馬疲渴，

而鐵騎四合，死傷無算。上爲也先所得，遂詣塞外，京師震駭。百官遷太后命，奉郕王攝政，尋卽位。于謙

掌機務，收輯喪亡，經理捍禦。也先以送上皇還京爲名，過大同，至廣昌。

蔚州屬縣。

破紫荊關，抵京城西北。于

謙督石亨等營城外，奮擊敗之。也先復奉上皇遁去。時郭登固守大同，羅亨信固守宣府，京師恃爲肩

背。謙又於天壽山。

在順天府昌平州東北十八里，陸寢奠焉。

居庸關及涿州、通州、易州、保定、真定。

涿州、通州屬順天府，易州屬保定府。

皆屯宿重兵。

衛畿輔，而自遼薊以至甘肅，中間邊關堡塞，皆得人戍守，敵入寇輒敗去。於是國勢大振。也先遣使求

和不許敵知中國有備而挾上皇為空質奸謀遂消上皇旋自北還宗社奠安謙一人力也鄭氏曰子公受命於倥偬

之際是時東至遼東西至陝西皆敵騎充斥浙閩賊黨猶未盡平而黃蕭養復聚眾作亂攻逼廣川南蠻西番亦相率蠢動公內固京師外籌九服開鎮臨清以控漕渠收復獨石八城堡以壯畿甸任良牧而貴州輯寧擇大帥而粵東盪定未幾強敵款塞羣盜消亡由指麾條畫動

中機宜故也

武宗盤游釁孽屢作

史略正德五年寅鐸反寧夏寅鐸慶藩諸子安化王也時慶藩封寧夏鎮將仇鉞討平之鉞為寧夏遊擊將軍襲執鐸十四年宸濠反南昌永樂元年

寧王權自大寧徙封南昌宸濠其四世孫陷南康九江攻安慶不克贛撫王守仁等討平之守仁克南昌引兵出鄱陽宸濠還戰兵敗被執是時邊塞屢被

寇擾中原遠近盜賊羣起其最甚者劉六劉七趙燧等起於畿輔轉掠直隸山東河南湖廣南畿久而

始滅劉六等起於正德四年所至殘破七年始敗滅又藍廷瑞等起保寧犯漢中鄖陽及川東貴州境廷瑞等起於正德三年九年餉黨始平謝志珊等

起於南贛謂南安贛州二郡掠江西湖廣福建廣東境志珊等正德初盤據山險連絡徒黨久為患害十二年撫臣王守仁等討之次第盪平雖相繼誅滅而所在

困弊矣

世宗興邸潛飛。

興藩憲宗次子封湖廣安陸州。再傳入繼大統以州爲承天府。

中興之望朝野欣欣而斥絕言路保任大奸初既棄哈密。

史略哈密西去土魯番千餘里。

土魯番西夷別部在火州西百里。

成化以後哈密衰土魯番益強屢肆吞噬國家以哈密

外領西域內蔽邊郡非此則無以離戎朔之交因務設方略以存復之士魯番雖驕橫亦未敢安據其地嘉靖三年土魯番入塞犯甘州邊臣敗却之又追敗之於肅州八年復犯肅州敗走尋請降且以哈密來歸朝議以哈密既殘破且去邊遠疲中國以存外夷非計也遂棄不復有嘉峪關外皆爲寇境

關在

肅州衛西六十里時沙州諸衛皆爲土魯番所侵掠與哈密諸部餘民悉安插肅州及甘州境內而七衛之地皆墟矣七衛見前

又是時亦不刺盤據西海。

亦不刺北

瓦刺結巢北山。

北山謂賀蘭山北山在寧夏衛西六十里綿亙數百里詳見陝西名山

於是河西二面受敵備羌禦朔日不暇給。

繼復棄河套。

史略國初李文忠敗元於豐州。

事在洪武七年

既而城東勝。

在洪武二十七年

河套以內耕屯相望永樂初方事遠略。

棄東勝不守其後大兵數出亡元遠竄窺伺益少正統中稍稍多事乃議築榆林諸城堡成化中復築

榆林邊牆千餘里。而河套漸成甌脫。然議者未嘗不欲復漢唐故事。為扞邊固圉計也。

河套自天順以後。為毛里孩等所窺。

伺既而火節等屯牧其中。正德初。楊一清議大舉恢復。不果。

嘉靖以來。北邊部落益強。往往窟穴套中。

時台吉吉囊住牧套中。俺答住牧豐州。二部於諸部最強。為邊患。吉囊死。其種落仍屯套

中而聽命於俺答。

河東、關西、歲被蹂躪。二十五年。督臣曾銑以復套為己任。規畫甚偉。為嚴嵩所搆。棄市。自是

邊事日壞。敵旋入宣薊。犯京師。蔓衍以至遼東。朝廷旰食。無敢議及河套者。

又倭寇縱橫。東南糜爛。方中之勢。寢以昃矣。

史略。國初。並海郡縣。屢被倭患。洪武十七年。命信國公湯和巡視海道。自山東至江南北。浙東西。以及閩嶺。皆築城置戍。控扼要害。二十年。復命江夏侯周德興築城於福建濱海諸處。

國史。是時江南。山東。浙江。福建。廣東西。皆置行都司。

以備倭為名。

自是雖間有倭警。旋即退散。嘉靖二年。倭黨互爭貢。遂起釁相攻。殺掠寧波。以至紹興。自是浸淫至兩浙。江、淮、閩、廣之境。縱橫出沒。所至屠掠一空。至四十四年。餘患始息。殘破郡邑。殆以百計。東南素稱富庶。至是為之衰耗。

是時阪圖為直隸二。承宣布政使司十三。

京師。亦曰北直隸。會典永樂十八年革北平布政司爲直隸府八。曰順天。保定。河間。真定。順德。廣平。大名。永平。州二。曰隆慶。保安。屬府。州十有七。屬縣一百十有六。而昌平州。通州。易州。爲三輔。又居庸。倒馬。紫荆。爲內三關。特設重臣於保定。以提督之。與薊州宣府。

互爲形援。以厚京師之藩衛。隆慶初。改隆慶州曰延慶。州。倒馬關在定州西北百二十里。詳直隸重險。餘見前。

南京。亦曰南直隸。府十四。曰應天。鳳陽。安慶。廬州。淮安。揚州。蘇州。松江。常州。鎮江。徽州。寧國。池州。太平。州四。曰廣德。和州。滁州。徐州。屬府州十三。屬縣九十六。而淮安爲漕運通渠。鳳陽爲陵寢重地。安慶爲陪京上游。蘇松爲邊海襟要。皆特設重臣。申嚴封守。

山東。府六。曰濟南。兗州。東昌。青州。登州。萊州。屬府州十有五。屬縣八十有九。分道三。濟南道。轄濟南府一。東兗道。轄東昌。兗州府二。海右道。轄青。登。萊等府三。又有遼海東寧道。則分轄遼東衛所。而臨清。濟寧。東平諸州。爲漕運咽喉。登。萊。爲遼東應援。皆重地也。

山西。府四。曰太原。平陽。大同。潞安。州四。曰汾州。遼州。沁州。澤州。屬府州十有六。屬縣七十有七。分道四。冀寧道。轄太原府一。河東道。轄平陽府一。冀北道。轄大同府一。冀南道。轄潞安府及沁。澤。遼。汾四州。而太原控扼關塞。大同限隔漠南。並爲重鎮。萬歷二十三年。

升汾州爲府。今爲府五。州三。

陝西。府八。曰西安。鳳翔。漢中。平涼。鞏昌。臨洮。慶陽。延安。屬州二十有一。屬縣九十有四。分道五。關內道。轄西安府一。關西道。轄平涼。鳳翔。二。關南道。轄漢中府一。河西道。轄慶陽。延安府二。及寧夏衛。寧夏中衛。隴右道。轄鞏昌。臨洮府二。及河。洮。岷。靖。四衛。文縣一。

所。又有西寧道。則分轄甘肅。西寧。諸衛所。自西安。鳳翔。漢中而外。皆逼近邊陲。環設重兵。以壯形勢。萬歷十一年。增置長武縣。屬邠州。今爲縣九十有五。

河南。府八。曰開封。歸德。彰德。衛輝。懷慶。河南。南陽。汝寧。州一。汝州。屬府州十有一。屬縣九十有七。分道四。大梁道。轄開封。歸德府二。河南道。轄河南府一。汝州一。汝南道。轄南陽。汝寧府二。河北道。轄彰德。衛輝。懷慶府三。萬歷初。以上諱。改開封府鈞州曰禹州。

浙江。府十一。杭州。嘉興。湖州。嚴州。紹興。寧波。台州。溫州。金華。衢州。處州。屬府州一。屬縣七十有五。分道五。杭嚴道。轄杭嚴二府。嘉湖道。轄嘉湖二府。寧紹道。轄寧紹三府。金衢道。轄金衢二府。溫處道。轄溫處二府。而濱海諸郡。控禦島夷。防維特重。

江西。府十三。南昌。饒州。廣信。南康。九江。建昌。撫州。臨江。吉安。瑞州。袁州。贛州。南安。屬府州一。屬縣七十有四。分道五。南昌道。轄南昌。瑞州府二。湖東道。轄廣信。建昌。撫州府三。湖西道。轄吉安。臨江。袁州府三。九江道。轄饒州。南康。九江府三。嶺北道。轄贛州。南安府二。

而南贛接連楚粵。以及閩海。山川深險。奸民易以嘯聚。特設重臣於贛州。兼督南贛。雄韶。惠潮。汀漳。郴桂。諸州郡。而九江控帶大江。連接安慶。亦爲中流重鎮。又隆慶二年。增置定南縣。萬曆三年。置長寧縣。俱屬贛州府。萬曆六年。置瀘溪縣。屬建昌府。今縣凡七十有七。

湖廣。府十五。武昌。承天。漢陽。黃州。德安。襄陽。鄖陽。荊州。岳州。長沙。常德。衡州。永州。寶慶。辰州。州二。郴州。靖州。屬府州十三。屬縣二百有六。分道七。武昌道。轄武昌。漢陽。黃州府三。荆西道。轄安陸。德安府二。上荆南道。轄荊州。岳州府二。及施州諸衛所。下荆南道。轄襄陽。鄖陽府二。湖北道。轄常德。辰州府二。靖州一。及永順。保靖。二宣慰司。上湖南道。轄衡州。永州府二。郴州一。下湖南道。轄長沙。寶慶府二。

而鄖陽山川糾結。連接秦豫。特設重臣於鄖陽。兼督荆襄。汝鄧。商洛。漢中諸境。又以辰州密邇川貴。蠻獠紛錯。亦設重臣提督辰沅。靖州。以及偏橋。銅仁。思州。播州。西陽。麻陽。永順。保靖。施州等境。又萬曆二十八年。增置天柱縣。屬靖州。今縣一百有七。

四川。府八。曰成都。保寧。順慶。重慶。夔州。叙州。龍安。馬湖。州六。曰潼川。嘉定。眉州。雅州。邛州。瀘州。屬府州十四。屬縣一百有七。而長官司四。屬馬湖府。又羈縻軍民府四。曰雄鎮。東川。烏撒。烏蒙。宣慰司一。曰播州。宣撫司一。曰永寧。安撫司一。曰黎州。所屬長官司凡六。分道五。川西道。轄成都。龍安府二。及松潘。疊溪。諸衛所。川北道。轄保寧。順慶府二。及潼川州一。川東道。轄重慶。夔州府二。川南道。轄叙州。馬湖府二。又鎮雄。東川。軍民府二。及嘉定。眉。瀘。邛。四州。播州。永寧等司。上川南道。轄雅州。及建昌行都司。黎州。天全等司。而松茂控扼土番。建昌限制番族。皆爲四偏襟要。萬曆十七年。改馬湖府附郭泥溪。長官司爲屏山縣。二十四年。改黎州安撫司。爲千戶所。二十七年。平播州。改爲遵義府。又改置屬州一。屬縣四。今爲府八。屬州十五。屬縣一百一十一。長官司九。

福建。府八。福州。興化。泉州。延平。建寧。邵武。汀州。漳州。州一。福寧屬縣五十有七。分道四。福寧道。轄福州。興化。泉州。府三。福寧州一。武平道。轄邵武。延平府二。建寧道。轄建寧府一。漳南道。轄汀州。漳州府二。

廣東。府十。廣州。肇慶。韶州。南雄。惠州。潮州。高州。雷州。廉州。瓊州。屬府州七。屬縣七十四。分道五。嶺南道。轄廣州。韶州。南雄府三。嶺東道。轄惠州。潮州府二。嶺西道。轄肇慶。高州府二。海北道。轄廉州。雷州府二。海南道。轄瓊州府一。萬歷四年。於德慶州之瀧水縣置羅

定州。又增置東安。西寧二縣屬焉。州直隸布政司而分轄於嶺東。道。崇禎六年。增置鎮平縣。隸潮州府。今直隸州一。縣七十有六。

廣西。府七。桂林。平樂。梧州。潯州。南寧。柳州。慶遠。屬州十六。而羈縻者居八。又羈縻府三。曰太平。思明。鎮安。軍民府一。曰思恩。直隸羈縻州十一。羈縻屬州十八。屬縣五十。羈縻縣八。長官司四分道四。桂平道。轄桂林。平樂府二。蒼梧道。轄梧州府一。左江道。轄南寧。潯

州。太平府三。右江道。轄柳州。慶遠。思恩。思明。鎮安等府五。及羈縻直隸諸州縣。而南寧鎮撫南蠻。憑祥龍州。控扼交趾。爲守禦要地。隆慶四年。改桂林府古田縣爲永寧州。六年。又增置新寧州。萬歷十八年。置下雷州。與新寧州俱屬南寧府。今州共四十有八。

雲南。府五。曰雲南。大理。臨安。澂江。楚雄。軍民府六。曰曲靖。姚安。武定。永昌。鶴慶。麗江。羈縻府十。曰尋甸。廣南。廣西。鎮沅。景東。永寧。順寧。蒙化。孟定。孟良。羈縻軍民府一。曰元江。屬州三十。羈縻直隸及屬州共十一。屬縣二十八。羈縻縣二。又有羈縻宣慰司六。宣撫司

三。長官司共二十有四分道四。安普道。轄雲南。曲靖。尋甸府三。臨元道。轄澂江。臨安。廣西。廣南。元江府五。新化州一。洱海道。轄姚安。楚雄。武定。景東。鎮沅府五。金滄道。轄大理。永昌。鶴慶。麗江。順慶。永寧。蒙化府七。及北勝州。瀾滄衛各一。而臨安南出交趾。永昌鎮。搆羣蠻。皆爲

要地。萬歷十三年。於孟良府增設耿馬安撫司。又改舊孟密安撫司爲宣撫司。仍設置蠻莫安撫司。蓋增設宣撫司一。安撫司一。

貴州。府八。程番。鎮遠。黎平。都勻。思州。思南。銅仁。石阡。羈縻直隸州四。曰安順。鎮寧。永寧。普安。屬府州二。縣六。又宣慰司一。曰貴州。安撫司二。曰金筑。凱里。長官司凡八十分道四。貴寧道。轄程番府及貴州宣慰司。威清道。轄安順等州四。及威清諸衛所。都清道。轄鎮

遠黎平都勻等府三。及新添平越諸衛所。思石道。轄思州。思南。銅仁。石阡等府四。隆慶六年。改程番府曰貴陽府。萬歷中。改爲軍民府。又改安順州爲軍民府。平越衛爲平越軍民府。而於貴陽府改置定番州。廣順州。開州。及新貴縣。平越府增置黃平州。及餘慶。甕安。湄潭。三縣。又增置貴陽府附郭貴定縣。於思南府置附郭縣一。曰安化。銅仁府改置附郭縣一。曰銅仁。石阡府改屬置縣一。曰龍泉。今府凡十州。九縣。十三。

夏氏曰。國朝疆理天下。輕重本末。犁然備舉。夫建都燕京。則不得不重山陝。山陝。天下之項背。而京師之頭目也。山陝有事。其應之也。當甚於救焚拯溺。一或不備。而禍不可挽矣。必也選將訓兵。興屯廣牧。常畜其有餘之力。則天下雖有大故。而根本可以無患。遼東局處一隅。依山阻海。雖逼在肘腋。而御得其道。可畫疆守。而阻關固也。山東。河南。江南。湖廣。其天下之腰膂乎。江。浙。川。廣。福建。雲。貴。其天下之四肢乎。夫不知天下之全勢。而言創言守。兩無當也。十五州之形勝具在。何不一揆其措置之理乎。又設九邊。以衛中夏。

遼東。屬衛二十五。所十一。關二。曰三岔。撫順。營堡凡百三。岔關在海州衛西南七十里。撫順關在瀋陽衛撫順所東二十里。

薊州。屬關一百十三。寨七十二。營堡城一百十五。大寧廢。而薊州遂爲極邊。藩垣淺近。防禦甚棘。

宣府。屬衛十五。所二十六。關城堡五十有三。開平棄。而敵在近郊。宣大日以多事。

大同。屬衛八所七堡。五百八十有三。

榆林。屬營六堡二十八。東勝棄而榆林築。大河以南。遂為戎藪。關中多事。莫如榆林為最。

寧夏。屬衛二。中衛。後衛。所四。興武。靈州。韋州。平虜。營堡二十二。自河套棄而寧夏益為寇衝。犄角榆林。屏蔽固原。特為重鎮。

甘肅。屬衛十有三。所六十。關一。嘉峪堡五十。有一哈密棄而關門不啓。戎馬生郊矣。

太原。屬關三。雁門。寧武。偏頭。堡三十九。口十九。河套守而太原為內地。套棄而朔騎充斥。偏頭當其東下之衝。寧武。雁門。東西交警。因特設重臣。提督三關。遮絕寇衝。障蔽畿甸。太原之棘。嘉靖間為最也。雁門見前。寧武關在山西崞縣西北百十里。偏頭關在河曲

縣北百十里。

固原。屬衛三。固原。靖虜。蘭州。所四。西安。鎮戎。平虜。甘州。營堡一十有六。時固原為河套南下之衝。因特設重臣巡鎮。兼督榆林。寧夏。甘肅三邊。互為指臂。後又以洮岷河三衛及諸城鎮。並屬於固原。

東起遼海。西盡嘉峪。南至瓊崖。北抵雲朔。東西一萬餘里。南北一萬里。

凡天下府百有四十。南北直隸府二十二。布政司所屬府百十八。州百有九十三。南北直隸所有州四十。布政司所有州共百五十三。縣千一百二十八。南北直隸所有縣二

百一十。布政司所。又羈縻府十九。州四十七。縣六。

廣西二。雲南四。此俱嘉靖時制。其後互有增損沿革。今具載篇中。

編里六萬九千五百五十有六。

戶九百三十五萬二千一十有五。口五千九百五十五萬八百有一。

夏秋二稅。共米麥二千六百零八萬五千九百一十六石。京通二倉。臨德徐進四倉。每年運漕

四百萬石。亦俱以嘉靖末年為準。

而兩京都督府分統各都指揮使司十六。

萬全。遼東。大寧。凡三。又十三布政司。各設都司一。大寧。徒保定。見前。

行都司五。

山西。大同。陝西。甘肅。四川。

建昌。湖廣。鄖陽。福建。建寧。

留守司二。

中都留守司駐鳳陽。興都留守司駐承天。

所屬衛共四百九十三。屬所二千五百九十三。守禦千戶所三百

一十五。

內外官軍共計八十四萬五千八百餘員。名馬騾二十萬一千一百餘匹。

又夷官宣慰司十一。

湖廣二。永順。保靖。四川二。播州。董卜韓胡。雲南六。車里木邦。孟養。緬甸。老撾。八百大甸。貴州一。貴州。播州。今改為遵義府。

宣撫司十。

湖廣四。施南。散毛。忠建。容美。俱屬施州衛。四川三。永寧。西陽。石砬。雲南三。南甸。干崖。隴川。萬歷中增置一曰孟密。

安撫司二十一。

湖廣八。東鄉。五路。忠孝。忠路。金洞。龍潭。大旺。忠峒。高羅。俱屬施州衛。四川九。黎州。見

前。八郎。麻兒札。阿角寨。芒兒者。俱屬松潘衛。黃平。草堂。甕水。屬播州宣慰。維谷屬董卜韓胡宣慰。雲南二。潞江屬永昌衛。孟密屬灣甸州。貴州二。金筑。凱里。萬歷中雲南增置耿馬。蠻莫。二安撫司。而孟密升為宣撫司。四川改廢草堂。黃平。甕水。三安撫司。

招討司

一。天全。六番。

長官司一百六十九。

湖廣二十四。四川四十。廣西四。雲南二十。一貴州八十。萬歷以後。數有增易。改廢。

蠻夷長官司五。

鎮遠。隆奉。南平。東流。臘壁。峒。俱屬湖廣施州衛。

四夷君

長奉朝貢稱外臣者。至一百十有三國。

東北朝鮮。耽羅等國二。東日本國一。南安南。占城等國六。西南淳泥等國四十九。西哈刺等國四十六。西北哈密等國七。北朵顏。韃靼等國二。

一代之制。

略可觀焉。

王氏曰。地囿於天者也。而言地者。難於言天。何爲其難也。日月星辰之度。終古而不易。郡國山川之名。屢變而無窮也。雖然。刪繁去繆。舉要提綱。首以州域。次以都邑。推表山川。論列形勢。古今興替成敗之鑒。莫能違也。此大易設險守國。春秋書下陽彭城虎牢之義歟。○趙氏曰。自有宇宙。卽有山川。山川封域之經也。封域山川之緯也。然郡國固有廢興。陵谷亦嘗遷改。杜佑有言。凡言地理者。在辨區域。徵因革。知要害。察封土。纖芥畢書。動盈百軸。豈所謂撮機要者乎。

直隸方輿紀要序

據上游之勢。以臨馭六合者。非今日之直隸乎。說者曰。昔黃帝邑於涿鹿之阿。幽陵自昔建都地也。太史公曰。學者多稱五帝。然孔子刪書。斷自唐虞。昔舜分幽州。周列燕國。漢唐以來。大都可知也。石晉以燕雲入契丹。耶律德光於晉之天福二年。始號爲南京。耶律隆緒又於宋之祥符五年。改爲燕京。及女真得其地。廢主亮以宋之紹興二十三年。定都於燕。謂燕爲列國之名。改爲中都。蒙古鐵木真於宋之嘉定八年。克燕。謂之燕京路。忽必烈以至元元年。復號爲中都。四年更置城郭。而徙都焉。九年改稱爲大都路。然則女真因遼。蒙古因金。燕都者。遼金元之故都也。明太宗而復都於燕也。何居。曰。太宗潛龍之地也。太宗初就封於燕。當是時。蒙古之餘裔猶熾。習見燕都之宮闕朝市。不無窺伺之情。太宗靖難之勳既集。切切焉爲北顧之慮。建行都於燕。因而整戈秣馬。四征弗庭。亦勢所不得已也。鑾輿巡幸。勞費實繁。易世而後。不復南幸。此建都所以在燕也。說者曰。天下有偏重之處。幽燕去河洛爲遠。而去關中爲尤遠。唐都關中。以范陽。盧龍。斗絕。東垂爲契丹。奚。室韋。靺鞨所環伺。於是屯戍重兵。增節鎮。祿山乘之。遂成天寶之禍。終唐之世。河北常爲厲階。其後契丹得幽燕。因以縱暴於石晉。女真得幽燕。因以肆毒於靖康。勢莫如建爲京

帥俾禁旅雲屯。才勇輻輳。以潛消天下之禍本。况苦寒沙磧之地。莫甚於燕。而天子且以身先之。夫誰敢耽安樂而避艱難者。曰。是未可以概論也。周都豐鎬。封召公於燕。不聞周室之亂。自燕始也。漢都長安。高帝五年。封盧綰於燕。十一年。綰叛降匈奴。其時之叛者。不獨綰。且有燕而亦不能守也。後或爲燕國。或爲廣陽郡。終漢之世。不聞燕之起而爲厲。東漢初。祭彤著折衝之略。則戎夷懷畏。迨於末季。劉虞牧幽州。猶能撫循其民。歌思遍於境內。雖篡竊紛紜之際。稱雄者或不乏。然革易之初。爲亂且遍天下。咎又不獨在燕矣。夫漁陽之禍。亦唐自召之耳。使委任得人。而制御有方。安在祿山之能爲變哉。史思明。李懷仙。朱滔。劉怱之徒。相繼而拒命也。朱克融之徒。復以盧龍叛也。論者乃不察其本。遂比盧龍若異域。繆矣。夫王者長駕遠馭。不能威行萬里。幽燕禹迹內地耳。乃謂鞭箠所不能及乎。且吾聞之。天子有道。守在四夷。勇夫重閉。君子所貴。以萬乘之尊。而自臨於危險之地。未爲長策也。有定天下之勞者。享天下之逸。亦不必塞苦沙磧之地。而後可以建都也。曰。然則幽燕不可以建都乎。曰。奚爲不可也。人亦有言。建都之地。關中爲上。洛陽次之。燕都又次之。洛陽吾無論矣。漢都長安。則置朔方之郡。列障戍於河南。又開河西五郡。以絕羌與匈奴相通之路。唐人築三受降城。則守在河北。又置安西北庭都護。則西域盡爲臣屬。故關中可以無患。及至德以後。河隴之地。盡沒於吐蕃。而涇陽。渭北。戎馬且充斥焉。然則朔方不守。河西不固。關中亦

未可都也。都燕京而棄大寧，棄開平，委東勝於榛蕪，視遼左如秦越，是自翦其羽翼而披其股肱也。欲求安全無患，其可得哉！然則自遼及元，何以必都燕京？曰：遼起於臨潢，南有燕雲，常慮中原之復取之也，故舉國以爭之，置南京於燕，西京於大同，以爲久假不歸之計。女真自會寧而西，擅有中夏，仍遼之舊，建爲都邑，內顧根本，外臨河濟，亦其所也。蒙古自和林而南，混一區宇，其創起之地，僻在西北，而仍都燕京者，蓋以開平近在漠南，而幽燕與開平形援相屬，居表裏之間，爲維繫之勢。由西北而臨東南，燕京其都會矣。明代之都燕也，當法漢唐之成算，以開平、大寧、東勝、遼陽爲河西朔方之地，乃坐而自削，有日蹙百里之譏，無乃與都燕之初意相刺謬乎？說者曰：以燕京而視中原，居高負險，有建瓴之勢。太宗深鑒於金陵之已事，建都於此，實爲萬世基。說者曰：形勝未可全恃，而燕都之形勝，又不足恃也。太史公曰：燕北迫蠻貊，內錯齊晉，崎嶇強國之間，最爲弱小，幾滅者數矣。又秦人滅趙，敗燕軍於易水之西，而國隨以亡。臧荼、盧綰、國於燕，不旋踵而隕斃。彭寵以漁陽賈禍，公孫瓚以易京覆宗，王浚掩有幽州，幸晉室多故，冀以自雄，而見戕於石勒。段匹磾有幽州，而仍不能自立也。杜洛周、葛榮、韓嬰之輩，旋起旋滅，皆不足道。高開道竊有漁陽，身死而地歸於唐。天寶以後，以河北叛亂者，凡十七起，其能免於誅戮，保其宗祀者，不數見也。迨夫李匡籌見滅於克用，劉守光復繫組於存勗，而幽燕卒并於河東矣。契丹倔強者八世，竟敗亡於女

眞女眞恣睢者百年。終翦滅於蒙古。烏在其爲險固者歟。嗚呼。以燕都僻處一隅。關塞之防。日不暇給。卒
旅奔命。挽輸懸遠。脫外滋肩背之憂。內啓門庭之寇。左支右吾。倉皇四顧。下尺一之符。徵兵於四方。恐救
未至。而國先亡也。撤關門之戍。以爲內援之師。又恐軍未離。而險先失也。甚且藉虎以驅狼。不知虎之且
縱其搏噬。以烏喙攻毒。而不知烏喙之卽足以殺身也。不亦悲哉。然則當去燕京而都金陵乎。曰。金陵可
爲創業之地。而非守成之地也。局促於東南。而非宅中圖大之業也。然則建都者當何如。曰。法成周而紹
漢唐。吾知其必在關中矣。

讀史方輿紀要

卷十

直隸一

古冀州。舜分置十二州。此爲幽州。

傳曰。舜分冀東恆山之地爲并州。東北醫無閭之地爲幽州。則直隸爲幽并二州地。通典。舜分衛東爲并州。燕以北爲幽州。

禹貢亦爲冀州。周禮

職方。東北曰幽州。

應劭曰。北方太陰。故以幽冥爲號。杜佑曰。山海經。幽州有幽都山。州蓋因以名。今山列北荒矣。

武王封召公奭於燕。此爲燕地。其在天文。尾箕則

燕分野。亦兼趙魏之疆。

真定順德廣平河間。春秋時晉地。後屬於趙。大名。春秋時衛地。後屬魏。大名在禹貢亦爲兗州之域。衛趙分野。今見河南山西沿革。

秦并天下。置漁陽上谷邯鄲鉅

鹿。右北平等郡。漢置十三州。此亦爲幽州及并冀二州地。後漢因之。

後漢以幽州理薊。今順天府治也。冀州理鄆。今見趙州栢鄉縣。而并州則理晉陽。今山西太原

縣。晉亦爲幽冀諸州。

幽理涿。今涿州。冀理房。子。今見趙州高邑縣。後爲石勒慕容雋及苻堅所據。堅敗。屬慕容垂。其後入於後魏。魏

末。高齊據之。宇文周復滅齊而有其地。隋分十三部。此亦爲冀州而不詳所統。唐分十道。此爲河北道。天

寶以後強藩往往竊據焉。五代時石晉割燕平諸州入于契丹。周世宗復三關。於是與契丹以白溝河為

界。見保定府雄縣及順天府霸州境內。宋仍為河北路。後又分河北為東西路。慶歷中嘗分為四路。今詳見州域形勢說下。倣此。最後建燕山路。而宋以亡。金

初亦分河北為東西路。廢主亮定都于燕。因改置中都等路。蒙古初置燕京路。至元四年定都于此。改大都路置中書省。統山東西及河北地。明洪武九年置北平等處。承宣布政使司。永樂元年建北京。稱為十

八年始定都焉。改布政司為直隸。洪熙初復稱行在。正統六年定為京師。統府八州二屬州十七縣一百二十六。總為

里三千二百有奇。夏秋二稅。大約六十萬一千一百五十二石有奇。而衛所參列其中。

順天府屬州五 縣二十二

大興縣附郭 宛平縣附郭 良鄉縣 固安縣 永清縣 東安縣 香河縣

通州屬縣四

三河縣 武清縣 漷縣 寶坻縣

霸州屬縣三

文安縣 大城縣 保定縣

涿州屬縣一

房山縣

昌平州屬縣三

順義縣 懷柔縣 密雲縣

薊州屬縣四

玉田縣 豐潤縣 遵化縣 平谷縣

保定府屬州三 縣十七

清苑縣附郭 滿城縣 安肅縣 定興縣 新城縣 雄縣 容城縣 唐縣

慶都縣 博野縣 蠡縣 完縣

祁州屬縣二

深澤縣 束鹿縣

安州屬縣二

高陽縣 新安縣

易州屬縣一

涿水縣

河間府屬州二 縣十六

河間縣附郭 獻縣 阜城縣 肅寧縣 任邱縣 交河縣 青縣 興濟縣

靜海縣 寧津縣

景州屬縣三

吳橋縣 東光縣 故城縣

滄州屬縣三

南皮縣 鹽山縣 慶雲縣

真定府屬州五 縣二十七

真定縣附郭 井陘縣 獲鹿縣 元氏縣 靈壽縣 藁城縣 欒城縣

無極縣 平山縣 阜平縣

定州屬縣三

新樂縣

曲陽縣

行唐縣

冀州屬縣四

南宮縣

新河縣

棗強縣

武邑縣

晉州屬縣三

安平縣

饒陽縣

武強縣

趙州屬縣六

栢鄉縣

隆平縣

高邑縣

臨城縣

贊皇縣

寧縣

深州屬縣一

衡水縣

順德府屬縣九

邢臺縣附郭

沙河縣

南和縣

任縣

內邱縣

唐山縣

平鄉縣

鉅鹿縣

廣宗縣

廣平府屬縣九

永年縣附郭 曲周縣

肥鄉縣

雞澤縣

廣平縣

成安縣

威縣

邯鄲縣

清河縣

大名府屬州一 縣十

元城縣附郭 大名縣

魏縣

南樂縣

清豐縣

內黃縣

濬縣

滑縣

開州屬縣二

長垣縣 東明縣

永平府屬州一 縣五

盧龍縣附郭 遷安縣

撫寧縣

昌黎縣

灤州屬縣一

樂亭縣

直隸延慶州屬縣一

永寧縣

萬全都指揮使司屬衛十五 所三

宣府左衛

附郭又有宣府右衛前衛及興和所俱在郭內。

萬全左衛

萬全右衛

懷安衛

又保安右衛在郭內。

懷來衛

又延慶右衛在郭內。

開平衛

龍門衛

蔚州延慶左永寧保安四衛別見。

龍門所

廣昌美峪二所別見。長安嶺。鵬鶚赤城雲州馬營五堡附見。

舊開平衛附

舊大寧衛附

東濱海。

自山海關以南與遼東接界。天津衛以南與山東接界。皆大海也。

南控三齊。

燕齊地界相錯。由京師走山東德州七百里而近。楚、粵、江、浙、閩、海之趨京師者。皆以山東爲梯航之會。西阻太行。

太行中分冀州之界。圍環數千里。唐宋河北、河東皆以太行爲限蔽。北屆沙漠。

幽州之地。控帶沙漠。明初列戍漠南。鎖鑰深固。後防維日壞。無復初制矣。其名山則有恆山。

恆山亦曰常山。亦曰北嶽。在真定府定州曲陽縣西北百四十里。亘保定府以西。及山西大同府東境。保定府志。府境自唐縣以北。接於易州。皆恆山也。山 舜典。歲十一月。朔巡狩。至于北岳。禹貢。太行恆山。周禮職方

并州。其山鎮曰常山。爾雅。恆山爲北岳。祠典五岳之一也。

水經注謂之元岳。

史記趙世家。趙簡子告諸子曰。吾藏

寶符於常山上。諸子馳之常山上。求無所得。毋恤還曰。已得符矣。簡子曰。奏之。曰。從常山上臨代。代可取也。又楚世家。張儀說楚曰。秦地半天下。席捲常山之險。必折天下之脊。燕世家。燕聽張儀計。願獻常山之尾五城於秦。漢天漢二年。祠常山。瘞元玉。後漢初平四年。袁紹與黑山賊張燕等戰於常山。建安三年。紹攻公孫瓚於易京。見雄縣瓚欲將突騎出。倖西山。擁黑山之衆。不果。西山即恆山。黑山在今濬縣西北。張燕等聚衆於此。依西山爲險。天

文志。恆山。辰星鎮焉。晉建興四年。恆山崩。義熙五年。恆山又崩。太元十一年。丁零翟真餘黨鮮于乞保曲陽西山。聞

慕容垂南略地。時垂都中山。乃出營望都。今慶都縣。爲慕容麟所敗。二十一年。慕容垂自將伐拓跋珪。引兵密發。踰

青嶺。徑天門。鑿山通道。出敵不意。逕指雲中。青嶺即恆嶺。天門亦曰鐵門。今爲倒馬關。隆安初。拓跋珪圍中山。燕慕容麟作亂。自

中山出奔西山。依丁零餘衆。二年。拓跋珪自鄴還中山。將北歸。發卒萬人。治直道。自望都鐵關。鑿恆嶺

至代五百餘里。劉伯莊曰。即倒馬關路也。義熙十三年。北魏將叔孫建擊丁零翟蜀洛支等於西山。平之。劉宋永初三

年。北魏主嗣謀侵宋。將諸國兵南出天關。即天門也。踰恆嶺。元嘉五年。定州丁零鮮于臺陽等二千餘家。叛

入西山。北魏將叔孫建復討降之。二十年。北魏主燾自平城如恆山之陽。隋大業四年。祠恆岳。唐武德五年。突厥寇定州。總管雙士洛擊敗之於恆山南。五代周顯德六年。將復關南之地。詔義武帥孫行友捍西山路。使漢不得越西山。以合契丹也。行友因引兵拔契丹之易州。地記。恆山北臨代。南俯趙。東接河海之間。天下形

勝處也。唐十道志。河北名山曰常岳。常水出焉。括地志。北岳別名華陽臺。自上曲陽縣西北行四百五十里。得常山。吸號飛狐口。北則代郡也。名山記。恆山高三千九百丈。上方三千里。有大元泉。其山有五名。一曰蘭臺府。二曰列女宮。三曰華陽臺。四曰紫微宮。五曰太乙宮。又北岳記。恆山頂一名無恤臺。

以趙襄子嘗登此觀代國。下瞰東海也。地志云。恆山高侵霄漢。頂名天峯嶺。下建北岳觀。觀前風出如虎吼。名虎風口。其餘峯巖洞壑。隨地立名者。以數百計。中山志。中山西北二百里。有狼山。自狼山

而西南連常山。山谷深險。漢末。黑山張燕。五代孫方簡兄弟。皆依阻其地。沈括曰。北岳恆山。一名大茂

山。宋以大茂山脊與契丹分界。胡氏曰。自恆山至代。有飛狐之口。倒馬之關。夏屋。廣昌。五回之險。夏屋見山

西代州。廣昌見山西。廣昌縣。五回見易州。夫恆山挺峙於冀州之中。爲東西屏蔽。巖谷高深。道路阻險。出奇者所必由也。

太行。

太行山亦曰西山。在順天府西三十里。志云：太行首起河內，北至幽州，今由廣平、順德、真定、保定之西，回環至京都之北，引而東直抵海岸，延袤二千餘里，皆太行也。從鎮澤、定、潞諸州而言，則曰山東西，自燕雲諸州而言，則曰山前後。石晉以山前後十六州入於契丹，爲中原之禍者數百年，蓋太行隔絕東西，實今古之大防。州軍鎮戍，沿山錯列，憑高控險，難於突犯，亦謂之燕山。河北所恃以爲固者也。志勝云：今界內諸山，凡強形巨勢，爭奇競險，拱翼畿甸者，皆太行之支峯別阜耳。又太行凡八陁，其在河北者有四，曰井陘、曰飛狐、曰蒲陰、曰軍都。餘詳見河南名山太行。

碣石。

碣石山在永平府昌黎縣西北二十里。禹貢：夾右碣石入于河。又云：太行恆山。至于碣石，蓋河北之大山也。戰國策：蘇秦曰：燕南有碣石、雁門之饒。山海經：碣石之山，灑水出焉，東流注於河。史記：秦始皇三十二年之碣石，刻碣石門。

壞城郭，決通隄防。二世元年，東行郡縣，刻碣石，並燕南至會稽。漢武帝元封元年，東巡海上，至碣石，北魏主濬太安三年，東巡登碣石，望滄海，改碣石山爲樂遊山。北齊主高洋天保四年，破契丹，還至營州，登碣石山，臨滄海。後周大象初，發山東民修長城，立亭障，西自雁門，東至碣石。唐十道志：河北道名山曰碣石。孔穎達曰：碣石在平州東，離海三十里，遠望其山，穹窿似冢，有石特出山頂，其形如柱，當卽禹

貢之碣石。

爾雅釋名。碣石者。碣然而立。在海旁也。水經注。碣石山在驪成縣西南。枕海有石如甬道數十里。當山頂有巨石如柱形。立於巨海中。莫知深淺。世謂之天橋柱。舊在河口海濱。歷世既久。爲水所漸。淪入於海。去岸五百里。漢平帝時。司空掾王

橫言。昔天嘗連北風。海水溢。西南出浸數百里。故

張君云。碣石淪在海中。班固亦云。商碣周移也。

武后萬歲登封初。契丹酋帥李盡忠。孫萬榮作亂。據營州。進圍

檀州。遣將軍曹仁師等擊之。戰於碣石谷。唐兵大敗。明年。王孝傑與孫萬榮戰於東碣石。契丹兵退。孝傑追之。行背懸崖。契丹回兵薄之。孝傑敗沒。唐志。平州有東西碣石。二成。碣石卽碣石之訛也。又武后末。唐休璟練習邊事。自碣石以西。踰四鎮。綿亙萬里。山川要害。皆能紀之。通釋曰。碣石凡有三。鄒衍如燕。燕昭王館之。碣石宮。身親往師之。此碣石特宮名耳。在薊縣東二十里寧臺之東。非山也。秦築長城。起自碣石。此碣石在高麗界中。亦謂之左碣石。

杜佑曰。秦長城所起之碣石。在漢樂浪郡遂城縣地。今猶有長城遺址。東截遼水入高麗。隋大業八年。伐高麗。分遣趙孝才出碣石道是也。

其在平州界內者。卽古大河入海處。爲禹貢之碣石。亦曰右碣石。元金仁山亦云。碣石有左右二山。此皆傳譌也。郭造卿云。今昌黎縣北十里有仙人臺。卽碣石頂也。其臺崇廣。絕壑萬仞。仰凌霄漢。回視邊塞。俱在眉睫間。又有一巨石。形如甕鼓。疑卽所稱天橋柱。昔人謂碣石淪在海中。似未然也。

其大川則有桑乾河。

桑乾河。源出山西馬邑縣西北十五里洪濤山。

亦名累頭山。灑水出焉。即桑乾河上源也。漢志注謂之治水。治讀曰除。水經注謂之濕水。又謂之索涓水。

東流經大同

府南山、陰縣、應州、渾源州之北。又東流經廣靈縣及蔚州北境。入直隸保安州界。經州西南。出西山。至

順天府西南。曰盧溝河。俗呼小黃河。以其流濁而易淤也。亦謂之渾河。出盧溝橋下。東南流為看丹口。

或誤為燕丹口。元史作

分二派。一東流。至通州南高麗莊

在州西南十三里。稍東南即張家灣也。

合白河。一南流。經良鄉縣東。固

安縣西。為巨馬河。與霸州界河合。東流經永清縣及東安縣南。至武清縣小直沽。達於海。後漢建武十

三年。王霸治飛狐道。陳委輸事。從濕水漕。以省陸輓之勞。即此也。漢志注。治水過郡六。

雁門代郡。上谷。涿郡。廣陽。漁陽。行

千一百里。又桑乾水入幽州境。亦謂之南桑乾水。隋煬帝大業七年。伐高麗。宜社於南桑乾水上。是也。

宋宣和四年。童貫侵遼。遣劉延慶等出雄州。至良鄉。為遼所敗。降將郭藥師請奇兵。夜半逾盧溝。襲燕

京。入迎春門。以軍無後繼。不能克。延慶營於盧溝橋。潰還。遼人追至涿水而去。乾道六年。金人議開盧

溝河。以通京師漕運。自金口河導至京城。北入濠。又東至通州。北入潞水。既而以地峻水濁。不堪舟楫。

漕渠竟不成。元致和元年。上都諸王忽刺臺等入紫荆關。游兵進逼盧溝橋。為燕帖木兒所敗。遁去。盧

溝蓋京師南面之巨塹也。

志云。渾河流濁勢盛。自大興而東南。入東安。武清界。金元時。皆修築堤岸。以防潰決。綿亘三四百里。而武清崩圯尤甚。每費修塞。有明隄防之役。亦常不乏焉。

滹沱河。

滹沱河源出山西繁峙縣東北百二十里之大戲山。由繁峙縣折而西南流。經代州東南。又西南經崞縣。忻州及定襄縣東。復折而東南流。經五臺縣南。孟縣北。又東入直隸真定府平山縣界。經縣北。又東經靈壽縣及真定府城南。歷藁城縣北。趨晉州城南。繞保定府東鹿縣南。又過安平縣南。達深州北。復東出饒陽縣北。歷河間府獻縣南。交河縣北。入青縣界。至縣東南岔河口。合於衛河。東北流至靜海縣小直沽。入於海。周禮職方并州。川曰虓池。虓池讀曰呼馳。禮記。晉人將有事於河。必先滹沱。是也。亦謂之惡池。戰

國策。趙攻中山。以擅滹沱。漢志注。虓沱過郡六。

代郡。太原。真定。常山。鉅鹿。勃海。

行千三百七十里。更始二年。世祖自下曲

陽

見晉州。

馳至滹沱渡河。所謂倉卒滹沱河麥飯也。建武十三年。以匈奴寇邊。遣馬武屯滹沱河以備之。

建安中。曹操自饒陽北引滹沱河為平虜渠。後魏時。冀州刺史王質以滹沱河流屈曲。疏而直之。又刺史楊真請改滹沱河為清寧河。唐六典。河北大川曰滹沱。自安史之亂。滹沱南北。常為戰爭之所。五代

時契丹南牧。晉人每禦之於滹沱。宋咸平中。何承矩築隄儲水。以限戎馬。則引滹沱爲塘泊。蓋滹沱橫亘於河北。燕趙有事。滹沱上下。皆津渡處矣。

衛河。

衛河源出河南輝縣西北七里之蘇門山。東流經新鄉縣北。過衛輝府城北一里。又東北入北直大名府濬縣境。謂之白溝。淇水入焉。亦謂之宿胥瀆。志云。衛水。小水也。後漢建安九年。曹操於淇水口下大枋木。遏淇水。東入白溝。是時。淇水入大河。故操遏使東北流。以便漕運。衛河乃附淇水而東。淇水見河南淇縣。隋

大業四年。又引白溝爲永濟渠。亦曰御河。自是衛河專有御河之名。而淇水之名遂掩。今衛河由濬縣經內黃縣北。魏縣東南。又經大名府城南。東北流。與故屯氏河相接。屯氏河亦名王莽河。歷山東東昌府館陶縣西。

漳河合焉。又東北流至臨清州西。與元人所開會通河合。流濁勢盛。漕河得此。始無淺澁之虞。由此歷武城縣及恩縣之西。至北直故城縣南。又東北歷山東德州西。又北歷直隸景州東境。吳橋縣西境。過東光縣西。交河縣東。南皮縣西。又北抵滄州西。及興濟縣西。又北至青縣南岔河口。而合於滹沱。又北至靜海縣。與霸州文安縣接界。引而東達天津衛。又東百里而入於海。曲折幾二千里。此衛河之大略。

也。宋時黃河北流，往往浸溢衛河，屢費修塞。元初，漕舟涉江，淮入河，至於封邱。河南開封府屬縣。陸運一百八十

里，至淇門。今衛輝府淇縣。入於御河，達於京師，蓋用衛河之全也。國家復濬會通河，乃用衛河之半云。詳見川

瀆漕河。

易水。

易水源出保定府易州西山谷中。漢志注：易水出故安縣閻鄉。水經注亦云：易水出故安縣閻鄉西山，故安即今易州也。顏師古曰：閻縣在故安西，入廣昌縣界。周禮職方，并州浸

涑。易戰國策，蘇秦曰：燕南有滹沱，易水。又云：趙之攻燕也，渡滹沱，涉易水，不至四五日而距國都矣。史

記：燕太子丹使荆軻刺秦王，祖道易水上。又始皇二十年，秦軍破燕，易水之西。漢志：易水東至范陽，入

濡。一云至范陽，入涑。漢范陽縣在今易州東南六十里。建安十一年，曹操伐烏桓，還至易水，上郡、代郡、烏桓皆來賀。晉永

安初，幽州都督王浚入鄴，還至易水，以所將鮮卑多掠鄴中婦女，命敢有挾藏者斬。於是沉於易水者

八千人。二年，石勒襲浚，至易水，督護孫緯欲拒戰，勒給浚至薊，奉戴浚信之，因禁諸將勿擊。勒遂滅浚，

還渡易水，緯遮擊之，勒僅免。唐光化三年，汴將張存敬攻定州，幽州帥劉仁恭遣子守光救之，軍於易

水上存敬襲擊守光殺獲甚衆。

此易水蓋安州以東之南易水。

朱梁乾化二年。晉將周德威伐燕。劉守光東出飛狐。與鎮

定軍會於易水。進下祁溝關。

此易水蓋即易州境之北易水。祁溝關見涿州。

樂史云。易水有三源。流經易州南三十里者。曰中易水。

出州西北三十里窮獨山者。謂之濡水。亦曰北易水。出州西南六十里石獸岡者。謂之雹水。

一作鮑水。

亦曰

南易水。中易水流經定興縣西。亦謂之白溝河。涑水縣之拒馬河流合焉。

拒馬河即涑水。漢志所云東入涑者也。自是易水兼有白溝河拒馬河之

名。宋人引之與遼分界。於是又有界河之名。

又東經安肅縣北及容城縣北。濡水流合焉。

所謂北易水也。

又經新城縣南。亦曰拒馬河。歷雄

縣北及順天府霸州之北。

良鄉縣之琉璃河。固安縣之盧溝支河。皆流合焉。

又東經東安縣及永清縣南。

宋霸州治永清。時拒馬河經縣北。金元時始徙流縣南。

入武

清縣之三角淀。又東南至小直沽。與衛河合。達於海。此易水之東出者也。其南易水

即雹水也。

自安肅容城

縣南。又東南經安州北曹河、徐河、石橋河。一畝泉河、滋河、沙河、鴉兒河、唐河。與易水共爲九河。合成一

川。統名爲易水。東至雄縣南。亦名瓦濟河。又東歷河間府任邱縣北。霸州之保定縣。文安縣南。引而東

合於滹沱。同注於海。此易水之別出而東南流者也。蓋易水之源。並出於易州。而其流自不相亂。或曰

易水。或曰故安河。則推其本而言之也。或曰拒馬河。或曰白溝河。則從其流而言之也。其於南易水。或曰滋河。或曰沙河。唐河。則因其所匯合之川言之也。宋何承矩議引易水爲塘埭。謂旣可以限敵騎。又可以利耕屯。然自宋人引水作塘之後。而川流之故道益亂矣。或曰易水本無正流。附合支川。以達於海。故自漢以來。言易水之源流者。多未得其詳云。

漳水。

漳水有二源。濁漳水出山西長子縣西五十里之發鳩山。地理志謂之鹿谷山。經潞安府西南二十里。東北流。歷襄

垣。潞城。平順縣北。黎城縣南。入河南彰德府林縣境。過縣北。至臨漳縣西。而合於清漳。清漳水出山西

樂平縣西南二十里之少山。地理志謂之大黿谷。入遼州和順縣。經縣西。至州東南。又歷潞安府黎城縣東北。入彰

德府涉縣南境。過磁州南。至臨漳縣西。而合於濁漳。此漳水之上流。歷久不變者也。自是而下。雖決徙不常。然大抵分爲兩途。其一爲漳之經流。禹貢所稱橫漳者也。由臨漳縣東北入直隸廣平府境。經成安縣南。廣平肥鄉縣北。至曲周縣西。又東北歷雞澤縣。更合沙。洺。諸水。入順德府平鄉縣境。杜佑曰。洺水縣南有衡漳。

濱。禹貢。覃懷底績。至於衛漳。蓋謂此洺水。今威縣也。漳水嘗由此東北過順德府廣宗縣東。入眞定府冀州界。

又北至南和縣西。合於灋河。

舊流自平鄉縣東。又北經廣宗縣西。鉅鹿縣東。而北注於大陸澤。近代決徙不

常。遂今灋河而注於大陸。

經任縣東。至趙州隆平縣東北。匯於大陸澤。又經寧晉縣南。又東過新河縣及南宮縣北。冀

州西北。又經深州之南。衡水縣及武邑縣之北。又經武強縣東。而入河間府阜城縣西北境。又東經交河縣南。合於滹沱。或謂之衡水。或謂之枯泔水。或謂之葫蘆河。或謂之長蘆河。其實皆漳水也。通釋。漳

水舊從德州長河縣

今見河間府景州。

東北流。經瀛州平舒縣。

今霸州大成縣。

入於河。周定王五年。河徙而南。故漳水不

入河。而自達於海。夫陵谷變遷。誠難意測。今漳水附滹沱而入海。不自達海也。其一爲漳河之支流。從臨漳縣東入直隸大名府魏縣界。經縣南。分新舊二漳。歷府城西。東北流入山東東昌府館陶縣西境。而合於衛河。漳濁衛清。衛得漳流始盛。而水亦濁。過臨清西。而合運河。運河弱而衛強。於是設閘於河口。以防夏秋潦溢之患。運船至此。謂之出口。東北達於天津。由小直沽入海。自元以來。類資漳河爲轉輸之助。故經流日就湮塞。間或從臨漳挾滏水東北出。議者鯁鯁然憂之。恐衛流漸弱。不足以濟運也。志云。河間府東光縣城西有濁漳水。由東昌府之恩縣。入景州之故城縣界。又經吳橋縣東。復北流入

東光縣合於衛河。此卽漳衛合流之水。隨時散溢者。今湮塞已久。非漳河正流也。萬歷初。漳河嘗北徙。由魏縣入曲周縣之滏陽河。而館陶之流幾絕。是後臨漳濬縣。內黃魏縣之境。往往決塞不時。蓋水流淤濁之故也。大抵經流盛則支流衰。支流盛則經流竭。消長有時。而臨漳已下。漳水已合爲一。志或言清。或言濁者。不過參錯言之。非合流之後。又有二漳水也。清漳合濁漳以後。清者亦爲濁所奪。故通典多言濁漳。夫橫漳之稱。肇於禹

貢。職方冀州。其川漳。戰國策。蘇秦言秦甲渡河踰漳。據番吾。見真定府平山縣。則兵必戰於邯鄲之下矣。張儀曰。

秦趙戰於河漳之上。再戰而趙再勝。至於史起鑿渠以富國。曹公導流以通漕。皆漳水也。詳見河南彰德府。漢志

注。漳水過郡五。上黨。魏郡。清河。信都。勃海。行千六百八十里。唐十道志。河北大川曰漳水。

灤河。

灤河源出宣府衛西百三十里之炭山。東北流經雲州堡北六十里。馬營堡南二十餘里。又北流經廢桓州南。入舊開平衛境。東南流。經古北口邊外小興州東。又東南與邊外九道流河及諸小水合。勢始大。由薊州遵化縣東北團亭寨入內地。經永平府遷安縣東。至府西。合於漆河。又經灤州東。至樂亭縣

南入於海。自源徂流，橫互於北境，蓋千有餘里。水經注：濡水自塞外來，過令支、肥如、海陽等縣，入於海。

濡水卽灤水也。

濡乃官反，音與灤同，亦謂之灤水。

晉元康五年，鮮于拓跋祿官分其國爲三部，一居上谷之北，濡源之西。

卽今宣府以西地也。義熙三年，北魏主珪北巡至濡源，自是以後，往往爲巡行頓舍之處。十三年，魏主嗣遣將延普渡濡水，擊叛將庫偁官斌，斬之，進攻燕令支。劉宋元嘉六年，魏主燾大破柔然高車，徙降附之衆於漠南，東至濡源，西暨五原、陰山，三千里中，使之耕牧，而收其貢賦。九年，魏主燾至濡水，遣將奚斤發民兵，運攻具出南道，會和龍以伐北燕，括地志：灤水導流深遠，爲幽平之外塹。北使錄：灤水闊不盈丈，而中甚深，兩岸柳條叢生，秋時採爲箭箠，彝人以河水青綠急流，呼曰商都。此謂今開平廢衛以東之灤河。元至

元二十八年，議疏濬灤河，漕運上都。大德五年，灤水漲溢，平州城郭俱被其患。

元人亦謂灤河曰御河。元史延慶四年，上都城南御河西北岸

圯，開平縣亦言東關灤河水漲衝損北岸，議脩築之。

泰定二年，永平路復請築堤，以防灤水。三年，上都言灤水嚙堤，請及時修治，蓋灤

水源高流迅，易於決溢，自開平棄而灤河中流，遂屬荒外，倘狡焉者爲壅塞之謀，平灤一帶，能不以沉溺爲慮哉。

其重險則有井陘。

井陘關在真定府獲鹿縣西十里。山西平定州東九十里。呂氏春秋。天下九塞。井陘其一。亦曰土門關。地記。太行八陘。其第五陘曰土門關。今山勢自西南而東北。層巒疊嶺。參差環列。方數百里。至井陘縣東北五十里曰陘山。穆天子傳。謂之劔山。其山四面高平。中下如井。故曰井陘。燕趙之間。亦謂山脊爲陘也。徐廣曰。

陘。山絕之名。趙武靈王二十年。使趙希并將胡代。趙與之陘。蓋并將胡代。趙之兵。與諸軍向井陘之側也。始皇十八年。王翦攻趙。下井陘。二十七年。始皇死。行。遂從井陘抵九原。二世二年。趙王武臣使李良略太原。至石邑。秦兵塞井陘。未能前。漢三年。命韓信。張耳。東下井陘。擊趙。趙聚兵井陘口。廣武君李左車謂陳餘曰。信耳乘勝遠鬪。其鋒不可當。今井陘之道。車不得方軌。騎不得成列。其勢糧食必在後。願假臣奇兵三萬。從間道絕其輜重。足下深溝高壘。勿與戰。彼前不得鬪。退不得返。野無所掠。不十日而兩將之頭。可致麾下。否則必爲二子所擒矣。餘不聽。信遂下井陘。斬陳餘。漢志亦謂之石研關。上黨三關之一也。研讀曰。刑。關。蓋與上黨連界。晉太元十八年。慕容垂自中山伐西燕。遣慕容瓚等分道出井陘。攻晉陽。二十一年。拓跋珪伐後燕。潛自晉陽開韓信故道。遂出井陘。趨中山。北魏主濬興光二年。丁零數千家匿井

涇山中爲盜。陸真討平之。魏主翊武泰初。葛榮據有冀定以北。秀容會長爾朱榮。請帥所部自井陘以北。滏口以西。滏口見河南武安縣分據險要。攻其肘腋。遂勒兵召集義勇。北捍馬邑。東塞井陘。普泰初。高歡舉兵信

都。爾朱兆自晉陽出井陘。趣殷州。即今趙州歡擊敗之於廣阿。見隆平縣明年。爾朱兆復攻高歡於鄴。敗保晉陽。

歡尋自鄴引兵入滏口。遣別將庫狄干入井陘擊兆。兆北走。宇文周建德五年。克齊晉陽。齊高孝珩請以幽州兵入土門。趣并州。隋仁壽末。漢王諒舉兵并州。分遣其將劉建出井陘。略燕趙。詔李子胡發幽州兵擊卻之。唐十道志。河北道名山曰井陘。武德三年。竇建德南渡河。救王世充於洛陽。詔并州總管

劉世讓出土門。趣洛州。時建德都洛州調露初。突厥降部叛。寇定州。詔將軍曹懷舜屯井陘以備之。天寶末。安

祿山叛。遣養子安忠志軍土門。既又使其將李欽湊守井陘口。代忠志守也以備西來諸軍。會常山太守顏

杲卿起兵殺欽。湊聲言朝廷已遣大軍下井陘。河北諸郡皆響應。未幾。常山爲賊將史思明所陷。河東帥李光弼出井陘。遂復常山。朔方帥郭子儀復自井陘東出。與光弼合。軍聲大振。既而聞潼關陷。見陝西重

險。光弼等乃復入井陘。留兵守常山。諸將懼力不敵。遣宗仙運請於信都太守烏承恩曰。常山北控燕

冀路通河洛。有井陘之險。足以扼其咽喉。莫若移據常山而守之。承恩不能用。寶應初。徵回紇兵討史朝義於洛陽。藥子昂奉詔勞回紇於忻州。見山西請回紇自土門略邢。洛。衛。懷而南。不從。會昌四年。發諸

道兵討澤潞。太原兵乘間作亂。詔別將王逢自榆社還軍討之。榆社見山西而命成德帥王元逵自土門入。

應接逢軍。景福二年。李克用敗鎮冀兵於平山。進下井陘。尋引還。光化二年。朱全忠將葛從周救魏博。

破幽州兵。乘勢自土門攻河東。拔承天軍。承天軍見真定縣五年。全忠侵河東。使葛從周以兗。鄆及成德軍入。自

土門趨晉陽。又別將白奉會成德兵。亦自井陘入。拔承天軍。梁開平四年。全忠謀并鎮定。鎮定請救於

晉。晉王存勗命周德威引兵出井陘。屯趙州以拒梁兵。後唐清泰末。契丹圍晉安峇。見山西陽曲縣盧龍帥趙

德鈞請自土門路西援。石晉末。契丹入汴。分軍自土門西寇河東。既而契丹北還。劉知遠稱帝於晉陽。

進羣臣議進取。諸將咸請出師井陘。攻取鎮魏。先定河北。則河南拱手自服矣。周顯德六年。命李重進

自土門擊北漢。敗北漢兵於栢井。見陽曲縣宋太平興國中。車駕自太原幸常山。由土門路。靖康元年。种師

閔及金幹離不戰於井陘。敗績。幹離不遂入天威軍。陷真定。元至正十八年。劉福通之黨關先生等大

掠晉冀分軍四出。察罕勒重兵屯列要隘。塞井陘。杜太行。擊卻之。明初取元都。亦自真定而西入井陘。下平定州。見山西蓋太行爲控扼之要。井陘又當出入之衝。今特設官軍戍守。

渝關。

渝關一名臨渝關。

漢志注。渝音喻。

亦曰臨閭關。

唐志。渝關一名臨閭關。

今名山海關。在永平府撫寧縣東百里。遼東廣寧前

屯衛西七十里。

近志。舊渝關在撫寧縣東二十里。明初徐達將兵至此。以其非控扼之要。移建於舊渝關東六十里。按通典。通釋並云。渝關在平州盧龍縣東百八十里。則關實隋唐以來故址也。詳見撫寧縣。

北倚崇山。南

臨大海。相距不過數里。實爲險要。隋開皇三年。城渝關。十八年。命漢王諒將兵伐高麗。出臨渝關。值水潦。餽運不繼而還。大業九年。楊玄感叛。李密謂玄感曰。天子出征。遠在遼外。據臨渝之險。扼其咽喉。可不戰擒也。

隋志。盧龍縣有臨渝宮。大業十年。復議伐高麗。至臨渝宮是也。

唐貞觀十九年。征高麗。還自臨渝。開元二十年。契丹可突干叛。幽

州道副總管郭英傑屯於渝關外。爲可突干所敗。天寶十五載。安祿山叛。平盧帥劉客奴挈地來歸。尋遣先鋒使董秦襲渝關。入北平。唐志。柳城西四百八十里。有渝關。守捉城。所謂盧龍之險也。天復三年。契丹阿保機遣其將阿鉢寇渝關。劉仁恭子守光戍平州。誘執之。五代梁乾化中。渝關爲契丹所取。薛

居正曰。渝關三面皆海。北連陸。自渝關北至進牛口。舊置八防禦兵。募土兵守之。契丹不敢輕入寇。晉王存勗取幽州。使周德威為節度使。而德威恃勇。不修邊備。遂失渝關之險。契丹芻牧於營平二州間。大為中國患。歐陽修曰。渝關東臨海。北有兔耳。覆舟山。山皆斗絕。並海東北有路。狹僅通車。其傍可耕植。唐置東硤石。西硤石。舊志東西二硤石。蓋因碣石山麓而名。綠疇。米磚。長楊。黃花。紫蒙。白狼城以扼之。新唐書。又有溫溝。白望。及昌黎。遼西共十二戍。後

唐清泰末。趙德鈞鎮盧龍。即幽州。石敬瑭以太原叛。求援於契丹。耶律德光許之。其母述律后曰。若盧龍

軍北向渝關。亟須引還。太原不可救也。蓋渝關控據形要。制臨蕃戎。實為天險。幽平之間。以五關為形勝。而渝關又其最也。宋宣和末。建燕山路。而渝關為女真所得。覆敗不旋踵焉。金國節要云。燕山之地。

易州西北。乃金坡關。今名紫荆關。昌平之西。乃居庸關。順州之北。順州。今順義縣。乃古北關。景州東北。景州。今遵化縣。乃松亭

關。平州之東。乃渝關。渝關。金人來路也。自雄州。今保定府雄縣。東至渝關。並無保障。沃野千里。北限大山。重岡

複嶺。中五關。惟居庸。渝關。可通餉饋。松亭。金坡。古北。止通人馬。不可行車。其山之南。則五穀。良材。良木。無所不有。出關未數里。則地皆鹵瘠。蓋天設之險。宋若盡得諸關。則燕山一路可保矣。金人既據平州。

則關內之地。蕃漢雜處。故幹離不遂。自平州入寇。此當時議割地者。不明地理之悞也。志云。渝關下有渝水通海。自關東北循海有道。道狹纔數尺。僅通一軌。傍皆亂山。高峻不可越。

宋白曰。渝關西皆亂山。至進牛棚。凡六口。棚戍相接。此天

所以限中外也。明初以其倚山面海。名曰山海關。築城置衛。爲邊郡之咽喉。京師之保障。

居庸

居庸關在順天府昌平州西北二十四里。延慶州東南五十里。關門南北相距四十里。

今有南口。北口。兩千戶所。兩山

夾峙。下有巨澗。懸崖峭壁。稱爲絕險。地理志。居庸塞東連盧龍。碣石。西屬太行。常山。實天下之險。有鐵門關。呂氏春秋。淮南子。皆曰。天下九塞。居庸其一也。亦謂之軍都關。地記。太行八陁。其第八陁爲軍都。酈道元曰。居庸關在上谷沮陽城東南六十里。軍都在居庸之南。絕谷壘石。崇墉峻壁。山岫層深。側道褊狹。林鄣邃險。路才容軌。

胡氏曰。漢志。上谷郡有軍都。居庸兩縣。蓋縣各有關。按蘇林注。但言居庸有關。而都軍則否。蓋北魏時曾分置兩關耳。

唐志。幽州昌平縣北十五里

有軍都。陁縣西北三十五里。爲居庸關。亦謂之軍都關。又居庸關亦名納款關。

通典。北齊改居庸關爲納款關。唐志亦稱居庸爲納款。

又名薊門關。

唐十道志。居庸關亦名薊門關。

而居庸軍都。其通稱也。後漢初。更始使者入上谷。耿况迎之於居庸關。建武

十五年遷代。上谷諸郡民於居庸關以東。安帝元初五年。鮮卑犯塞。屢寇上谷。建光初。復寇居庸關。初

平四年。幽州牧劉虞遣掾田疇奉章詣長安。疇以道路阻絕。願以私行。乃自選家客二十騎。上西關出

塞傍北山。直趨朔方。循間道至長安致命。西關即居庸也。胡氏曰。疇蓋由居庸歷陰山而西。既而劉虞討其部將公孫瓚。

為所敗。北奔居庸。瓚追攻之。城陷。東晉咸康六年。石虎積穀樂安城。見永平府盧龍縣。欲擊慕容皝。皝曰。虎以樂

安城防守重複。冀城南北。必不設備。今若詭路出其不意。可盡破也。遂帥諸軍入蠡螭塞。直抵薊城。破

武遂津。見保定府安肅縣。入高陽。今縣。大掠而還。永和六年。慕容雋使慕容霸將兵二萬。自東道出徒河。見廢大寧衛。慕

容輿自西道出蠡螭塞。雋自中道出盧龍塞。又太元十年。慕容垂初復燕。遣慕容農出蠡螭塞。歷凡城。

趣龍城。討叛將餘巖於令支。凡城等俱見廢大寧衛。蠡螭。或曰即居庸音轉耳。二十一年。拓跋珪大舉伐後燕。分遣

其將封真等。從東道出軍都。襲幽州。北魏孝昌初。杜洛周反於上谷。圍燕州。五代志。幽州治昌平。即今昌平州也。幽州刺史

常景與都督元譚討之。自盧龍塞至軍都關。皆置兵守險。譚出屯居庸關。既而安州。今密雲縣。石離等戍。石離

戍見薊州平谷縣

反應洛周洛周自松喇赴之

松喇亦見平谷縣

常景使別將崔仲哲屯軍都關以邀之戰沒居庸亦潰又

關之南口亦曰幽州下口北齊高洋天保七年北巡至達速兒嶺

或曰在山西朔州塞外

行視山川險要將起長城

既而發民築長城自幽州下口西至恆州九百餘里

水經注濕餘水出沮陽縣東南流出關謂之下口北齊書譌為夏口

唐會昌初幽州軍亂雄

武軍使張仲武起兵擊之

雄武見薊州

遣軍吏吳仲舒詣京師言狀李德裕虞其不克仲舒曰幽州糧食皆

在媯州及北邊七鎮

七鎮見密雲縣

萬一未能入則據居庸關絕其糧道幽州自困矣

五年詔毀天下寺並勒僧尼歸俗五臺僧多奔幽州李德裕以責幽

州帥張仲武乃封二刀付居庸關曰有遊僧入境則斬之

景福二年幽州將劉仁恭戍蔚州引兵還襲幽州至居庸敗奔河東乾寧元年

李克用擊幽州拔武州新州進攻媯州李匡籌發兵馳救出居庸關為克用所敗幽州遂入於河東五

代梁乾化三年劉守光據幽州晉王存勗使劉光濬攻之克古北口燕居庸關使胡令圭等遂奔晉宋

宣和四年金人謀取燕京遼人以勁兵守居庸金兵至關崖石自崩戍卒多壓死遂潰金人度關而南

入燕京嘉定二年蒙古攻金至古北口金兵保居庸不得入蒙古主乃留可忒薄察等頓兵拒守而自

以衆趣紫荆關。拔涿、易二州。轉自南口攻居庸。破之。出北口。與可忒薄察軍合。二年。蒙古薄宣平。

見宣府鎮

萬全左衛。克縉山。

今延慶府。

遊兵至居庸關。守將棄關遁。蒙古兵克之。遊奕至都城下。襲金羣牧監。驅其馬而還。

元致和元年。元主歿於上都。大都留守平章政事燕帖木兒起兵。迎立懷王圖帖睦爾於江陵。遣其弟

撒敦守居庸關。唐其勢守古北口。既而上都諸王襲破居庸關。遊兵至大口。

今長鄉縣北之天津口。

天歷初。詔居庸

關壘石爲固。調丁壯守之。至正二十四年。李羅帖木兒遣兵犯關。亦入自居庸。

元史初。居庸立南北口屯軍。徵巡盜賊。各設千戶所。至大四年。

樞密院奏居庸關古道四十有三。今軍吏防守處。僅十有三。舊置千戶。位輕責重。於是改千戶所爲萬戶所。增置屯軍於東西四十三處。設十千戶所。立隆鎮。上萬戶以統之。皇慶初。始改隆鎮衛親軍都指使司。延祐三年。又增置千戶所。隸焉。

明初既定

元都。洪武二年。大將軍達壘石爲城。

即今南口城也。

以壯幽燕門戶。

三年。徙山後諸州之民於關內。於居庸關立守禦千戶所。

及靖難兵起。燕王

曰。居庸關路狹而險。北平之噤喉也。百人守之。萬夫莫窺。必據此。乃可無北顧憂。永樂二年。置衛。

時立隆慶

衛及隆慶左衛於此。宣德元年。徙隆慶左衛於永寧縣。而關獨有隆慶衛。

領千戶所五。以爲京師北面之固。

自是北邊告警。居庸倒馬。紫荆。以迄天壽山。湖川。白。羊。口。並爲戍守要地。景泰初。英宗車駕還至。

居庸。又正德十三年。幸昌平。至居庸關。既遂數出居庸。

說者曰。居庸東去。有松林數百里。中間間道。騎行可一人。謂之札八兒道。即元

太祖問計於札八兒。從此趨南口者。

元史太祖攻居庸不能下。問計於札八兒。對曰。從此而北。黑樹林中有間道。騎行可一人。若勒兵啣枚以出。終夕可至。太祖乃令札八兒輕騎前導。自暮入谷。黎明已在平地。

疾趨南口。金人駭潰。

紫荆。倒馬。二關隘口多。守禦難徧。內達保定。真定。皆平夷曠衍。無高山大陵之限。騎兵便於馳

突。惟居庸重岡複嶺。關山嚴固。三關之守。居庸險而實易。

近時闖賊犯關。亦自宣府歷懷來入居庸。薄都下。嗚呼。地利果安在哉。

紫荆。

紫荆關在保定府易州西八十里。山西廣昌縣東北百里。路通宣府。大同。山谷崎嶇。易於控扼。自昔爲

戍守處。即太行蒲陰陁也。地記。太行八陁。第七陁爲蒲陰。或曰即古之五原關。

原一作阮。

漢陽朔三年。關東

大水。詔流民入函谷。天井。

見山西重險。

壺口。

謂龍門也。見山西河津縣。

五阮關者。勿苛留。後漢建武二十一年。烏桓爲寇。遣

馬援出五阮關。掩擊之。水經注謂之子莊關。易水與子莊溪水合。北出子莊關。是也。宋人謂之金坡關。

志云。以山多紫荆樹。因改今名。

崖壁峭矗。狀如列屏。爲易州之巨防。宋嘉定二年。蒙古攻居庸。金人北守。不能入。蒙古主

乃趣紫荆關。敗金兵於五回嶺。

亦見易州。

遂拔涿、易二州。遣別將自南口反攻居庸。破之。元人所謂勁卒擣

居庸。北拊其背。大軍出紫荆。南搯其吭。是也。致和初。上都諸王忽刺臺等入紫荆關。遊兵逼大都城。有

燕帖木兒敗之於盧溝橋。乃卻。明初。華雲龍言紫荆關蘆花山嶺尤爲要路。宜設千戶所守禦。從之。正

統末。親征也。先至大同。乃議旋師。諸將皆言宜從紫荆關入。王振不從。遂有土木之禍。未幾也。先自大

同入犯紫荆。擁上皇而南。從間道攻關。破之。進薄都城。爲官軍所敗。也。先遁去。其弟伯顏帖木兒復奉

上皇駕出紫荆關。天順三年。孛來等寇大同。直抵雁門。忻代詔帥臣顏彪、馮宗率兵屯紫荆。倒馬二關

爲聲援。旣而石亨欲以大同叛。嘗言據大同塞紫荆。京師何由得至哉。弘治四年。高銓言紫荆關之險。

實被拒馬河界破。若賊據其地。我軍戰守非宜。

拒馬河即易水。

河北有三里舖。地勢平展。可以駐劄。下視關城。

纖悉莫掩。請卽其地增築城堡。撥軍戍守。從之。自是備禦益密。十年。火篩自大同深入。分遣大臣戍守

居庸、紫荆。倒馬諸關口。正德九年。小王子入宣大塞。分遣兵守古北口及紫荆諸關。嘉靖三十二年。俺

答入大同。徑趣紫荆關。急攻插箭浮圖等峪。官軍拒卻之。

插箭浮圖見山西廣昌縣。

志云。紫荆與大同密邇。爲京師西

偏重地。向有舊關。明初撤而新之。城高池深。足稱雄固。當居庸、倒馬間。實爲輔車之勢。

倒馬。

倒馬關在真定府定州西北二百五十里。

志云在保定府唐縣西北百里。

山西廣昌縣南七十里。即戰國時鴻之塞也。戰

國策趙武靈王伐中山。取爽陽鴻之塞。史記作華陽鴟之塞。華陽蓋恆山別名。鴟徐廣曰當作鴻。亦曰

鴻上關。今謂之鴻城。在唐縣西北。博物志唐關在中人西北百里。

見唐縣。

或以為鴻上關。酈道元以為鴻

山關。漢時亦名常山關。後漢建武十五年徙雁門代郡。上谷民置常山關。居庸關以東。關當常山之嶺

道。故曰常山關。漢志代郡有常山關是也。晉太元中拓跋珪自鄴還中山。將北歸發卒治直道。自望都

鐵關鑿恆嶺至代。說者曰鐵關即故鴻上關。今為倒馬關路。又北魏武泰初定州為上谷賊杜洛周所

圍。刺史楊津請救於柔然。柔然前鋒至廣昌。賊塞隘口不能進而還。即此路也。沈括曰飛狐路在大茂

之西。自銀冶寨北出倒馬關。卻自石門冷水舖入瓶形。枚回兩寨間也。

瓶形今平刑關也。見山西繁峙縣。其相近有故枚回寨。

可至代

州。胡三省曰括所稱代州。蓋謂雁門自此亦可至漢之代郡。但非直道。今自蔚州廣昌縣東南山南出

倒馬關。至中山上曲陽縣。關山險隘。實為深峭。石磴逶迤。沿途九曲。誠控扼要地也。宋嘉定十三年蒙

古木華黎至滿城。

今保定府屬縣。

使蒙古不花將兵出倒馬關。適金恆山公武仙遣將攻臺州。

今山西五臺縣。

不花與

之遇。敗之。既而引兵趣倒馬關。金人遂以真定降。說者謂真定之安危。視倒馬之得喪也。三關攷。倒馬關有二城。稍北者爲上城。南者爲下城。相去三里許。山路崎嶇。按轡徐行。庶無銜檠之患。故以倒馬爲名。國家以雁門、寧武、偏頭爲外三關。而居庸、紫荆、倒馬爲內三關。西偏有警。必分列戍守於此。

外三關詳見山西代

州及崞縣河曲縣

正德八年。由大同入犯寧武及倒馬關。諸將拒卻之。蓋在京師肘腋間。備不可不豫。慮不可不密也。

按直隸雄峙東北。關山險阻。所以隔閔奚戎。藩屏中夏。說者曰。滄海環其東。太行擁其右。漳衛襟帶於南。居庸鎖鑰於北。幽燕形勝。實甲天下。又曰。文皇起自幽燕。奠涿鹿而撫軒轅之阪。勒擒狐而空老上之庭。前襟漕河。北枕大漠。川歸穀走。開三面以來。八表之梯航。奮武揆文。執長策以扼九州之吭背。秦晉爲之唇齒。而斥堠無驚。江淮貢其困輸。而資儲有備。魚鹽棗栗。多於瀛海碣石之間。突騎折衝。近在。上谷漁陽之境。修耕屯而塘泊之利可興。振師干而開寧之疆在握。此真撫御六合之宏規也。然而居庸當陵寢之旁。古北在肘腋之下。渝關一線。爲遼海之噤喉。紫荆片壘。係燕雲之保障。近在百里之間。遠不過二三百里之外。藩籬疎薄。肩背單寒。老成謀國者。早已切切憂之。而不僅此也。九原雲中。制我

上游之命。李鄴侯靈武之謀。欲並塞北出犄角以取范陽。蓋地勢形便。川原斥鹵。馳驟易達也。三齊爲我南屏。而輓輸數百萬。皆假道於此。設有脫巾挺刃之徒。乘間而起。則京師之大命。倒懸於山左矣。可勿爲意外之虞乎。嗟夫。中外之勢。千古大防也。勃碣之間。自古爲都會矣。特以密邇疆索。引弓之徒。猶狃於塞外者。不惟一族。故制馭之道。爲尤切焉。富氏弼曰。河北一路。爲天下根本。燕薊之北。有松亭關。古北口。居庸關。此中原險要。所恃以隔絕匈奴者也。呂氏中曰。燕薊不收。則河北不固。河北不固。則河南不可高枕而臥。澶淵之役。寇準欲邀契丹稱臣。且獻幽薊地。曰。如此。可保百年無事。不然。數十年後。戎且生心矣。真宗不從。及女真取燕山。遂成靖康之禍。

讀史方輿紀要

卷十一

直隸二

順天府。

東至永平府五百二十里。南至河間府四百十里。西至保定府易州二百十四里。北至延慶州百七十里。東南至天津衛三百三十里。西南至保定府三百三十里。西北至萬全都指揮使司三百五十里。東北至古北口二百四十里。自順天府治至南京

二千五百五十里。

禹貢冀州地。其在顓頊時曰幽陵。帝堯時曰幽都。帝舜時爲幽州地。夏商時皆爲冀州地。周亦置幽州。

春秋戰國時爲燕國。秦爲上谷、漁陽二郡地。漢初爲燕國。又分置涿郡。見下元鳳初改燕國爲廣陽郡。

涿州。

本始初更爲廣陽國。東漢省廣陽入上谷。永平八年復置廣陽郡。三國魏改爲燕郡。

郡治薊。又幽州亦治此。魏晉皆因之。

晉

爲燕國。

晉建興二年石勒入薊。執幽州都督王浚。以故尚書劉翰行幽州刺史。翰以幽州入於段匹磾。其後復并於石勒。

慕容雋嘗都此。

其後苻堅慕容垂代有其地。

後魏亦爲燕郡。兼置

幽州北齊於幽州置東北道行臺。後周亦置燕郡兼立總管府於幽州。隋初郡廢仍曰幽州。仍置總管府。大業初府廢。

大業初改曰涿郡。唐初復爲幽州。初置總管府。尋爲大都督府。天寶初曰范陽郡。范陽節度使治此。上元中。史朝義僞改郡爲燕京。乾元初復爲幽

州。亦爲盧龍節度使治。李懷仙等據其地。亦曰幽州節度。詳見州域形勢說。後倣此。唐末爲劉仁恭所據。後唐亦曰幽州。石晉初歸於契丹。改爲南京

幽都府。又改爲燕京析津府。遼志初亦曰盧龍軍。開泰元年改爲永安軍。宋宣和四年得其地。改爲燕山府。金仍曰燕京析津府。

廢。主亮改曰中都大興府。蒙古初爲燕京路。至元初建中都。九年改爲大都。而大興府仍舊。二十一年

始改爲大都路。明初曰北平府。永樂初建北京。七年改北平爲順天府。今領州五。縣二十二。

府關山險峻。川澤流通。據天下之脊。控華夏之防。鉅勢強形。號稱天府。召公初封於此。享祚八百年。關

國千餘里。自漢以後。幽燕皆爲巨鎮。光武資其兵力。克復漢祚。其後慕容皝竊據於此。遂兼河北。唐之

中葉。漁陽倡亂。藩鎮之患。實與唐室相終始。石晉以燕雲入契丹。出帝之禍。不旋踵焉。宋爭燕雲。而力

不能保也。靖康之辱。復蹈石晉之轍矣。自契丹女真。以及蒙古。相繼都燕。而中原受控御者。垂數百年。

金梁襄言。燕都地處雄要。北倚山險。南壓區夏。若坐堂皇。而俯視庭宇也。又居庸古北。松亭諸關。東西

千里險峻相連。近在都畿。據守尤易。元木華黎曰。幽燕之地。龍蟠虎踞。形勢雄偉。南控江淮。北連朔漠。駐蹕之所。非燕不可。至明成祖。分藩於燕。遂因以奄有九服。或者曰。燕都北倚邊塞。南通齊趙。誠用武之地。但飛芻輓粟。必寄命於數千百里之外。似非完策。元虞集嘗言。京師之東。瀕海數千里。北極遼海。南連青齊。萑葦之場也。而海潮日至。淤爲沃壤。宜用南人法築堤。捍水爲田。召富民耕種。三年而征其稅。可以衛京師。可以防島夷。可以省海運矣。至正十二年。脫脫爲相。因宗其說。議立分司農司。西自西山。南至保定。河間。北抵檀順。東及遷民鎮。遷民鎮見遼東廣寧前屯衛。皆設法耕屯。未幾復罷。明朝徐貞明言。京東諸

州邑。皆負山控海。負山則泉深而土澤。控海則潮淤而壤沃。自密雲以東至薊州永平之境。河泉流注。疏渠溉田。爲力甚易。而豐潤境內瀕海之田。幾二百里。與吳越沃區相埒。國家據上游以控六合。而遠資東南數千里難繼之餉。近棄可耕之田爲污萊沮澤。豈計之得者乎。

今京城。遼金元以來故都也。舊志。遼太宗耶律德光升幽州爲南京。亦曰燕京。改築都城。其地在今城西南內爲皇城。周七里一百三步。遼志。大內在西南隅。皇城内。宮門曰宣教。後改曰元和。有門五。正南曰南端門。左爲左掖門。後改萬春門。

右爲右掖門。後改千秋門。西曰顯西門。設而不開。北曰子北門。外爲都城。周三十六里。有門八。東曰安東。迎春。南

曰開陽、丹鳳、西曰顯西、清晉、北曰通天、拱辰、金廢主完顏亮改燕京為中都，命增廣都城。其內城周九里，三步，南門曰通

天門。大定五年。又改曰應天門。有門十三，東曰施仁，曰宣曜，曰陽春，南曰景風，曰豐宜，曰端禮，西曰麗澤，曰顯華，曰彰義。

北曰會城，曰通元。金大安三年，蒙古遊奕至都城下。金主命朮虎高琪屯通元門，即此。曰崇智，曰光泰。又有廣陽門，金大安三年，命將分屯彰義、廣陽二門，或曰廣陽門，即陽春門也。元至元初。

謂之中都。四年，於舊城東北改築都城，亦建皇城於其中。都城方六十里，有門十一，正南曰麗正，南之

右曰順承，南之左曰文明，北之東曰安貞，北之西曰健德，正東曰崇仁，東之右曰齊化。明初取元都，自齊化門入。東之

左曰光熙。至正二十四年，李維帖木兒自大同遣兵犯闕，太子愛猷識理達臘戰不勝，出光熙門東走古北口。正西曰和義，西之右曰肅清，西之左曰平則。九年，名

曰大都城。至正十九年，十一門皆築。明初改置北平布政使司，永樂初，建為北京。四年，營建宮殿，百度惟新。

十八年，宮殿始成。乃繕治京城於內為宮城，周六里一十六步，亦曰紫禁城，南曰午門。亦曰承天門。東曰東華門，西曰

西華門，北曰元武門，宮城之外為皇城，周一十八里有奇，南曰大明門，曰長安左右門，東西曰東安、西

安門，北曰北安門，京城周圍四十里，為九門，南曰麗正門，今日正陽門。正統初改。南之左曰文明門，今日崇

文門。右曰順成門。今日宣武門。東之南曰齊化門。今日朝陽門。之北曰東直門。西之南曰平則門。今日阜成門。俱正統初改。之北曰西直門。舊名彰義門。正統末也。先薄京城。石亨敗之於此。北之東曰安定門。景泰元年。英宗回鑾。詔廷臣以次迎。餘四門仍舊。

迎於東。安門。之西曰德勝門。正統末也。先薄都城。于謙闖德勝門。軍城外即此。嘉靖二十三年。又築重城包京城南面。轉抱東西角樓。長

二十八里。為七門。南曰永定門。左安門。右安門。東曰廣渠門。東便門。西曰廣寧門。西便門。四十二年。又增修各門甕城。是後以時修治。所謂京邑翼翼。四方之極也。

大興縣。附郭。在城內東北隅。秦置薊縣。漢以後因之。州郡皆治此。遼改曰薊北縣。尋又改為析津縣。金貞元二年。改曰大興。今編戶三十六里。

宛平縣。附郭。在城內西北隅。本薊縣地。唐建中二年。析置幽都縣。遼開泰二年。改曰宛平。今編戶七十五里。

薊城。今府治東。古燕都也。記曰。武王克商。封帝堯之後于薊。其後燕并薊地。遂都於薊。以城西北有薊邱而名。秦始皇二十一年。王賁取燕薊城。因置薊縣。屢上谷郡。項羽封臧荼為燕王。都薊。漢盧綰亦封焉。後為廣陽國治。更始二年。光武以王郎新盛。北徇薊。其後為刺史治。自魏晉及唐。皆曰薊縣。州郡嘗治此。石晉初。沒於契丹。始改廢焉。元和志。薊城南北九里。東西七里。開十門。燕慕容儁都此。鑄銅為馬。城東南因有銅馬門之名。又舊唐書。幽都縣管郭下西界。建中二年。取羅城內廢燕州解署置。在府北一里。即今宛平縣治。

陰鄉廢縣

府西南二十五里。漢置陰鄉縣。屬廣陽國。後漢省。其遺址俗謂之籠火城。唐武德三年。竇建德遣將高士興擊羅藝於幽州。不克。退軍籠火城。藝襲擊大敗之。未幾復敗建德軍於籠火城。是也。○玉河廢縣。在府西四十里。本薊縣地。五代時劉仁恭置。遼志。仁恭於大安山創宮觀。師煉丹羽化之術於方士王若訥。因分薊縣置此縣。以供給之。遼亦爲玉河縣。今廢。

賓義廢縣

在府城內。唐貞觀初。置順州於營州南五柳戍。後寄治於幽州城內。天寶初。曰順義郡。乾元初。復曰順州。領賓義縣一。後廢。唐書。幽州管內有廣平縣。天寶初。分薊縣置。三載廢。至德以後。復分置。後又省入薊縣。

征北小城

在府東。或曰。卽後漢末公孫瓚所築。初平四年。瓚與幽州牧劉虞積不相能。瓚築小城於薊城東南居之。虞發兵討瓚。反爲所敗。晉置征北將軍。營治此。因名征北小城。建興三年。劉琨自太原奔段匹磾。時匹磾治薊。琨別屯征北小城。是也。

納降城

在府城西。唐會要。幽州城內有經略軍。有納降軍。本納降守捉城。故丁零川也。後置納降軍。使戍守於此。西南又有安寒軍。赫連城。又舊志。迴城在薊縣東。唐營州嘗寄治此。又有闔城。在府西南三十五里。亦曰關城。故城址在焉。○土城在府西北

八里。唐時戍軍頓舍處也。或曰元置。正統十四年。七先奉上皇車駕登土城。詔廷臣王復等出謁。卽此矣。

西山

府西三十里。太行山之別阜也。巍峨秀拔。拱峙畿右。稱爲名勝。稍北曰玉泉山。金章宗瓚嘗避暑於此。行宮故址在焉。其相近者曰香山。有香山寺。萬歷初。駕嘗幸此。志云。香山之東。接平坡山。其上平原百里。烟雲林樹。皆稱奇勝。成化中。車駕嘗幸此。其並峙者曰覺山。盧師山。又香山西南有五峯山。以五峯秀峙而名。自此而西山之得名者。凡數十處。皆西山也。○金山亦在府西三十里。亦曰甕山。其西有龍泉。匯而爲池。曰甕山泊。潛通大湖。又有臥龍岡。在府西北四十五里。正統間。車駕嘗幸此。又西五里。曰翠峯山。山形奇峭。其陰有橫嶺如列屏。曰遮風嶺。

仰山。府西七十里。峯巒拱峙。中有平頂。如蓮花心。旁列五峯。金主景嘗遊此。又潭柘山在府西八十里。山勢磅礴。連擁三峯。傍有二潭。潭上有古栢。因名。自西山諸峯。連綿而西。潭柘爲尤勝。○顏老山在府西北百九十里。山之西南有石青洞。東北有柳林水。

其相近者曰小龍口山。山有兩崖。東崖在清。

白口社。西崖在清水社。有泉東入盧溝河。

分水嶺。府西四十五里。山澗諸水至此。分而爲二。一入盧溝河。一入房山縣界。又十八盤嶺。在府西北八十里。其山縈曲。十有八折。○青山嶺。府西百五十里。山四面高聳。中坦平。多產杉漆諸藥。又摘星嶺。在府西二百餘里。高聳雲霄。僅通一徑。

薊邱。在舊燕城西北隅。古薊門也。戰國策。薊邱之植。植於汶篁。謂此。今有二土阜。林木蒼鬱。○龍頭岡。府西北四十五里。五代梁乾化二年。晉將周德威攻燕。擒劉守光將單廷珪於此。正統中。車駕嘗幸焉。舊志云。幽州東南有龍頭岡。誤。

盧溝河。府西四十里。自保安州流經西山中。東南出。地勢平而土脈疎。最易衝決。有劉師堰。魏劉靖所築。後廢。又東南爲白狼窩口。舊築堤於此。袤百六十餘丈。曰固安堤。又東分二流入通州及良鄉縣界。詳見大川桑乾河。

大通河。在府城東南。元史。至元二十八年。都水監郭守敬言水利。欲導昌平白浮村神山泉。西折南轉。過雙塔榆河。引一畝泉。玉泉。諸水。經甕山泊。至西水門入都城。環匯於積水潭。復東折而南。出南水門。東至通州高麗莊。入白河。共一百六十四里。有奇。

每十里置一牐。以時蓄洩。從之。二十九年。開大通河。明年成。亦曰通惠河。自是都民免陸輓之勞。公私稱便。歐陽元曰。通惠河首導昌平白浮之水。次循太行西山之麓。會諸山之流。爲七里泊。東流入都城西水門。匯積水潭。又東傍宮牆。環大內之左。合金水河。東折而南。出都城東水門。經大通橋。東流至通州城西北永通橋。又東會於白河。是也。河漕攷。元時。通惠河築堰。起白浮村。至青龍橋。長五十餘里。以障諸水入都城。明永樂四年。北京行部言。宛平。昌平。二縣。西湖景東牛欄莊及青龍華家甕山三閘。水衝決堤岸百六十丈。命發軍民修治。五年。復言。自西湖景東至通流。凡七閘。河道淤塞。自昌平東南白浮村。至西湖景東流水河口。一百里。宜增置十二閘。請以時修治。今並湮廢。又通州陸輓至都城。僅五十里。元人開運河。總計百六十里。置牐壩二十四所。然。

通州以西。雖有慶豐。文明。會川等閘。皆河流淺淤。而積水潭在禁城北。漕舟既集。亦無停泊之所。又分流入大內。然後南出。其啓閉蓄洩。非人所得專。故通惠河幾廢。嘉靖六年。始濬大通橋至通州城北之石壩。凡四十里。地勢高下四丈。修慶豐上下二閘。平津上中下三閘。又東爲普濟閘。以蓄水。造剝船。製布囊。盛米。遞相轉輸。以達都中。軍民稱便。俗謂之裏漕河。

高粱河。在府城西。自昌平州沙澗。東南流經高粱店。又東南流入都城積水潭。宋太宗伐遼。與遼將耶律沙等戰於高粱河。是也。金人亦謂之皂河。上有高粱橋。蒙古兵入居庸。至皂河。欲度高粱橋。爲金將胡沙虎所敗。水經注。高粱水至潞縣。注於潞河。今

大通河。蓋卽高
梁河下流也。

沙河。府北六十里。卽榆河也。志云。源出居庸河。至昌平舊縣南而伏。又南十餘里復出。流入宛平縣界。水經注謂之濕餘河。遼史作溫榆河。自府北合清河。東流入順義縣。下流會於白河。或曰沙河有二源。一出昌平州西南五十里龍泉寺。合西山諸泉東流。爲南沙河。一出昌平州西南之四家莊。逕雙塔村東流。爲北沙河。二河分流至沙河店。東南竇家莊。合爲一。入通州界。注於白河。沙河店在二河之間。故名。永樂十二年北征。駕次清河。明日次沙河。又明日次龍虎臺。是也。○玉河在府西。源出玉泉山。流注西湖。經大內。出都城。東南入大通河。亦謂之御河。

清河。府北二十里。源出昌平州一畝泉。流經雙塔店。合雙塔河入府境。東南流經此。又東會沙河入白河。一云源出玉泉山。分流北出。會於沙河。元至正二十四年。孛羅帖木兒鎮大同。與太子有隙。遣兵犯闕。入居庸關。兵至清河。太子東走。未幾。太子還宮。孛羅復犯闕。入居庸。太子率兵禦於清河。軍潰。遂南遁。

金口河

在府西三十五里東麻谷。即盧溝河東岸。金人於此分引盧溝河一支東流穿西山而出。以通漕運。下視都城高十四丈餘。金末恐暴漲爲害。塞之。元至元二年。郭守敬議按故迹開導。上致西山之利。下廣京畿之漕。又於金口西預開減水口。西南還大河。令深廣以防漲。水突入之患不果。至正二年。議者又欲於通州高麗莊開新河百十餘里。而放西山金口河。及引渾河之水。東流合御河。達通州。接引海運。至大都城輸納。脫脫從之。役夫萬餘人。開河置牓。許有壬言。渾河之水。湍悍易決。足以爲害。淤淺易塞。不可行舟。況西山水勢高峻。金時在城北入郊野。雖有衝決。爲害亦輕。今在都城西南。若霖潦漲溢。加以水性湍急。宗社所在。豈容僥倖。設或成功一時。亦不能保其永無衝決之患。不聽。河成。果水急泥壅。不可行舟。復罷之。

海子

志云。在宛平縣治西三里。舊名積水潭。凡西北諸泉入都城。皆匯於此。汪洋如海。因名。又有南海子。在京城南二十里。舊爲下馬飛放泊。內有按鷹臺。永樂十二年。增廣其地。周圍凡一萬八千六百六十丈。乃育養禽獸。種植蔬果之所。中有海子。大小凡三。其水四時不竭。一望瀾漫。因禁城北有海子。故別名爲南海子。正德十二年。獵於南海子。卽此。

太湖

府西南四十五里。廣袤十數畝。傍有二泉湧出。經冬不凍。東流爲洗馬溝。俗傳光武狗薊時。洗馬於此。○西湖在府西玉泉山下。玉泉之水。出石罅間。潏而爲池。廣三丈許。池東跨小橋。水經橋下。東流匯爲西湖。周十餘里。荷蒲菱芡。沙禽水鳥。稱爲佳勝。

車箱渠

在府西北。曹魏嘉平二年。劉靖督河北諸軍事。登梁山。觀水道源流。乃立壩於水。導高粱河。造戾陵壩。開車箱渠。依北岸立水門。景元二年。又遣謁者樊良更制水門。水流乘車箱渠。自薊西北逕昌平。東盡漁陽潞縣。凡所含潤。四五百里。灌田萬有餘頃。晉元康五年。靖子宏復修治之。水經注。高粱水首受濕水於戾陵壩。水北有梁山。山有燕刺王日陵。故以名壩。後廢。後魏正光二年。裴延儁刺幽州。案戾陵諸壩。廣袤三十里。表求修復。營造溉田甚廣。百姓賴之。

百泉溪

在府西南十里麗澤關。平地有泉十餘穴。匯而成溪。東南流爲柳村河。下流注於盧溝河。

七里泊

府西北三十五里。地名碾莊。自昌平州流經此。合高粱河。有青龍橋跨其上。又燕家泊在府西北二十五里。廣袤五十餘畝。東南流入府西十里之玉淵潭。亦曰丁家潭。○飛放泊在府東南。地名北成店。廣三十餘頃。又西有黃埃莊。飛放泊。

元福宮

府北三十二里。道出昌平。永樂以後。車駕巡幸。每爲駐頓之所。宏治十七年。置宮於此。俗呼回龍觀。又北十八里至沙河店。即昌平州之鞏華城也。○臨朔宮在府治西南。隋時置宮於此。大業七年。伐高麗。至涿郡。之臨朔宮。將發。又類上帝於宮南。

廢。尋

西苑

在皇城內。中有大液池。愛華島。又苑之東北有萬歲山。高聳明秀。蜿蜒磅礴。一名煤山。○御馬苑在京城外。鄭村壩等處。牧養御馬大小二十所。相距各三四里。繚以周垣。垣中有廐。垣外地甚平曠。自春至秋。百草繁茂。羣馬畜牧其間。生育蕃息。爲國家

利之

永平館

府南十里。一名碣石館。遼時朝士宴集處也。又望京館在府東北三十里。亦遼時所建。爲南北使餞息之所。宋王曾上契丹事。出燕京北門。至望京館。即此。沈括曰。幽州東北三十里有望京館。東行少北十餘里。出古長城。又二十里。至中頓。又踰孫

侯河。行二十里至順州。其北平斥土

厚宜稼。又東北行七十里。即檀州矣。

愍忠閣

府西南十五里。唐太宗征遼陽。憫忠義陣亡之士。建此閣。後爲愍忠寺。明朝改名觀音閣。又延壽寺亦在府西南。舊燕京城內。宋靖康二年。金幹離不規上皇。自青城由滑州至燕山。館於延壽寺。繼又規上皇及帝后。居愍忠寺。即此。

王平口

府西百二十里。中有百花陀。四圍皆山。中爲平川。約數十畝。地暖而肥。杉漆藥草多生焉。金主環嘗遊此。明初華雲龍言。自王平口西至易州西北五十里之官坐嶺。關隘有九。相去約五百餘里。俱衝要地。宜設兵屯守。是也。○安禮寨在府西南。宋

太宗時宋琪言安禮塞東瞰燕城。纔及一舍。此周德威取燕之路也。

盧溝橋。府西南三十五里。跨盧溝河上。洪濤東注。若迅雷奔馬。不可測識。橋爲往來之孔道。金明昌初所建。長二百餘步。名廣利橋。元至元十四年。命造過街塔於橋上。明正統中。崇禎初。皆嘗修治。元史。天歷初。上都兵入紫荆關。遊兵逼都城南。大都兵與戰於盧溝橋。敗之。明建文中。李景隆謀攻北平。燕將請守盧溝橋以禦之。燕王曰。彼方圖深入。舍此不守。彼必肆志。將受困於堅城之下。此兵法所謂利而誘之也。

黃金臺。府東南十六里。又北里許爲小黃金臺。燕昭王嘗於易水東南築臺。以延天下士。後人慕之。因築焉。○詭糧臺。府東南六里。相傳唐太宗征高麗時。嘗虛設困倉於此。以疑敵人。

鄭村壩。在府東二十里。建文初。李景隆攻北平。時燕王在大寧。景隆因結營於鄭村壩。以待其還。又平安攻北平。營於平村。距城五十里。平村亦在府東。

良鄉縣。府西南七十里。西至涿州七十里。東至通州武清縣百七十里。春秋時燕中都地。漢爲良鄉縣。屬涿郡。後漢因之。晉屬范陽國。後魏屬燕郡。北齊省入薊縣。尋復置。隋屬幽州。唐因之。聖歷元年。改爲固節縣。神龍初復故。舊治在涿州北四十里。五代唐長興三年。移治於此。今編戶二十五里。

廣陽城。縣東八里。漢縣。屬廣陽國。後漢建武初。封劉良爲侯邑。屬廣陽郡。晉屬范陽國。後魏屬燕郡。北齊省入薊縣。唐總章中。以新督徙部落於幽州境內。卽此。上元三年。史朝義自歸義東奔廣陽。此廣陽謂密雲郡之廢燕樂縣。後魏置廣陽郡於燕樂。故云。所謂歸義卽此城也。州尋廢。或曰。金廣陽鎮蓋置於此。

陽鄉鎮

在縣西北漢縣屬涿郡建武四年討彭寵祭遵屯良鄉劉喜屯陽鄉是也尋省晉置長鄉縣屬范陽國後魏因之魏收志作莫鄉高齊時廢

龍泉山

縣西十五里下有石龍口出泉不竭東流入鹽溝河○伏龍岡在縣西十里以形勢蜿蜒而名又遼石岡在縣治東三里志云岡有古城五座方圓棋布岡頂有多寶佛塔隋建金志作料石岡

盧溝河

縣東三十里自盧溝橋下分流經此又東南流入固安縣界

閻溝河

在縣南源出縣西北龍門關口東南流合於廣陽水五代史契丹數抄盧龍諸州境涿州運糧入幽州者輒伏兵於閻溝掠取之唐長興三年趙德鈞鎮盧龍城閻溝而戍之因移良鄉縣治焉自此糧運稍通一統志謂之鹽溝水○廣陽水在縣東

源出房山縣北三十里之公村經廣陽

故城下南流與鹽溝水合注於桑乾河

琉璃河

縣南四十里金史謂之劉李河舊志云即古聖水也自房山縣流經縣界至霸州入拒馬河元延祐四年於盧溝橋澤畔店琉璃河並置巡簡司即此○龍泉河在縣西源出房山縣大安山下西南流與琉璃河合河濱有金時盤寧宮故址又胡良

河亦在縣西源自房山經涿州東

北流入琉璃河金史謂之胡梁河

天津關

在縣北百餘里自北而西至易州涑水縣出大龍門凡十五關口中間差大者曰天門關口或云天津口一名大口宋嘉定六年蒙古鐵木真破金人瀛莫等州自大口逼中都又元致和元年上都諸王梁王王禪等襲破居庸遊兵至大口天歷二

年明宗和世㻋即位於和林北南還文宗圖帖睦爾迎之發京師明日至大口越二日次香水園又十九日次於上都之六十店所謂大口皆天津口也

固安縣

府西南百二十里。東至東安縣九十里。漢置方城縣。屬廣陽國。後漢屬涿郡。晉屬范陽國。後魏屬范陽郡。北齊廢。隋開皇八年。改置固安縣於此。屬幽州。唐武德四年。屬北義州。貞觀初。復屬幽州。大歷四年。改爲涿州。遼金因之。元屬霸州。又改屬大興府。

中統四年。升爲固安州。明

初復爲縣。編戶三十八里。

方城舊城

括地志。在今縣東南十七里。本燕舊邑。趙悼襄王初。李牧伐齊。取方城。韓非子。燕以河爲境。以薊爲國。襲涿方城。殘齊平山。是也。漢因置方城縣。曹魏封劉放爲侯邑。高齊時廢。劉昫曰。漢固安縣。卽今易州。隋開皇中。始改置於故方城。縣仍改

故曰固。唐武德四年。徙治章信城。貞觀二年。又移今治。西北去涿州九十里。是也。五代史。周世宗伐契丹。下關南瀛。莫二州。遣先鋒將劉重進先發。據固安。卽今縣治。

臨鄉城

在故方城縣南十里。漢縣屬涿郡。後漢省。劉昫曰。趙孝成王十九年。與燕易土。以臨樂與燕。卽此城也。城邑攷。縣西北有武陽城。相傳燕昭王所築。

桑乾河

縣西北二十里。自良鄉縣流經縣界。又東南流入東安縣境。合於拒馬河。志云。明正德中。桑乾河堤潰決。禾黍之場。悉爲巨浸。嘉靖初。徙流縣北十里。入永清縣界。雨潦浹旬。輒有衝決之患。

拒馬河

縣西南二十里。志云。盧溝河入縣境。復分流入霸州界。謂之拒馬河。或謂之安陽河。五代周顯德六年。世宗遣先鋒將劉重進據固安。自至安陽水作橋。謀取幽州。會有疾而還。又明建文時。燕王駐兵固安。渡拒馬河。卽此。

韓寨營

在縣南。或以爲古韓城也。水經注。方城故城東南有韓城。詩。倬彼韓城。燕師所完。鄭元曰。韓爲獫夷所逼。稍稍東遷也。王肅曰。涿郡方城縣有韓侯城。世謂之寒號城。非也。今爲韓寨營。又縣西南十八里有李牧將臺。一名雀臺。音譌也。

栗園

在縣界。括地志。固安之栗。天下稱之爲御栗。因有栗園。北魏孝昌三年。上谷賊杜洛周遣其黨曹紇真掠薊南。幽州刺史常景運遣將於榮擊破之於栗園。是也。

永清縣

府東南百七十里。西至東安縣三十里。漢置益昌縣。屬涿郡。後漢省。唐如意元年。分安次縣置武隆縣。屬幽州。景雲初。改爲會昌縣。天寶初。改曰永清。屬范陽郡。石晉時。沒於契丹。周世宗復取之。宋初爲霸州治。景祐二年。并入文安縣。金復置。今編戶二

里。十一

通澤廢縣

在縣西五里。隋大業七年置。屬涿郡。尋廢。

拒馬河

在縣南。自霸州流經東安縣境。又東入縣界。而注於武清縣之三角淀。卽盧溝河及易水之下流也。

東安縣

府東南百五十里。東北至灤縣百十里。本漢安次縣地。初屬燕國。後屬渤海郡。後漢屬廣陽郡。晉屬燕國。後魏仍屬燕郡。隋屬涿郡。唐屬幽州。元初屬霸州。中統四年。升爲東安州。屬大都路。明初復爲縣。編戶四十四里。

安次廢縣

在今縣西北。漢舊縣也。光武初。追破尤來。大槍諸賊於安次。卽此城。冢記。唐武德四年。移治石梁城。貞觀八年。又徙常道城。開元二十三年。又移耿就橋行市南。明洪武三年。避渾河水患。又移今治。志云。今縣西北去舊治二十六里。在渾河水

次。居民輳集。名舊州頭。以元置東安州也。

常道城

在舊州頭西五里。酈道元曰。故鄉亭也。三國魏燕王宇之子璜。封常道鄉公。甘露五年。司馬昭迎立之。又晉司空劉琨嘗守此。以拒石勒。北魏主宏封宇文英爲常道鄉公。皆此城也。魏收志。安次縣有故葺道城。○石梁城在舊州頭東南五十里。或

云南北朝時所置戍守城也。其地又有崧州城。相傳遼古喇王所置州。

盧溝河。在縣西。自固安縣流入境。元志。皇慶初。渾河水溢。決東安境內黃塌堤一十七所。是也。又東南合霸州之拒馬河。

易水。在縣南。舊易水過安次縣界。爲固安河。今與拒馬河同爲一川矣。又縣境有白祠溝。水。水經注。白祀溝出廣陽縣之婁城店。東南經常道城。西去良鄉城四十里。今堙。

東沽港。縣南五十八里。志云。自縣西渾河分流而東。入武清縣三角淀港。南有垂楊渡。下通河間府靜海縣。

盧王屯。在縣東。舊志。在常道鄉東南二十五里。漢初盧縮屯。軍與劉賈夾攻燕者。縮尋封燕王。因名曰盧王屯。

香河縣。府東南百二十里。北至通州三河縣六十里。西至灤縣四十里。本武清縣之孫村。遼於新倉置權鹽院。因居民聚集。遂置香河縣。屬析津府。金屬大興府。元初因之。後屬灤州。明初改今屬。編戶十里。

扳罾口河。在縣西。源出通州之孤山。麓。流經縣界。入於白河。

龍灣河。縣南四十里有大小龍灣。夏秋之際。二水合流。經寶坻縣界。入永平府昌黎縣之七里海。相傳遼時海運故道。又有百家灣河。在縣北。其水無源。四時不竭。

駱駝港。在縣北八里。自三河縣之兔兒山。流經縣界。下流入於白河。

附見

興州中屯衛

在良鄉縣治東。本在舊開平衛境。永樂四年移置於此。○營州前屯衛在香河縣治東。本在舊大寧衛境。永樂元年移置於此。

通州

府東四十里。東至薊州一百二十里。南至天津衛二百十里。西北至昌平州一百十里。

春秋時燕地。秦屬漁陽郡。兩漢因之。晉屬燕國。後魏仍屬漁陽郡。北齊時分置潞郡。

隋志作漁陽郡。

隋初郡廢

屬幽州。唐武德二年置元州。貞觀初州廢。仍屬幽州。遼因之。金天德二年改置通州。

取漕運通濟之義。

元因之。明

初以州治潞縣省入。

編戶三十二里。領縣四。

州控馭營平。屏蔽京邑。屹為襟要。五代唐長興中。趙德鈞節度幽州。以契丹數入寇。乃城潞河而戍之。近州之民始得耕稼。明初大兵由直沽下通州。元主遂北走。今為積儲重地。成化間議者

都督馬永建議。

以州

當東西北諸邊之中。且有倉場草場。可供豢牧。欲訓練重兵於此。隨宜徵調。以壯虎豹在山之勢。議雖不行。識者避之。嘉慶二十九年。俺答闌入古北口。掠懷柔。順義。憲臣王忬聞警。馳入通州。嚴津戍。焚薪芻。彼不得逞。蓋州當檀薊東下之衝。襟河為險。犄角近郊。形援易達。況轉輸數百萬。畢集於此。綢繆可

勿豫乎。

廢潞縣。

今州治。漢置縣。屬漁陽郡。後漢興平二年。劉虞從事鮮于輔等起兵報仇。破斬公孫瓚所置漁陽太守鄒升於潞北。即潞縣北也。晉屬燕國。後魏屬漁陽郡。隋屬涿州。唐初爲元州治。屬尋幽州。金爲通州治。明洪武初。省縣入州。城邑攷。州北三里有長城。相傳秦將蒙恬所築。五代唐趙德鈞鎮幽州。時契丹寇掠諸道。乃沿舊址城潞縣而戍之。元初。燹壞城郭。兵燹之後。祇編籬寨而已。明洪武元年。燕山侯孫興祖從大將軍徐達定通州。督軍士修之。始甃以磚石。周圍九里十三步。高四丈六尺。在潞河之西。因以潞水爲濠。又有新城在州西門外。景泰初所築。周七里有奇。中有西南二倉。蓋國家歲入東南漕運四百萬石。折十之三。貯於通倉。故爲城以屏蔽之。萬歷二十二年增修。志云。州舊城西南隅有佑勝教寺。內建浮屠十三層。高共四百尺。創於唐貞觀七年。歷五代遼金元而始成。爲州城之形勝。

平谷城。

在州北。漢置縣。屬漁陽郡。後漢建武初。光武遣十二將追破大槍。五幡於平谷。即此。縣仍屬漁陽郡。晉省。石趙復置。北魏太平真君七年。廢入潞縣。○安樂城在州西北。亦漢漁陽郡屬縣。更始初。吳漢爲安樂令。即此。後漢仍屬漁陽郡。曹魏景元四年。滅蜀。封後主禪爲安樂公。晉亦曰安樂縣。屬燕國。北魏太平真君十年。廢入潞縣。

孤山。

州東四十里。四面平曠。一峯獨秀。因名。靖難初。李景隆攻北平。燕王自大寧還至孤山。列陳於白河西。嘉靖中。曾俺答人犯。亦營此地。

白河。

州東二十里。源出宣府衛龍門所東滴水崖。東流入密雲縣北境之石塘嶺。過縣西入通州界。其支流亦從石塘嶺過懷柔縣西。順義縣東。入通州東境合焉。東南經漕縣。武清縣東。而入直沽。合衛河入海。一名潞河。亦曰沽水。水經注。鮑邱水出禦夷鎮。

北塞中俗謂之大榆河。南過潞縣。爲潞水。後漢建武二年。遣將鄧隆討彭寵於漁陽。隆軍潞水南。爲寵所敗。宇文周宣政初。幽州人盧昌期起兵據范陽。高寶寧時據和龍。引兵聲援。至潞水。昌期已爲周軍所平。乃還。唐武后萬歲通天二年。契丹孫萬榮作亂。寇掠河北諸州。旣而敗走潞水東。爲其下所殺。宋宣和六年。金幹離不舟平州破檀薊。至三河。郭藥師迎戰於白河。敗還。遂以燕山一路降金。明嘉靖二十九年。俺答自古北口闖入近境。都御史王忬馳至通州。收艚舟。議潞河西。勿使爲敵用。俺答屯河東二十里孤山。泖口。諸處沮水不得渡。是也。志云。河兩岸皆白沙。不生青草。故名。一統志。白河一名白遂河。

渾河。在州西南。自盧溝橋分流。經州南十五里。謂之張家灣。志云。張家灣以元時萬戶張瑄督海運至此而名。今東南運艘由直沽至河西務。凡百十里。又百三十里至張家灣。乃運入通州倉。官民舟航皆駢集於此。燕錄。白河至州東。折而迤西處曰張家灣。蓋盧溝河與白河會流處也。今置張家灣巡司於此。

通惠河。在州城西。卽大通河也。自京城東至州城南。會於白河。又南會直沽入海。凡二三百里。俱曰通惠河。元至元十七年。濬通州運河。卽此。今城西六里有永通橋。跨通惠河之上。正統十三年建。餘詳京城大通河。

金盞兒淀。州北二十五里。廣袤三頃。水上有花如金盞。因名。或云卽古夏謙澤。胡氏曰。夏謙澤在薊北二百餘里。

大通關。在州南張家灣之長店。百貨彙集處也。其相近有廣利關提舉司及鹽場批驗所。又舊城北門外有北關巡司。○虹橋在州南。元至正二十五年。孛羅帖木兒自大同引兵犯關。遂擅政也。速自永平勒兵西討。孛羅遣其黨姚伯顏不花拒之。至通州。河溢。乃營虹橋。以待也。速出不意。襲斬之。志云。州南三十里有宏仁橋。今置巡司於此。

高麗莊。在州西十二里。盧溝河所經。又州西二十里曰大黃莊。州西十里曰東留村。州東十里曰召里店。皆官軍巡哨處也。邊防攷。州境有烟墩五。曰召里店。烟郊。東留村。大黃莊。高麗莊。又有馬房八。俱在州北二三十里內。又草場三。曰崇教。鳴玉。花園。俱

在城西南十里內。又有和合驛。在州東南

三十五里。舊城東關外。又有潞河水馬驛。

三河縣。州東七十里。東至薊州七十里。本潞縣地。唐開元四年。分潞縣置三河縣。以地近七

渡鮑邱。臨洵。三水而名。屬幽州。十八年。改屬薊州。金改隸通州。今編戶三十五里。

三河城。舊城在今縣東三里。洵河南。被水衝廢。後唐長興三年。幽州帥趙德鈞於幽州東北百餘里。城三河縣。以通薊州運路。契丹

來爭擊却之。邊人恃以少安。城邑攷。今城即趙德鈞所改置。城方六里。濠闊三丈。深半之。嘉靖二十九年。俺答臨城下。知縣

張仁增高五尺。四十二年。辛愛夾城。

南掠。知縣劉文彬又增高五尺云。

臨洵城。在縣南。石趙所置。以臨洵水而名。亦曰臨渠城。晉永和六年。燕慕容霸伐趙。出徒河。收樂安。北平兵糧。與其主雋會於臨渠。即此城也。後魏廢。唐武德二年。置臨洵縣。屬元州。貞觀初省。新唐書。薊州有臨渠府。府兵所居也。時蓋置於此。徒河見廢大

寧衛樂安

見永平府。

華山。縣北三十里。一名兔兒山。即香河縣駱駝港之源也。其地又有石城。青梁。諸山口。○靈山在

縣北十五里。三面出泉。形勝記所謂北倚靈山者也。又縣東二十里曰段家嶺。在官道傍。

鮑邱河。在縣西南。即白河之別名也。自密雲縣流經通州

東境米莊村。又流經縣界。至寶坻縣境。合於洵河。

洵河

在縣北自薊州平谷縣流入縣境又東南流入寶坻縣界合於鮑邱河竹書梁惠成王十六年齊師及燕戰於洵水齊師遁或以爲即是水也又唐志縣北十二里有渠河塘西北六十里有孤山陂溉田三千頃渠河卽洵河之譌也

洳河

在縣西自密雲縣石城山流經縣境至縣東南入洵河嘉靖中有俺答突犯營於孤山洳口卽洳河之口也○七渡河在縣西北一名黃頰水源自順義縣黃頰峪流經縣界下流入於白河

泥窪鎮

縣西二十里有巡司又西十里曰夏店舊有五槐公館又西二十里烟郊店與通州接界有官兵戍守○唐會莊在縣境屯政攷縣多曠土宜耕屯有唐會莊爲昔時墾植之址

武清縣

州東南九十里又東南至天津衛百二十里東至寶坻縣九十里漢置雍奴縣隸漁陽郡後漢因之晉屬燕國後魏仍屬漁陽郡隋屬幽州唐因之天寶初改爲武清縣元屬滹州明初改今屬編戶二十八里

雍奴城

在縣東漢縣也後漢建武二年遣朱浮等討彭寵浮軍雍奴又光武封寇恂爲侯邑魏志張郃從擊袁譚於勃海圍雍奴大破之城邑攷唐改雍奴爲武清其舊城距白河十七里在今邱家莊南明初因水患移今治去舊城八里舊無城正德六年

羅賊變知縣陳希文始築土垣爲固嘉靖二十二年改築土城隆慶三年發以磚石卽今城也

泉州城

縣東南四十里漢縣屬漁陽郡後漢因之晉屬燕國北魏太平眞君七年廢入雍奴縣志云縣西南三十里有長城故址延袤數百里相傳戰國時燕所築

白河

縣東三十五里卽運河也北接灤縣南達天津元志云盧溝河與白河合流潰決爲害至大二年決縣境皇甫村延祐初決劉家莊皆興役修塞

泉州渠

在縣南建安十二年曹操將擊烏桓鑿平虜渠泉州渠以通運操紀云鑿渠自呼沱入派水名平虜渠又從河河口鑿入潞河名泉州渠以通海派音孤或曰卽直沽也洵音句水經注洵水出無終縣西山西北流過平谷縣而東南流又南流入潞

河又東合泉州渠口。操所鑿也。渠東至遼西郡海陽縣樂安亭南。與濡水合而入海。陽縣樂安。今見永平府。

三角淀

在縣南周迴二百餘里。卽古雍奴水也。水經注。雍奴者藪澤之名。四面有水曰雍。不流曰奴。其源曰范蠡口。王家沱河。掘河。越深河。劉道口河。魚兒里河。皆聚於此。東會於直沽港。入於海。一名筍溝水。

直沽

縣東南百二十里。衛河。白河。丁字沽。合流於此。又東南四十里名海口。通典謂之三會海口。元延祐三年。於此置海清鎮。明天順二年。議自小直沽鑿河四十里達薊州。以免海運。每三年一濬。尋罷。志曰。大河以北之水。多從直沽入海。此卽古者九河入海之處。地勢卑下。一遇霖潦。直與海平。昔人嘗欲因其填淤。置稻田以足賦。今府境諸水。類以直沽爲壑。有小直沽巡司。○清沽港在縣南八十里。西接安沽港。東合丁字沽。入於海。丁字沽以三水會流如丁字也。沽東南去天津六十里。

河西務

縣東北三十里。自元以來。皆爲漕運要途。元史。至元二十五年。置漕運司於此。領接海運。明初。大軍由直沽敗元人於河西務。今爲商民攢聚。舟航輻輳之地。設戶部分司駐焉。隆慶六年。築城環之。可以守禦。有河西驛。并置巡司於此。

楊村驛

縣南五十里。輿程記。楊村而東二十里。爲桃花口。又二十里。爲丁字沽。由楊村而西北四十里。爲黃家務。又三十里。爲河西務。皆運道所經也。明建文三年。平安敗燕兵於楊村。進攻通州不克。宣德初。駕征高煦。駐於楊村。卽此。舊有巡司。今革管河

通判駐於此。○楊青驛在縣東南一百五十里。舊置驛并遞運所於此。嘉靖十九年。改置於天津衛。今屬河間府靜海縣。志云。縣南百里。又有韓家樹河泊所。今亦廢。

新莊

在縣西南八里。亦運河所經。今爲新莊鋪。元志。縣有北王村莊。劉邢莊及永興。廣賦諸屯。俱並渾河堤岸。修塞不一。又縣有八里莊。正德中。賊劉六等作亂。官軍擊之於八里莊。敗績。

霍堡

在縣西。唐武德初。竇建德攻幽州。不克。乃分兵掠霍堡及雍奴等縣。爲幽州總管羅藝所敗。堡蓋居人霍氏所築。以自固處也。又馬百戶屯。在縣西南十五里。又縣北三十里有灑水店。皆爲往來孔道。

灤縣。州南四十五里。南至武清縣七十里。漢泉州縣地。遼初爲灤陰鎮。後升爲灤陰縣。以在灤河之南也。元至元十三年。灤州屬大都路。明初復爲縣。改今屬。編戶十五里。本朝順治十六年。裁併通州。

白河。縣東四里。自通州流至此。又東南入武清縣境。志云。白河濱有長陵營馬頭店。白浮圈。曹家莊。諸堤鋪。皆運河必經之道也。

灤河。在縣西。一名新河。自盧溝河分流至縣界。析而爲三。其正河爲灤河。東入白河。其一爲新莊河。南流入武清縣界。其一爲黃汭河。東注馬家莊之飛放泊。各去縣十里。

延芳淀。在縣西。廣數百畝。中多菱芡。鴛雁之屬。遼時每春季則弋獵於此。

得仁務。縣南二十五里。又縣東十二里有兩家店。皆官道所經也。○瞭鷹臺。在縣西南二十五里。高數丈。周一頃。元時遊獵多駐於此。

棗林。在縣西北。元致和元年。上都兵破通州。燕帖木兒與戰於檀子山之棗林。敗之。至正十八年。山東賊田貴等攻灤州。至棗林。敗元兵。遂略柳林。逼畿甸。檀子山。或曰縣境小阜也。○柳林。在縣西。元至元十八年。如灤州。又如柳林。是後皆以柳林爲遊畋之

地。建行宮於此。

寶坻縣。州東南百二十里。北至薊州九十里。南至天津衛百六十里。漢泉州縣地。後唐於此置鹽倉。金初爲新倉鎮。大定十二年。置寶坻縣。承安三年。升爲盈州。尋復爲寶坻縣。以境內產鹽而名。元隸大都路。明初改今屬。編戶三十二里。

秦城。縣南十里。相傳秦始皇并燕。築城置戍。唐太宗征高麗。嘗駐驛焉。又縣東南有梁城。志云。唐末劉仁恭所築。劉守光爲燕王。曾屯兵於此。卽今梁城所也。○三叉城。在縣東北。唐志。檀州有三叉城。蓋置於縣之三叉口。

潮河。在縣東二十里。一名白龍港。其上源一自遵化縣之梨河。一自三河縣之沙河。鮑邱河。至縣界三叉口合流。亦曰纒運河。東南入於海。志云。縣治東北有渠河。自香河縣來。蓋洵水經香河縣。而後東入縣界。故縣有渠陽之稱。

柳沽河。縣東北三十里。玉田縣之水。匯流入縣境。曰柳濱河。下流注於白龍港。又縣東南有草頭湖。遵化豐潤縣境之水。流入縣界。溢而爲湖。俱匯潮河入海。

紅心堤。志云。在縣東南二百里。逼近海口。相傳秦始皇所築。潮水雖滿。而堤不沒。

朱家莊。在縣西十里。又西十里。有崔家莊。皆當往來通道。又楊家莊。亦在縣西。近時官軍嘗敗賊於此。○王甫營。在縣北三十里。又縣北八里有橋頭店。縣東南百二十里有黃沽店。俱官軍巡戍處。

駐馬臺。縣南五里。金主璽曾駐於此。一名歇馬臺。志云。縣東南百六十里有將臺。五代時燕劉守光所置。亦名盧臺。今有盧臺巡司。

附

通州衛。在州治南。建文四年。成祖置衛於此。又有左右二衛。俱永樂中建。

神武中衛。亦在州治南。建文二年。燕王所置。又有定邊衛。在州治西南。則建文四年所置。○興州後屯衛。在三河縣治西。永樂二年。改建於此。又營州後屯衛。在縣治東南。亦永樂二年建。又武清衛。在武清縣治東。永樂四年建。

梁城守禦千戶所。在寶坻縣東南百四十里。建文二年。燕王於故梁城置。

霸州。府南二十里。東至天津衛二百六十里。南至河間府二百里。西至保定府二百七十里。

春秋時燕地。秦屬上谷郡。漢屬勃海郡。後漢屬廣陽郡。晉屬章武國。後魏屬章武郡。隋初屬瀛州。大業

初屬河間郡。唐初屬幽州。天寶初屬范陽郡。五代石晉時入於契丹。周世宗收復。始置霸州。為重鎮。宋

亦曰霸州。治文安縣。郡名永清。金元仍舊。改治益津縣。明初以州治益津縣省入。仍曰霸州。編戶三十一里。今因之。領縣三。

霸州倚神京之重地。控瀛海之要衝。作鎮屏藩。東西聯絡。自周世宗收復關南。而河北之民稍安。宋修

其制。增戍浚塘。白溝帶水。儼然天塹。州處畿輔間。實據堂奧以內之勢。此形之似緩而實切者也。

益津廢縣。今州治。唐為永清縣地。置益津關於此。後沒於契丹。五代周顯德六年收復。因置霸州。治文安縣。關屬焉。宋因之。金大定二十九年。始置益津縣。徙州治此。元亦為霸州治。明初省。志云。州城相傳燕昭王所築。宋將楊延朗增修。又州南關有古

城址。相傳趙武靈王築。皆傳訛也。城邑攷。州舊有土墉。蓋金元時所築。明宏

治中始磚甃北面。正德中復修完三面。嘉靖十九年增修。城周六里有奇。

信安城。州東五十里。唐置淤口關。後沒於契丹。周世宗收復。置淤口寨。宋太平興國六年。置破虜軍。景德二年。改信安軍。金大定七年。降為信安縣。屬霸州。元光初。升為鎮安府。元府縣俱廢。志云。信安東三十里有狼臧城。又十里為忻城。宋將楊延朗屯兵

拒契丹於此。○平曲城在州東三十里。寰宇記。漢景帝六年。隴西太守

公孫渾邪封平曲侯。即此城也。括地志云。平曲城在瀛州文安縣北。

莫金山

州南十八里。相傳以莫金二姓居此而名。宋設莫金口寨於此。俗名口頭村。○臺山在州東三十里。舊為九河所經。臺基有三。如鼎峙。又東南五里有雁頭山。以鴻雁羣集而名。宋時有雁頭寨。又南山在州東七十里。喬林修竹。周匝十數里。為

州之勝。

巨馬河

舊在州北。宋界河也。自保定府雄縣流入。志云。巨馬河自盧溝河分流。經固安縣。過州治北。東合白溝河。後徙流州治西。會霸水至直沽入海。今霸水淤塞。巨馬琉璃諸河復合流。經州治北。東入東安永清縣界。○霸水在州南三里。舊志云。白溝河

之支流也。自雄縣流入境。東會於巨馬河。州以此名。今堙廢。

沙河

在州南。又有唐河。與沙河合流而東。蓋九河之水。匯流於安州雄縣之界。溢而旁出者也。東經文安縣界入海。其入海處呼為飛魚口。寰宇記謂之五渠水。又謂之長鳴水。志云。城西有瓦河水。亦流合於沙河。○琉璃河在州西北五十里。自良鄉縣合上流諸水。東南流入州界。會於巨馬河。至州東四十五里苑家口。洪濤瀾望無際。或謂之夾河。今有苑家口巡司。又有通濟河。自苑家口達栲栳圈。以注於高橋淀。宏治中。作大橋於苑家口。既以障衝波。復以便行旅。

永濟渠

在州東。宋志。信安軍有永濟渠。咸平中。置緣邊塘。東起乾寧軍。西至永濟渠。合鵝巢淀。陳人淀。燕丹淀。大光淀。孟宗淀。諸水橫廣百二十里。縱三十里。或五十里。深丈餘。或六尺。以為邊備。今皆廢。

高橋淀

州東七十里。周迴三十里。其西有栲栳圈。眾流所聚也。志曰。州川原平衍。厥壤卑下。西北諸山之水。多匯於州境。然後東流。出丁字沽。注白河。以入於海。宏治中。築河堤。起涿州東境。接固安。至州境之趙村。務臨津水口。經州南關。長三百餘里。廣尋有二尺。趾倍之。崇丈有八尺。傍植榆柳以為固。其間為水口。一百六十有七。至文安縣之蘇家橋。大城縣之辛張口而止。今多崩壞。

益津關

見上益津縣。五代周顯德六年，周主自乾寧軍獨流口，泝流而西，至益津關，契丹將以城降，自是以西水路漸隘，乃捨舟而進，至瓦橋關是也。乾寧軍見河間府青縣。瓦橋關見保定府雄縣。○淤口關即廢信安縣。五代周顯德六年，取益津關，又取

淤口關，王應麟以

淤口爲三關之一。

鹿角砦

州東南六十里。宋置鹿角等八砦，俱屬文安縣。元豐四年，割鹿角寨隸信安軍。○大良驛在州東八十里。又州東南百二十里有蘇家淺，亦往來孔道也。

文安縣

州東南七十里。東南至河間府靜海縣八十里。漢舊縣，屬渤海郡。後漢屬河間國。晉屬章武國。後魏屬章武郡。隋屬瀛州。唐初因之。景雲二年，改屬莫州。宋爲霸州治。金大定中，徙州治益津，以縣屬焉。今編戶三十四里。

文安城

縣東三十里。漢置縣於此。今縣治乃三河口之豐利縣。當三河合流處。隋大業九年，煬帝征遼經此，以其衝要，乃立縣治焉。亦屬瀛州。唐初因之。貞觀二年，徙文安縣治豐利，以豐利縣并入。而文安舊城遂廢。周世宗置霸州，發濱棣丁夫城其地，即

今縣城也。

廣陵城

縣西北二十里。與保定縣接界。宋時聚糧於此，以守益津關。城冢記。縣西二十七里有古南北二廬蒲城。左傳昭三年，齊侯放廬蒲嬖於此。營二城以居，後入燕境。

易水

在縣西。自保定縣流入境，即沙河諸水下流也。水經注：易水東至文安，與滹沱河合。寰宇記：滹沱河在縣西三十里。又東溢爲趙淀。圖經云：縣有狐狸淀，俗謂之掘鯉淀。今川原改易，滹沱經縣東南，未嘗經縣西也。

火燒淀

縣東二十五里。廣四十餘畝。縣境有石溝折河，急河三水，皆聚流於此。東入衛河，達於直沽。元志：河間府境有黃龍淀，自鎖井口開鑿，至文安縣玳瑁口，通灤水，經火燒淀，轉流入海。今埋廢。

水紋淀。

舊在縣西。宋起塘灤。東自信安軍永濟渠。西至霸州莫金口。合水紋淀。得勝淀。下光淀。小蘭淀。李子淀。大蘭淀。爲一水。橫廣七十里。縱或十五里。或六里。其深六尺。廣七尺。尋廢。

武平亭。

括地志云。在文安縣北七十二里。今名渭城。戰國時地屬趙。史記趙世家。惠文王二十一年。徙漳水武平西。二十六年。徙漳水武平東。蓋是時。漳水北入大河也。○安平寨在縣西北三十里。宋置金廢。宋志。縣有劉家渦。刁魚。阿翁。雁頭。黎陽。喜渦等。

寨。政和三年。改劉家渦曰安平。阿翁曰

仁孝。雁頭曰和寧。喜渦曰喜安。是也。

蘇家橋。

縣東二十里。當往來孔道。靖難初。燕自固安縣渡拒馬河。駐師蘇家橋。卽此。

大城縣。

州南百三十里。東至河間府青縣八十里。西至河間府任邱縣七十里。漢爲東平舒縣。屬勃海郡。以代郡有平舒縣。故曰東平舒。後漢屬河間國。晉爲章武國治。後魏爲章武郡治。北齊改縣曰平舒。隋初廢郡。縣屬瀛州。唐武德四年。縣屬景州。貞觀初。仍

屬瀛州。五代唐改爲大城縣。周

改屬霸州。今編戶二十二里。

章武城。

縣南四十七里。漢置縣。屬勃海郡。武帝封竇廣德爲侯邑。後漢仍屬勃海郡。三國魏因之。晉屬章武國。後魏屬浮陽郡。又析置西章武縣。屬章武郡。高齊省入平舒縣。○平陵城在縣東北百里。漢武帝封蘇建爲平陵侯。蓋邑於此。

黃汭河。

縣東北八十里。卽易水下流自文安縣分流入境。又東北入武清縣之三角淀。

孝順窪。

在縣西。相傳唐太宗征遼。萬馬所飲而成。又縣北有麒麟窪。昔常產麟於此。

保定縣

州南四十里。本涿州新鎮地。宋太平興國六年。置平戎軍。景德初。改保定軍。宣和七年。降爲保定縣。屬莫州。金屬雄州。元初。省入益津縣。尋復置。屬霸州。今編戶六里。

玉帶河

在縣北。遶縣東南。入於磁河。或曰。卽霸水之下流也。宋志。緣邊塘。其一水東北起霸州莫金口。西南至保定軍父母砦。合糧料淀。回淀諸水。橫廣二十七里。縱八里。其深六尺。後廢。又云。初。霸州至保定軍。並塘岸水最淺。故延平。景德中。契丹南牧。

每以霸州信

安軍爲歸路。

磁河

在縣西南。一統志。源自保定府安州。聚九河之水。至雄縣爲瓦濟河。至保定縣爲磁河。東南流入文安縣界。志云。縣東北自路疇村起。直抵西營唐頭等村。計長四十里。其南爲文安縣界。北則霸州也。議者謂決霸州之堤。以疏水性。而築大堤於南。以衛

文安。則畿南十數

州。皆可免於水患。

桃花砦

在縣北。宋志。保定軍舊有砦二。曰桃花。曰父母。政和三年。改父母曰安寧。而桃花仍舊。金皆廢。

涿州

府西南百四十里。南至河間府二百七十里。西南至保定府一百九十里。東南至霸州一百二十里。

古爲涿鹿之野。春秋時爲燕之涿邑。秦爲上谷郡地。漢分置涿郡。

治涿縣

後漢因之。三國魏改爲范陽郡。

晉爲范陽國。後魏爲范陽郡。

俱治涿縣。魏收志。永安三年。嘗移置平州於此。

後齊。後周因之。隋初廢郡屬幽州。大業初。改幽州爲涿

郡。治唐仍屬幽州。大歷四年，析置涿州。幽州帥朱希彩表置領五代晉入於契丹，仍曰涿州，亦爲永泰軍。宋

宣和四年收復，改軍名曰威行。亦爲涿水郡。金仍爲涿州。元初，升涿州路。中統四年，復爲涿州。明初因之，以

州治范陽縣。省入。編戶四十六里。領縣一。

涿州控西山之險，據上游之勢，北通上谷，俯視關南，居庸、紫荆爲之外障，大安、房山爲之內阻。漢置涿郡，形勝甲於河北。五代時，河東由此并燕，宋爭幽薊，往往取道於涿州，以其地爲四達之區也。明朝設兵置戍，特爲肘腋要害，而振旅出師，涿鹿故其孔道云。

范陽廢縣。今州治本燕之涿邑。漢置涿縣爲涿郡治。魏晉以後，范陽郡國皆治焉。後魏孝昌三年，上谷賊杜洛周南趣范陽，幽州刺史常景破之。隋廢范陽郡，縣屬幽州。唐武德七年，改涿縣曰范陽。寶應二年，史朝義敗走范陽縣，其將李懷仙遣兵

拒守。朝義至，不得入。大歷四年，幽州帥李希彩復奏置涿州於此。後因之。明初廢縣入州。城邑攷州城形如凹字，相傳漢初盧綰所築舊址。明景泰初增修，周九里有奇。

西鄉廢縣。州西北二十里。漢縣屬涿郡。後漢省，或謂之都鄉城。又良鄉舊城，在州北四十里。漢置縣西北。五代時始移今治。○廢凜州在州境。唐志天寶初置於范陽縣界，以處降人。

獨鹿山。州西十五里，下有鳴澤。漢元封四年，由回中北出朝那，蕭關，歷獨鹿，鳴澤，從西河還。即此。○龍安山在州西北五十里，時有雲氣騰擾如龍，山蓋大房諸山之支隴也。

涿水

在州北三十里。源出保安州之涿鹿山。經山谷中。歷房山縣界。東南流至州北。又南合於挾河。○胡良河在州東北二十里。源出房山縣大安山東麓。流入州境。又南與挾河合。流入良鄉縣界。注於琉璃河。志云琉璃河即聖水也。自房山縣流經州北大

房山之孔水入焉。石橋跨其上。形勢巨麗。亞於盧溝。

挾河

州西北二十里。一統志自房山縣流入州界。與胡良河合。入於琉璃河。一名挾活河。湯有光曰。涿水源從大同得勝堡外地界入。至老班溝。一入涑水縣。一入涿州。沙水俱活。東西不定。故謂之挾活。水又謂之聖水也。經督亢亭及州南一帶。至新城縣。皆

是涿水下流。北魏刺史盧文偉修爲陂。以資灌溉。民享其利。亦名巨馬。河水經注。巨馬水經督亢澤。北屈隕於桃水。督亢水又南。謂之白溝水。

范水

在州南。自易州涑水縣流入。下流合於巨馬河。范陽之名本此。又州境舊有桃水。水經注。桃水出涑縣西南奇溝。東八里大坎。下東北與涑水合。至涑縣東與聖水合。今水流遷徙。非復舊迹矣。

北涉溝

在州西北。自涑水縣流入。即故涑水也。又南涉溝。即故督亢水也。一統志。良鄉縣東有南涉溝。北涉溝。蓋謂州北故良鄉縣耳。

岐溝

州西南四十里。亦曰奇溝。又爲祁溝。唐末設關於此。晉王存勗天祐十年。遣周德威出飛狐攻燕。與鎮定兵會於易水。進攻祁溝關。下之。遂圍涿州。守將以城降。胡氏曰。關在易州拒馬河之北。自關而西至易州六十里。由拒馬河而東至新城縣四十里。

宋雍熙三年。曹彬。米信等與契丹將耶律休哥戰於岐溝關。敗績。彬等夜渡巨馬河。南趣易州。休哥領精兵追及。溺者不可勝計。宣和中亦嘗設關於此以備金。

督亢陂

州東南十里。其地沃美。即燕太子丹使荆軻資圖以獻秦者。劉向別錄云。督亢。燕膏腴之地也。北魏主詡時。幽州刺史裴延儻案舊迹。修督亢陂。溉田萬餘頃。又北齊主高演初。平州刺史稽燁開督亢陂。置屯田。歲收稻粟四十萬石。括地志。督亢陂

逕五十餘里。寰宇記。陂在范陽。故城東南。跨連涿州新城之界。

岐溝關。在州西南。據岐溝之險。以置關也。詳見上。○駝羅口在州東北。宋雍熙中。圍涿州。契丹主隆緒由駝羅口應援。卽此。

范州。在州西南。宋宣和四年。童貫伐遼。至高陽關。遣神師道總東路兵。趣白溝。辛興宗總西路兵。趣范村。旣而興宗至范村。爲遼人所敗。

樓桑村。州西南十五里。後漢末。劉先主所居。明建文時。燕王嘗屯兵於此。又南三里。有酈亭。後因酈道元所居。亦曰酈村。志云。州南二十五里有柳河村營。西南去保定府新城縣四十里。

督亢亭。州東南十五里。以督亢陂而名。亭南有月池。廣三頃。其形如月。史記正義。方城縣有督亢亭。方城。今固安縣也。

房山縣。州西北四十里。東至府城百二十里。西至保定府易州涑水縣八十里。本良鄉。宛平。范陽三縣地。金大定二十九年。始置萬寧縣。以奉山陵。明昌二年。改爲奉先縣。元至元二十七年。改爲房山縣。屬涿州。今編戶十六里。

大房山。縣西十五里。境內諸山。此山最爲雄秀。古碑云。幽燕之奧室也。山下有聖水泉。西南有伏龍穴。一名龍城峪。湯泉出焉。又有孔水洞。在山之東北。今訛爲雲水洞。懸崖千尺。石竇如門。深不可測。志曰。山亦名大防山。亦曰大房嶺。五代梁貞明三年。契丹圍幽州。晉王存勗遣李嗣源等趣救。至易州。以步多騎少。不利平原。乃自易州北踰大房嶺。循澗而東。距幽州六十里。與契丹遇。契丹却。晉兵翼而隨之。契丹行山上。晉兵行澗中。每至谷口。契丹輒邀之。嗣源等力戰。敗契丹兵於山口。乃得出。至幽州。金廢。主亮貞元三年。以大房山靈峯寺爲山陵。遷其太祖阿骨打。太宗吳乞買葬焉。故縣有萬寧之名。

般州山

縣西南四十里。上有般州山寨。又西南十里爲石經山。山之東爲石經洞。沙門鏤石以傳其教。因名。志云。山峯巒秀拔。儼若天竺。○穀積山。縣西北五十里。峯巒突起。如積穀然。下有三石洞。名曰三學。中可容數千人。

大安山

縣北八十里。山高險。薛居正曰。大安。幽州西名山也。唐天祐末。幽州帥劉仁恭築館居其上。曰。此山四面懸絕。可以少制衆。名曰大安館。其子守光遣兵攻之。虜仁恭以歸。又三峯山。在縣西北五十里。志云。有三峯並峙。高插雲霄。

挾河

出縣東南中浣谷。流入涿州界。又胡良河亦自縣北流經縣東入涿州界。

聖水

在縣西。水經注。聖水出上谷郡西南谷中。東流經大房嶺。或曰。今大房山下聖水泉。卽聖水之上源。其委流爲琉璃河。經涿州北入良鄉縣界。又有龍泉河。出縣北大安山。廣陽水出縣北三十里之公村。俱流入良鄉縣界。

杖引泉

縣西南六十里。泉水湧出。匯而成溪。流經涿州東南入胡良河。

黃山店口

縣北三十里。又西六十里。曰大谷口。又三十里。卽涑水縣北之乾河口也。○孤山口。在縣南五十六里。涿易二州分路處。名勝志。縣南五十里有上方寺。在兩崖間。鑿石爲磴。攀絙而上。絕頂有泉如斗。汨汨不窮。其寺曰斗泉寺。又有亂塔。

寺。山曰紅羅。

嶮。俱稱陡絕。

附見

涿鹿衛

在州治西北。永樂七年建。又有涿鹿左衛。在州治西。永樂八年建。涿鹿中衛。在左衛西。永樂十一年建。

昌平州。

府北九十里。東至薊州一百八十里。西至延慶州八十里。北至廢開平衛七百七十里。

春秋時燕地。秦屬上谷郡。漢因之。後漢屬廣陽郡。晉屬燕國。後魏屬燕郡。太和中。分恒州東部置燕州於此。治昌平。尋又置昌平郡。東魏爲東燕州及平昌郡。北齊因之。後周州郡俱廢。尋又置平昌郡。隋初郡

廢。屬幽州。大業初屬涿郡。唐亦屬幽州。石晉時入於契丹。屬析津府。金屬大興府。元屬大都路。明初屬北平府。永樂中屬順天府。正德元年。升爲昌平州。旋罷。八年。復升爲州。編戶二十七里。領縣三。

昌平州枕負居庸。處喉吭之間。司門戶之寄。京師大命。嘗繫於此。雖古北有突入之虞。紫荆多旁窺之慮。而全軍據險。中權在握。不難於東西撲滅也。居庸一傾。則自關以南。皆戰場矣。于少保嘗言。居庸在京師。如洛陽之有成。皇西川之有劍閣。而昌平去關不及一舍。往來應援。呼吸可通。宜高城固垣。頓宿重旅。特命大將駐此。以固肩背之防。此陸遜所云。一有不虞。卽當傾國爭之者也。正統十四年。于謙城昌平。以扼北寇突入之道。

昌平廢縣。

今州治。本漢舊縣。屬上谷郡。後漢初。寇恂至昌平。襲殺邯鄲使者。奪其軍。又耿弇走昌平。就其父况。建武中。盧芳入朝。南及昌平。是也。尋改屬廣陽郡。三國魏黃初中。拜田豫爲烏桓校尉。持節并護鮮卑。屯昌平。晉仍爲昌平縣。屬燕國。後

魏廢入軍都縣。或云。初爲燕州及昌平郡。治孝昌中。陷於杜洛周。東魏天平中。復置昌平縣。屬平昌郡。後周因之。隋郡廢。縣屬幽州。唐亦曰昌平縣。武德中。徙突地稽部落於此。垂拱三年。突厥骨咄祿寇昌平。卽此也。五代唐曰燕平縣。徙治曹村。又徙於白浮

圖城。在今州西八里。白遼以後皆治焉。明景泰初築永安城。徙長陵。獻陵。景陵三衛於城內。三年縣亦遷治焉。正德八年改爲州。治萬歷元年又於州城內增築新城。置裕陟。茂陟。秦陟。寧陟。永陵五衛於城內。今十二陵衛置皆在城中。各領左右中前後五千戶所。州城周十里。有奇。

軍都城。在州東。漢立縣於軍都山南。或以爲秦縣也。漢初周勃屠渾都。卽軍都矣。後移治於昌平縣東南。屬上谷郡。後漢屬廣陽郡。晉屬燕國。後魏復移治於縣東北二十里。仍屬燕郡。魏收志。天平中東燕州治軍都城。尋省縣入昌平。今州東四十里有軍都村。亦曰故縣址。○居庸城。在州西北。漢縣。屬上谷郡。關因以名。東漢至晉皆爲上谷郡。屬縣。後魏高齊因之。後漢廢。

萬年城。在州西南。東魏天平中置萬年縣。屬平昌郡。隋開皇初廢入昌平。○廣武廢縣。在州西境。後魏武定初置徧城郡。領沃野。廣武二縣。屬東燕州。蓋郡縣皆僑置。胡氏曰。魏太和初分雁門之廣武。朔方之沃野。置徧城郡。治廣武縣。縣有三城。晉咸和九年。後趙石虎將石斌擊叛羌於關中。軍敗。還屯三城。或以爲三城亦在州境。

鞏華城。在州東南二十里。其地本名沙河店。永樂中建行宮於此。正統時爲水所圯。嘉靖十六年車駕駐沙河。嚴嵩議以春秋謁陵。此爲南北適中之處。且居庸白羊近在西北。邊防尤切。宜修復行宮。築城環之。十七年始於沙河店之東建行宮。十九年成。城周四里有四門。置軍戍守。亦曰鞏華臺。

天壽山。在州北十八里。本名黃土山。卽軍都諸山之岡阜。志云山脈自西山蜿蜒而來。羣峯連亘。流泉環遶。永樂五年卜建山陵時。幸此。因賜今名。歷朝陵寢皆奠焉。今州東北十五里曰玉帶山。又五里曰筆架山。三峯並列。迥出雲表。中峯之下。太宗元宮。

奠焉。所謂長陵也。諸陵自東西兩峯而外。或各名一山。皆以天壽統之。州南四里曰鳳凰山。至城西北紅門。凡十里。兩山並峙。連翩如鳳凰。州西北五里曰虎峪山。又西三里曰大虎峪山。巍峨若虎踞。又十里曰照壁山。方如屏障。州東北七里有平臺山。水中間小山也。山圓秀。成祖嘗駐蹕焉。嘉靖十五年。作聖蹟亭於山上。十七年臨幸。祀成祖於亭中。當口又有小山。曰影山。遠望之。其影先見。是爲東山口。州西有小金山。爲西山口。其南有小紅門。距州西門八里。又西北十里曰德勝口。其西三里爲溝。溝巖有上中下三巖。土人呼爲石梯。深險可避兵。此皆寢園諸山之護翼也。其間水流環通。自諸山口分入。匯爲一流。出東山口。入鞏華城。東北之沙河。又自紅門而西北四里。爲翠屏山。下出泉九穴。滫而爲池。名九龍池。紅門之東北四里。曰仙人洞。深窅無際。南自鳳凰山。西至居庸關。東至蘇家口。北至黃花鎮。皆禁樵牧。林樹森列。正統十四年。七先入犯。焚毀陵園。于謙遣軍分屯天壽山。宏治十三年。火篩自大同深入。亦遣大臣守衛天壽山。嘉靖二十九年。有俺答犯州東門。官軍潛伏林內。奮出擊却之。蓋控禦要地矣。山水記。天壽山環山凡十口。自州西門而北八里爲大紅門。門東三里曰中山口。又東北六里曰東山口。距州東門八里有松園。方廣數里。又北而西十里曰老君堂口。旁有老君堂。因名。又西十五里曰賢莊口。又西三里曰灰嶺口。官軍駐守於此。又西十二里曰錐石口。三口並有垣。有水門。崇禎九年。昌平之陷。自此入也。又南十二里曰鴈子口。又西南三里曰德勝口。距九龍池四里。有垣。有水門。又東南十里曰西山口。距州西門八里。又東二里曰榨子口。距大紅門三里。凡口皆有垣。陵後通黃花城。自老君堂口至黃花城四十里。嘉靖十六年。命塞天壽山東西通黃花鎮路口。是也。又云。獻陵在天壽山西峯下。距長陵西少北一里。景陵在天壽山東峯下。距長陵東少北一里半。裕陵在石門山。東距獻陵三里。茂陵在聚寶山。東至裕陵一里。泰陵在史家山。東南距茂陵二里。康陵在金嶺山。東北距泰陵二里。永陵在十八道嶺。嘉靖十五年。改名陽翠嶺。西北距長陵三里。昭陵在大峪山。東北距長陵四里。定陵亦在大峪山。南距昭陵一里。慶陵在天壽山西峯之右。東南距獻陵一里。德陵在檀子峪。西南距永陵一里。德陵東南有饅頭山。九龍池南行三里爲蘇山。又南爲銀錢山。又南爲嶼兒峪。又南卽鹿馬山矣。又景皇帝陵。則別葬於金山。

軍都山

州西北二十里。層巒疊嶂。奇險天開。太行第八陁曰軍都。卽此山也。後漢永平中。朔騎經軍都。耿舒襲破其衆。斬匈奴兩王。其後盧植嘗隱居於此。晉建興中。段匹磾欲擁其衆。徙保上谷。阻軍都之險。是也。亦曰居庸山。又有積粟山。在州西二十里。

與軍都山

峯巒相屬。

白浮山

州東南十里。上有二龍潭。流經白浮村。爲白浮堰。志云。白浮堰在州東南十五里。起白浮村。至府西北三十五里之青龍橋。延袤五十餘里。元至元中。郭守敬引白浮山諸水。西折而南。經府西三十里之甕山泊。流入積水潭。以通漕運。因築此堰。以

障雙塔神山。榆河諸水。其後山水決溢不時。歲常修治。又致和元年。燕帖木兒

與上都兵戰於白浮之野。敗之。旣又敗之於白浮之西。又追敗之於昌平北。

銀山

州東北六十里。峯巒高峻。水雪層積。色白如銀。因名。麓有石崖。皆成黑色。謂之銀山鐵壁。頂爲中峯。石梯而上。約五六里。迴出雲霄。又神嶺山在州東北三十二里。山高百餘丈。下有龍潭。流入白浮堰。所謂神山泉也。又州東南三十八里有湯山。下有湯

泉。又有湯峪山。在州西

北二十五里。溫泉出焉。

駐蹕山

州西南二十五里。其山綿亘而北。凡二十里。石皆壁立。正北有石梯。可登陟。金主璟嘗遊此。因名。又狼山在州西北四十里。其東北有古陽夏川。或曰山亦名崑山。元致和初。燕帖木兒敗上都兵於白浮之野。上都兵走崑山。收集散亡。復戰。又敗走

昌平北。○幽都山志云。山在州西北古

幽州以此名。通典以爲山在北荒也。

榆河

在州南二十里。一名濕餘河。水經注。源出居庸關。南流出關。謂之下口。水伏流十餘里。發爲濕餘潭。志云。濕餘河源出軍都山。至舊縣西而伏。又南復出。謂之榆河。其發處爲月兒灣。或名溫榆河。卽濕餘之譌也。今上流已涸。其下流爲沙河。入宛平縣北

境經順義縣。會於白河。元致和元年。燕帖木兒禦遼東之師。次於三河。聞上都兵入居庸。乃還軍次榆河。既而戰於榆河之北。敗之。追奔至紅橋。據之以拒上都之兵。紅橋在州西南十二里。橋亡而名尙存。

官河。在州西南二十里。源出一畝泉。分爲二流。一曰官河流。入宛平縣。合高粱河。一曰雙塔河。在州西南三十里。經雙塔店。入榆河。志云。一畝泉在州西南新屯。廣一畝許。因名。又清河源亦出一畝泉。流入宛平縣界。其下流皆匯於沙河。

黃花鎮川河。在州東北三十五里。源出塞外。自二道關流入黃花鎮口。經州境。歷渤海所。至懷柔。順義縣界。入白河。俗謂之九度河。以河流九曲也。又芹城水在州東北四十里。水經注。芹城水出北山。南逕芹城。東南注濕餘水。志云。芹城在州東三十里。有橋。橋下卽芹城水。今爲戍守處。其水西南流至藺溝。入榆河。杜佑曰。芹城在順州西南五里。今順義縣。故順州也。似悞。

高粱河。在州西。水經注云。并州黃河之別源也。經州西南三十里之沙澗泉。又東南逕高粱店。入都城。又有清泉水。在州北三十里。諺云。高粱無上源。清泉無下尾。蓋以高粱憑藉衆流。而清泉分流散漫故也。

虎眼泉。在州西八里舊城下。一作馬眼泉。流經州東南豐善村。入榆河。河漕考。大通河。出自白浮村神山諸泉。過雙塔。榆河會一畝泉。虎眼泉。至府城西會玉泉。是也。

居庸關。在州西北三十里。志云。州西北二十四里爲居庸關南口。有城南北二門。自南口而上。兩山之間。一水流焉。道出其上十五里。爲關城。跨水築之。亦有南北二門。又有水門。宣德三年。命修居庸關城及水門者也。又八里爲上關。有小城南北二門。又七里曰彈琴峽。水流石罅。聲若彈琴。又七里爲青龍橋。道東有小堡。又三里卽延慶州之八達嶺矣。嶺上有城南北二門。元人以此爲居庸北口。又南口而東六里。有龍虎臺。臺廣二里。袤三里。與積粟山相峙。如龍蟠虎踞狀。元時往來上都。每駐於此。明太宗北征。屢駐蹕焉。宣宗。英宗。亦嘗駐此。山水記。州西十八里至龍虎臺。又西六里。卽居庸關。是也。餘詳重險居庸。

黃花鎮

州北八十里有城。元置千戶所於此。當居庸。古北二關之中。北連四海治。擁護陵寢。爲京師後戶。城西有垣。一重曰頭道關。二重曰二道關。關之西南一里。西曰撞道口堡。又西爲鷓子峪堡。西水峪堡。堡西卽入達嶺也。志云。鎮西三十七里曰棗陽砦。又西三十里爲灰嶺口。又西十八里曰鴈門口。又西五里曰德勝口。又西三十七里。則居庸關也。自鎮而西。凡十一口。至居庸。而灰嶺口極爲衝要。

白楊口

州西北四十里。距居庸南口二十里。亦曰白羊。元置白羊千戶所於此。今有城。調官軍戍守西南。又有小城。曰白羊新城。南北衝要處也。正統九年。先由此入犯。宏治十一年。火篩自大同深入。京師戒嚴。分遣大臣守潮河川。天壽山。居庸。紫荆。倒馬。白楊諸關隘。正德十一年。小王子犯白楊口。嘉靖二十九年。俺答由古北口突犯京師。欲奪白楊口北出。不果。又西北四十餘里曰長峪城。其西小城。亦曰長峪新城。又西二十里曰橫嶺口。城亦爲守禦要地。嘉靖中。俺答自古北入犯。從橫嶺逸出。卽此。今亦名龍嶺口。口西二十里有鎮邊城。志云。城在長峪西北四十里。三門正德中設鎮邊守禦千戶所。後益增兵戍守。自此西南二十五里至橫中山。卽紫荆關所轄沿河口界。又自白楊東至居庸。凡七口。由白楊而南至良鄉縣。天津關。凡二十七關口。

蘇家口

在縣東北八十里。嘉靖中。許論言渤海所當山陵之北。其間有蘇家口。實爲扼塞之處。自此直抵通州。張家灣。凡百十里。由張家灣至通州北塞籬村四十里。有白河水深沒馬。可據爲守。惟塞籬村至蘇家口七十里。地形平漫。至爲賊衝。若密築敵臺。界之以墻。使京師有重關之險。策之得也。從之。又慕田峪堡在州東北百有五里。其西南有慕田峪城。設官軍戍守。萬歷初。移渤海所於慕田峪關。是也。城西有賈兒峪堡。田仙峪堡。城東爲井連口。與密雲縣石塘嶺關接界。

唐家嶺店

州西南四十里。永樂中。車駕北征。嘗駐於此。宣德九年。正統十四年。亦嘗駐焉。明史。太宗北征。徐行則次唐家嶺。疾行則一日而至榆林。是也。又有榆河驛。在唐家嶺北五里。舊置驛於此。嘉靖三十六年。改設於新城內。榆林驛見懷來衛。○皇后店在州西。元至正二十四年。孛羅帖木兒。自大同遣其黨禿堅帖木兒。犯闕。入居庸。太子遣兵逆戰於皇后店。潰還。禿堅兵至清河列營。尋入京城。

順義縣

州東南九十里西南至府城六十里東南至三河縣九十里東北至密雲縣七十里本漢狐奴縣地北齊始置歸德縣屬燕郡後周廢唐開元中始移燕州於此仍置遼西縣為州治天寶初曰歸德郡乾元初改為順州遼初廢遼西縣仍曰順州亦曰歸

寧軍又改歸化軍宋宣和四年復賜郡名曰順興金亦曰順州元因之明初改置順義縣屬順天府正德八年始改今屬編戶二十七里

遼西廢縣

今縣治杜佑曰隋開皇中粟末靺鞨與高麗戰不勝厥稽部長突地稽率八部勝兵數千人自扶餘城西北舉部落內附置順州以處之本在柳城燕郡之北煬帝改為遼西郡取秦漢舊名也統遼西懷遠瀘河三縣唐初改為燕州廢瀘

河縣武德六年自營州南遷寄治幽州城內貞觀初省懷遠縣開元二十五年移治所於幽州北桃谷山去州九十里仍置遼西縣為州治五代梁乾化三年晉將周德威攻燕拔順州即此遼廢縣而州如故

狐奴城

在縣東北漢縣屬漁陽郡後漢因之張堪為漁陽太守於狐奴開稻田八千餘頃是也晉仍為狐奴縣魏廢或曰呼奴山有狐奴城即故縣云

呼奴山

縣東北二十五里亦名狐奴山水經注水不流曰奴蓋以山前瀦澤名也其北麓鳥道而上約里許始漸開漸平有小石城其西南麓又有一城相傳後漢鄧訓與上谷太守任興將兵屯狐奴以拒烏桓此城即訓所築或曰漢狐奴縣城也

牛欄山

縣北二十里宋王曾上契丹事順州至檀州漸入山牛欄是其要地明改名順義山山北里許有小山名靈蹟山又有史山在縣西北三十五里山高百餘丈南望京師盡在目前

桃山

縣西北三十五里舊唐書謂之桃谷山山有五峯如桃花瓣巨石錯落橫亘數畝元致和初上都兵入古北口留重兵屯燕樂城以輕騎進抵桃山燕帖木兒掩擊之於白狼河追至桃山降其衆燕樂聞之遂潰白狼河即白河也一云白狼河在縣西北

三十里志云桃山在縣南十五里恐悞又孔山在縣南二十餘里水經注山洞穴開明故曰孔山

白河。在縣城東。自塞外流經密雲縣石塘嶺。過密雲城下。又歷懷柔縣。東流入界。經靈蹟山。黃花鎮川河入焉。又南經牛欄山東麓。潮河流合焉。又南經縣城東門外。至通州。爲潞河。宋宣和末。金幹離不入順州。宋郭藥師迎戰於白河。敗績。遂降金。明嘉靖末。

督臣劉燾以密雲歲運。悉由通州陸運。至牛欄山。費多。乃疏此河。下達通州。更駕小舟轉粟。徑抵密雲。省費什之七。○潮河在縣東二十二里。自塞外廢興州發源。入古北口。西南經密雲。懷柔縣界。至牛欄山。東入於白河。

榆河。縣西南二十里。自昌平大興。流入縣境。亦曰西河。又名沙河。經後店。葦溝二村。東至通州。而注於白河。○大水峪河在縣北三十里。源亦出塞外。經懷柔縣流入界。至孫家莊。東北合於黃花鎮川河。

石槽砦。縣西北三十里。其地有三石槽。分東南西北三處。元致和初。上都兵入古北口。遊兵掠石槽。燕帖木兒遣撒敦掩擊。敗之。追擊四十里。至牛頭山。餘兵奔竄。復夜襲之。遂出古北口。牛頭山在密雲北境。或以爲卽牛欄山。恐悞。○槽河營卽牛欄山。東南

有城。設官兵屯戍。志云。自營而北。卽懷柔縣之并連口關。又宋城鎮在縣東北二十里。唐所置戍守處。又安樂莊在縣西北六里。或曰卽漢安樂縣治。後魏廢。今見通州。

懷柔縣。州東九十里。西南至府城百里。東至密雲縣三十里。本密雲。昌平二縣地。唐貞觀六年。置懷柔縣。治五柳城。尋改爲順義縣。開元四年。置松漠府。彈汗州。以處契丹部落。天寶初。改歸化郡。乾元初。改爲歸順州。治懷柔縣。遼廢歸順州。以縣屬順州。金明昌

六年。改爲溫陽縣。元廢。明洪武十三年。復置懷柔縣。屬順天府。正德中。改今屬。編戶十四里。

紅螺山。縣北二十里。山高二百餘仞。下有潭流。爲紅螺出水。志云。縣西三里有石塘山。遇大工。則採石於此。有工部廠。

黍谷山。縣東四十里。跨密雲縣界。亦名燕谷山。劉向曰。燕有谷地。美而寒。不主黍稷。鄒衍吹律。以溫其氣。因名山曰黍谷。亦曰寒谷。吳越春秋。北過寒谷。謂此山南有高齊時長城。東北有華林。天柱二莊。遼時遊賞處也。○鴉髻山。在縣東南九十里。以兩峯

高聳
而名。

白河。在縣東七里。又東十五里。卽潮河。一統志。潞水自塞外丹花嶺合九泉水南流。經密雲縣東北。又西南流至縣境。紅螺山水合焉。下流入順義縣。戚繼光曰。白河至密雲石塘嶺關。分二支。一由密雲西。一由懷柔西。俱入通州界。似悞。

开連口關。在縣北黃花鎮東。第十一關口也。其東北二十八里有三角城。本名三角村。徐達敗元於此。○河坊口關在縣東北开連口東。第二關口也。口外爲連雲棧。又北爲沙嶺兒。隘窄不能容馬。防守較易。

大水峪關。縣東北三十里。北去密雲縣之石塘嶺四十里。有城。旁地平坦。賊騎易入。其北十八里曰段伏嶺。又有安子嶺。在口北八十餘里。皆防禦處。志云。大水峪西北有西石城。東水峪二堡。南有神堂峪堡。皆有官軍屯守。

密雲縣。州東北百二十里。西南至府百三十里。東南至薊州平谷縣五十里。漢白檀縣地。屬漁陽郡。後漢省。後魏置密雲縣及密雲郡。尋又置安州。北齊郡廢。而縣如故。後周又改州曰元州。隋開皇十六年。改置檀州。大業初。又爲安樂郡。密雲縣屬焉。唐初仍曰密雲縣。爲檀州治。天寶初。爲密雲郡治。遼仍曰檀州。又爲武威軍。宋宣和中。亦曰檀州。又爲鎮遠軍。橫山郡。金廢州。以縣屬順州。後復爲檀州。以密雲縣併入。元因之。明初又改州爲密雲縣。屬順天府。正德中。改今屬。編戶十九里。

白檀廢縣。在縣南。漢置。以縣有白檀山而名。後漢廢。建安中。曹操歷白檀。破烏桓於柳城。卽白檀故城也。後魏復置縣。爲密雲郡治。北齊省入密雲縣。唐志。密雲城內有威武軍。萬歲通天元年。置本漁陽軍。開元二十八年。改曰威武。遼因以威武爲軍號。又今城卽金元時檀州城也。明初改建縣。城周九里有奇。萬歷四年。於城東復築新城。兩端相連。周六里有奇。督臣統兵駐焉。

要陽廢縣。縣東南六十里。漢縣。漁陽都尉治此。後漢廢。後魏復置要陽縣。屬密雲郡。北齊廢。魏志。縣有桃花山。卽今桃山。在薊州西南。蓋境相接也。

丁奚廢縣

在縣東南。漢置庠奚縣。屬漁陽郡。庠音蹄。後漢曰儻奚縣。晉廢。魏收志。皇始二年。置密雲郡。初治提携城。即庠奚之譌也。宋白曰。檀州密雲縣。即漢庠奚縣舊治。○方城廢縣。在縣東北。魏主叡以方城并入密雲。方城蓋慕容燕所置縣。魏主宏

於皇興二年。置安州。治故方城。其後魏主恭。普泰初。復置方城縣。屬廣陽郡。蓋即舊城。置北齊廢。

入市廢縣

縣東北五十里。漢遼東屬縣。後魏僑置於此。太武叡延和初。置交州治焉。太平真君二年。改置安樂郡。兼領土垠縣。北齊廢。土垠入安市。後周廢郡。并廢安市入密雲縣。土垠見豐潤縣。

燕樂廢縣

在縣東北八十里。漢庠奚縣地。後魏主叡延和九年。置燕樂縣。又僑置益州於此。太平真君九年。改為廣陽郡。北齊郡廢。以廣興。方城二縣併入。隋大業初。置安樂郡治焉。唐初郡廢。仍為燕樂縣。屬檀州。亦謂之廣陽城。寶應二年。史朝義敗走。廣陽。廣陽不受。即此。舊唐書。燕樂縣。初治白檀城。長壽二年。移治新興城。五代梁乾化三年。晉將周德威伐燕。劉守光奔燕樂。被擒。縣尋廢。宋白曰。燕樂。密雲。皆漢庠奚縣地。五代時。廢為燕樂莊。其地平曠可屯。元至和初。上都兵入古北口。留重兵於燕樂。其

前鋒為燕帖木兒所敗。遂潰還。

唐廢縣

亦在縣東。本定州屬縣。遼志。太祖阿保機掠定州。破行唐。盡驅其民。北至檀州。擇曠土居之。凡置十寨。仍名為行唐縣。金廢。○漁陽城。孔穎達云。在縣南十八里。秦郡治此。二世發閭左戍漁陽。即此城也。又共城。括地志云。在檀州燕樂縣界。即

舜流共工之地。一作壘城。

志云。在今縣東北五十里。

石雲山

縣南十五里。一名橫山。晉咸康四年。石虎攻段遼於令支。遼棄令支奔密雲山。虎遣將追獲其母妻。晉紀云。段遼為石虎所敗。奔於平岡山。蓋近漢平岡縣界。唐置橫山城為守禦處。蓋置於山下。又石峨山。在縣東。洳水出焉。流入平谷縣界。志云。縣

東北八里有冶山。上有塔。石洞深邃。水四時不竭。東有王府洞。昔人淘金址尙存。又有香陁山。在縣東北。水經注。香陁西北有伏陵山。崑嶂寒深。凝冰夏結。

白檀山

縣南二十里。漢書。李廣弭節白檀。又曹操伐烏桓。田疇請從盧龍口。越白檀之險。出空虛之地。掩其不備。是也。又唐志。縣有隗山。今山在縣南三十里。○大峪。錐山在縣北。元史。山產鐵鑛。至元十三年。立四冶。二十五年。罷檀州淘金戶。明初亦嘗開採。後封閉。又龍門山。志云。在縣東六十里。有黃崖洞。懸泉如瀑布。

霧靈山

縣東北二百里。南距邊四十里。一名萬花臺。水經注。孟廣礪山也。下有廣礪水。自黑峪關入。西南流經墻子嶺。西合清水河。其山高峻。有雲霧蒙其上。四時不絕。山之左右。峯巒攢列。深松茂栢。內地之民。多取材焉。元有霧靈山伐木官。其絕頂可瞰塞內。漕河考。白河發源於此。正德中。撫臣王大用議。以山錯在桑顏地界。沿南山以守。則曲折而難。據霧靈以守。則徑直而易。請出不意。築城守之。以扼其險。如唐宋受降大順故事。不果。

九莊嶺

縣北三十里。水經注。鮑邱水自禦犂北塞外。南流逕九莊嶺。東是也。又棒樺崖在縣東北。隆慶元年。三衛犂酋董忽力勾土蠻十萬犯邊。勢甚猖獗。既折墻而出。至棒樺崖。迷失道。墜坑死者無算。

白河

在縣城西。亦曰鮑邱水。亦曰大榆河。自縣北石塘嶺流經縣界。又南經懷柔。順義縣。流入通州境。萬歷中。議者謂順義縣牛欄山而下。白河。潮河二水交會。水勢深廣。漕舟易達。牛欄山而上。水源既分。支流自弱。密雲城西有白河故道。宜於陽家莊地方。築塞新口。疏通舊道。使白河自城西經流。直至潮河交會。則水勢至大。牛欄山至密雲。亦可以舟運矣。

潮河

在縣東南。自古北口流入縣界。西南流至順義縣。合於白河。宋景定二年。蒙古忽必烈親將諸軍由檀順州駐潮河川。明宏治十三年。火篩自大同深入。分遣大臣戍此。李東陽曰。桑顏通潮河川。古北口一日而近。是也。邊防攷。潮河寬處可一二里。狹處

僅二三丈。昔人每以木石縱橫布列。以限戎馬。川之兩旁。築垣五臺。東臺下有鐵門關。爲出入道。常扃鑰不開。而臺上有樓。總督大臣每以撫賞諸夷。時洩此關。外爲夾牆。下有小城。曰北關營。川口東南又有小城。曰潮河川堡。設潮河川守禦千戶所戍守。志曰。潮河川直衝境外。橫闊百七十餘丈。夏秋水漲。則成巨浸。水退則爲坦途。可通萬騎。地皆流沙。不能築城鑿渠。宏治中。撫臣洪鍾議。以古北口東三里許。二砦三砦間。其山外高內低。約餘二丈。鑿爲兩渠。以殺水勢。復於口外砌石堰。使水由川中行。仍於堰內築外關一座。以防寇衝。詔從之。議者謂於栢查山築牆。則川在牆內。鑿之無益。旣而功久不成。議者又言。潮河川古道門外。有蜂窩嶺。增墩濬川。設橋其間。可防衝突。許論謂。潮河川係殘元上都故道。尤爲寇衝。設橋則浮沙難立。爲塹則漲水易淤。若多建石墩列川中。錯綜宛轉。令不礙水路。亦備禦一法也。嘉靖中。邊民哈舟兒者。常導俺答自潮河川入京東。逼古北口。萬歷中。議者欲於潮河川西山野猪嶺。北至猪嘴寨。河口墩。又迤北至石崖。創修橫城一道。以爲險固云。今潮河川新舊營寨。俱爲防守要地。

要水

在縣東北。亦曰清水。源出古北口外。自大小黃崖口流入境。至縣西北。又東入於潮河。漢要陽縣以此名。又東北有武列水。亦曰三藏川。其水三川派合。曰西藏川。中藏川。東藏川。其合處曰三藏口。晉咸康四年。慕容皝伏兵於此。敗趙將麻秋處也。水經注。要水。武列水。三藏水。並注於濡水。濡同灤。潮水。亦有灤河之名。○道人溪在縣東北石盤峪。志云。源發龍門。流經縣界。入於潮河。又黑城川在縣北四十里。唐書。檀州有鎮遠軍。卽故黑城川也。

古北口

在縣東北百二十里。兩崖壁立。中有路。僅容一車。下有深澗。巨石磊砢。凡四十五里。爲險絕之道。亦曰虎北口。五代史。唐燕寇。還至虎北口。聞晉取泰州。復南向。宋宣和三年。金人敗遼兵於古北口。明年。金取燕京。遼耶律淳之妻蕭德妃自古北口走天德。旣而燕京歸宋。金將蒲覓敗宋兵於古北口。復取燕京。金史。古北口。國言曰留幹嶺。嘉定二年。蒙古侵金。兵至懷來。金人拒之。敗還。蒙古乘勝至古北口。金人退保居庸關。元致和元年。泰定帝子阿速吉入立於上都。遣兵分道討燕帖木兒於大都。時脫脫木兒守古北口。與上都兵戰於宜興。上都兵敗走。宜興。元興州屬縣也。在古北口外。至正二十四年。秃堅帖木而犯關。太子東走。

古北口。明洪武二十二年。命燕王出師古北口。襲乃兒不花於迤都。降下之。永樂八年。塞古北口小關口及大關外門。僅容一人一馬。嘉靖二十九年。俺答入寇。官軍禦之於此。敵別遣精騎走間道。從關左黃榆溝出師。後官軍遂潰。自古北口至京師才七舍。漫衍無衛戍瞭望。彼長驅而南。京師大震。既而復循諸陵而北。東循潮河川。由古北口出。今口北有潮河川新營。其北五十五里。爲黃天西谷。邊防攷。自黃花鎮而東。凡四十八關口。至古北口。古北口外有萬塔黃崖。西南接潮河川。卽霧靈山之支麓也。自宣府龍門所北萬松溝至此。四五百里。皆崇山疊嶂。得而守之。可以斷東西賊往來之路。天德見陝西榆林關。

石塘嶺關

在縣西北四十里。有城周二里有奇。內有石塘營。其北十三里曰栢檀兒嶺。亦曰栢檀山。又北九里曰賈家谷。又北三十里曰青紅嶺。皆備禦處也。志云。石塘嶺西北有驃騎堡。有水關。白河從西北塞外流經此。又東北有石佛堡。

白馬關

在石塘嶺東北四十里。東去潮河川九十里。有城。有水關。其東有陳家峪堡。亦曰陳家峪關。又有弔馬峪關。南有馮家峪堡。邊防攷。白馬關相近有高家堡。萬曆中。桑顏犯石塘嶺。攻白馬關及高家堡。官軍禦却之。關北七十里。有湯河。又北百里。爲

滿套兒。賊衝也。自湯河上稍正南行。順白河至石塘嶺。可二百里。山惡水深。稱爲天險。○甄柔子關。古北口東第七關口也。又東北爲司馬臺寨。有小城。西去潮河川二十里。其東南爲將軍臺堡。志云。司馬臺北六里曰虎頭山。又有扒頭崖。在司馬臺東。

曹家砦

縣東北九十里。西去潮河川六十里。古北口東第十三關口也。近時嘗爲寇衝。有城周六里有奇。城西爲新營口。外三十五里。爲青沙嶺。又北五十四里。卽小興州。又有牛心山。在曹家砦土壙邊外十四里。○黑谷關。在曹家砦東北。有水關。其北四

十里曰榆樹林。又鴿子塘。在黑谷關東南三十六里。又南十里曰窄道兒。東北過斗裏庫。賊巢也。邊防攷。黑谷關東南爲吉家莊。營。又東五十里曰大安子嶺。又東三十里曰黃土嶺。又東北三十里曰紅門川。又有惡谷砦。在黑谷關南境。嘉靖間。議者請於惡谷。紅土谷。香爐石等處。塹崖壁以爲固。其地蓋相近也。

墻子嶺關

縣東北七十五里。古北口之東南城周一里有奇。有水關。嘉靖二十四年。柔顏會影克糾東西部二十萬騎潰此而入。大掠通州及順義三河諸縣。四十二年。俺答復由此入犯。崇禎十二年。官軍敗績於此。守禦要地也。又東北爲磨刀峪關。亦

嘉靖時敵由此入犯處。邊防攷。自墻子嶺而東十六里曰城子谷。又東五里曰響水川。又東有陡子口。李家莊。青羊嶺。三岔口諸處。自三岔口東至紅門川十二里。西至墻子嶺七十二里。又大小黃崖關。在磨刀寨東北。其南爲北水峪堡。東有黃門關堡。又有

熊兒峪寨。在墻子嶺東南。東接峨嵋山寨。志曰。自古北口而東接峨嵋山寨。凡二十四關口。○鎮。魯營在墻子嶺南三十里。有新舊兩城。其東有漁子山堡。西北與熊兒峪相接。東入平谷縣境。

峨嵋山寨

縣東北百十里。其東曰黃松峪關。將軍石關。自將軍石而北十三里。曰夾城嶺。又北一里。曰私鹽嶺。又北十六里。曰斗子峪。又有車道谷。在將軍石關東北五十三里。東至盤道嶺五里。又東七里。曰季家臺。志曰。自峨嵋山寨。東至薊州之黃崖

谷關。凡五口。

石匣營

縣東北六十里。營西有石如匣。因名。舊有石開驛。在縣南里許。宣德四年。徙於此。宏治十七年。築城周四里有奇。自是增兵置守。益爲要地。自石匣東北行十里。爲腰亭鋪。始入山。又十里。爲新開嶺。又十里。爲老王店。金史。貞祐二年。潮河溢。漂古北

口鐵寨門關至老土谷。卽此。又十二里。至古北口。水淺則涉。潮河水大則紆迴從山頂行。故石匣至古北。計程爲六十里。

李家莊

在墻子嶺東三十餘里。嘉靖二十二年。總兵郤永出塞襲李家莊。李家莊爲柔顏別部。善盜邊。然不通北敵。自是以後。往往導之入寇。爲邊患。隆慶初。三衛會董忽力勾土蠻入薊州寨。總兵李世忠壁李家莊。不敢出。爲彼所困。救至乃解。

保要鎮

在縣境。唐會要。媯州東至檀州二百五十里。檀州有三。又橫山。米城等三城。臨河。黃崖二戍。又有大王。北來。保要。鹿固。赤城。邀。石。子。甌。等。七。鎮。唐會昌初。雄武鎮將張仲武舉兵討幽州叛卒。遣軍吏吳仲舒至京師。言幽州糧食皆在媯州及北邊

七鎮是也。今薊州平谷縣。即故大王鎮。

金溝館。縣東北四十五里。自順義。密雲至此。多山谿之阻。至館川原平曠。謂之金溝淀。沈括曰。檀州東北五十里有金溝館。自館少東北行。乍原乍隰。三十餘里。至中頓。過頓屈折北行峽中。濟灤水道三十餘里。鈎折投山隙以度。所謂古北口也。蓋舊道出

古北口。由金溝館云。

附見

密雲中衛。在密雲縣治東。洪武四年建。○密雲後衛。在縣東北百二十里。即古北口也。有城周四里有奇。雄踞山巔。至爲險峻。洪武十一年。置守禦千戶所於此。三十年。改建今衛。又營州左屯衛。在順義縣治東。本屬大甯。永樂初。移建於此。

勃海守禦千戶所。

在昌平州東北百里。黃花鎮城東三十里。宏治中增置。以爲山陵北面之備。萬歷初。移置於慕田峪關。四年。復還舊治。志云。所西北有擦石口。磨石口。驢鞍嶺。大榛峪。南冶口。大長峪。小長峪等堡。又有銅鑛。嘉靖三十六年

閉。封

薊州。

府東二百里。東至永平府三百里。南至天津衛二百里。北至古長城二百三十五里。

戰國時燕地。秦置漁陽郡。兩漢因之。晉爲燕國及北平郡地。後魏仍置漁陽郡。隋初郡廢。開皇六年。徙

置元州。

治無終。即後魏安州也。後周改爲元州。皆治密雲郡。隋志開皇六年立元州總管府。大業初府廢。

煬帝改置漁陽郡。唐初郡廢。屬幽州。開元十八年析置

薊州。天寶初曰漁陽郡。

時置靜塞軍於郡城內。新唐書薊州南二百里。有靜塞軍。本障塞軍。開元十九年更名。又有漁陽府。蓋貞觀中府兵所居。

乾元初復曰薊州。遼因之。亦爲

尙武軍。宋宣和四年賜名廣川郡。金亦曰薊州。屬中都路。元屬大都路。明仍爲薊州。以州治漁陽縣省

入。

編戶一十六里。領縣四。

州控盧龍之險。扼柳城之道。襟帶郊圻。稱爲重地。大寧未移。開平未棄。山川完固。風塵可以無警也。自

藩籬日壞。伏戎啓憂。漸成入室之形。遂致剝床之患。正統以後。修完扞衛。亦孔棘矣。今東起山海。西迄

居庸。延袤曲折。幾二千里。皆屬薊鎮。

九邊志。薊州自山海關西。至居庸東之灰嶺。隘口共一百二處。相去約二千二百里。又自州以西。有邊牆三重。由州北黑谷等關。西達密雲。甄朶子關。爲第一重。自州東

北峰臺谷寨。西達密雲之牆子嶺。南谷寨。爲第二重。自州東彰作里關。西達密雲。峨嵋山寨。及香河縣。爲第三重。而密雲之桃兒衝寨。

與甄朶子相接。邊牆至此始合爲一。又西爲古北口。又西則居庸關也。邊防攷。隆慶二年。督臣譚綸。帥臣戚繼光。治塞垣。夾垣爲臺。高

數丈。矢石相及。環薊而臺者三千垣。周二千餘里。自是外寇不敢深入。

邊分東、中、西、三路。東路所急者四。

東路帥駐臺頭營。見昌黎縣。

曰山海關。

轄一片石等衝。口見撫寧縣。

曰

石門寨。

在撫寧縣東。轄義院口。黃土嶺。大毛山諸衝口。

曰燕河營。

在永平府北。轄界嶺。青山等衝口。

曰建昌營。

在遷安縣北。轄胡林。冷口諸衝口。

中路所急者四。

中路帥駐三屯營。在遵化。

縣曰太平寨。在遷安縣西北。轄擦崖子榆本嶺等衝口。曰喜峯口。在遵化縣東北。轄董家谷李家口諸衝口。曰松棚谷。在遵化縣北。轄羅文谷。曰馬蘭谷。在州東北。轄寬

佃谷大安口將軍西路所急者四。西路帥駐石匣營。曰墻子嶺。在密雲東北。轄墻子嶺鎮關諸衝口。曰曹家寨。在密雲東北。轄黑谷關吉家莊諸衝口。曰

石黃崖谷諸衝口。在密雲縣東北。曰石塘嶺。在密雲西北。轄白馬關大水谷諸關口。其邊墻皆依山湊築。大道爲關。小道爲口。屯軍曰營。

古北口。在密雲北。轄潮河川司馬臺諸衝口。曰石塘嶺。在密雲西北。轄白馬關大水谷諸關口。其邊墻皆依山湊築。大道爲關。小道爲口。屯軍曰營。

列守曰砦。郭造卿曰。守邊者宜專要害。而以餘兵備策應。故兵雖省而不乏。常聚而不分。今不論要害

奇正。而徒議擺守。夫薊邊山川盤旋。道路崎嶇。幾二千里。就使增兵。豈能徧守。備者多則戰者寡。兵分

勢弱。其何以支。積而不改。有各守汛地之虛名。無相機策應之實用。聲援隔絕。首尾衝決。必不免矣。戚

繼光曰。薊地有三。平易交衝。內地之形也。險易相半。近邊之形也。山谷仄隘。林薄翳翳。邊外之形也。平

原利車。近邊利騎。邊外利步。三者迭用。可以制勝。

漁陽廢縣。今州治。漢置縣。爲漁陽郡治。後漢因之。晉郡縣俱廢。隋未置漁陽縣。唐初屬幽州。武后時。營州陷於契丹。寄治漁陽。神龍初。縣改屬營州。開元四年。復屬幽州。十八年。置薊州治焉。自是州郡皆治此。明初廢州城。洪武四年築。周六里有奇。

北平城。在州境。括地志。漁陽縣東南七十里有北平城。倚燕山爲板築。西漢古北平郡。治平剛。或以爲卽此城也。又州西南有博陸城。薛瓚曰。博陸在漁陽。漢宣帝封霍光爲侯邑。○獷平城在州西。漢縣。屬漁陽郡。服虔曰。獷音鞏。東漢因之。建安十年。烏桓

攻漁陽太守鮮于輔於獷平。曹操引兵渡潞水救之。烏桓走出塞。晉縣廢。

雄武城

在州東北。唐志：薊州廣漢川有雄武城。天寶六載，安祿山築此以貯兵器。其後置軍使於此。爲州境要地。會昌二年，回鶻部將那頡啜南趣雄武軍，窺幽州。節度使張仲武遣軍敗之。廣明初，盧龍帥李可舉奉詔討李克用，侵蔚、朔等州。克用分兵守

朔州，自將其衆拒可舉於雄武軍，卽此。○安遠城在州西北。唐末置安遠軍。五代梁時，晉將周德威攻燕，劉守光拔安遠軍。薊州將成行言等降於晉。又洪水城在州東北九十里。唐所置守捉城也。新唐書：州有洪水守捉。又東北三十里，卽鹽城守捉矣。

盤山

州西北二十五里。一名盤龍山。志云：山高二千仞，周百餘里，勢磅礴而盤桓，因名。圖經云：南距滄溟，西盡洶水，東放碣石，自遠望之，層巒疊嶂，崢嶸排空，眞爲雄勝。山北數峯，林立如削，曰紫蓋，曰宿猿，尤爲奇特。其最高者曰上盤，上有二龍潭，下有潮井。

又有澤鉢泉，稍下者曰中盤，東行十餘里，蔚然深秀，怪石突起者爲白崑，其南又有一小嶺，陡絕難行，曰砂嶺，高二百餘仞。周六里，泉水沿石竇而下，爲砂河，東流合遵化縣之五里河。

甘泉山

州西北七十里，山下有泉極甘美，因名。一名石鑿山，又有桃花山。在州西南六十里。舊志以爲州境之名山也。○崆峒山在州東北五里，相傳黃帝問道處。又有螺山在州南五里。圖經：州西北三里有漁山，高百餘丈，周五里，郡在此山之陽，故曰漁

陽，下有漁水，卽今州城南之龍池河也。

藥兒嶺

在州北。胡氏曰：在雄武軍之西。唐廣明初，李克用自雄武軍西還，李可舉遣將韓元紹邀之於藥兒嶺，大破之，卽此。

龍池河

州城南。一名漁水，源自州北盧而嶺口流入，南合遵化縣之梨河，經玉田縣，入寶坻縣之白龍港，成化間，西北盤山水發，始合州境之砂河、窩河及五里河，並入沽水。

洶水

一名廣漢川，在州北四十里，發源黃崖口，一支西南流，經盤山之陰，入平谷，爲洶河，一支東南流，經盤山之陽，過三岔口，入寶坻縣之白龍港。宋廣川郡之名，以此水經注：漁陽有灋水，流經石門峽，入徐無縣境，或云灋水蓋卽灋水支流，自遵化縣流逕

石門下流至玉田縣合於梨河。

沽河

州南五里。自陽河以西。洶水以東。諸水皆入焉。其下流經新開河。至直沽。達於海。漕運汭流而上。直抵城南。通典。漁陽有鮑邱水。又名潞水。即沽水矣。後漢興平二年。幽州牧劉虞爲公孫瓚所殺。虞從事鮮于輔等合兵攻瓚。破瓚於鮑邱水。水經注。鮑邱水從塞外來。南過漁陽縣東。即鮮于輔等破瓚處。志云。沽水一名西潞水。一名東潞水。或曰。在通州東者曰西潞水。在薊州南者爲東潞水。下流皆合於寶坻縣。亦兼有鮑邱水之名。李賢曰。今海濱有二沽。一曰水套。一曰新開。相去纔十里。天順初。開河通潮。以便薊州漕運。此二水也。

陽河

州西五里。亦名五里河。以去城五里而名。源出城西鷓毛臺。臺亦名紙坊山。下流入於沽水。水性暖。遇寒不冰。故曰陽河。相去一里有涼泉水。泉出地中。方廣丈餘。盛暑彌涼。因名。

平魯渠

在州南。唐志。漁陽有平魯渠。傍海穿漕。以避海險。又其北漲水爲溝。以拒契丹。皆神龍中滄州刺史姜師度所開。屯政考。今州北之黃崖營。州西之白馬泉。鎮國莊。州東之馬申橋。夾林河。州西之別山鋪。夾陰流河。以至陰流淀。皆可疏渠爲田云。

白龍港

州南七十里。亦曰白龍江。遶桃花山下。洶河。沽河。諸水皆匯焉。入寶坻縣界。亦名潮河。以河通潮汐也。志云。州城北有金泉河。平地泉湧。流爲馬申河。

黃崖峪關

州北四十里。其北三十五里曰尋思峪。又北十五里爲柞兒峪。又車道峪堡。在黃崖峪東。志曰。自車道峪黃崖口直北。即元人之大興州也。○寬佃峪關。志云。黃崖峪東第六關也。自黃崖峪以東。至遵化縣之馬蘭關。凡十口。而寬佃峪爲

要路。

石門鎮

州東六十里。山峽崿絕壁立。其中洞開。俗呼爲石門口。水經注以爲灑水所經也。後漢中平五年。漁陽張純等叛。詔中郎將孟溢率公孫瓚等討之。戰於石門。純敗走。宋宣和五年。遼蕭幹敗宋兵於石門鎮。遂陷薊州。寇掠燕城。爲郭藥師所敗。幹走。死。今爲石門鎮驛。宣德三年。征兀良哈。自石門驛出喜峯口。是也。志云。石門峽在遵化縣西五十里。蓋境相接云。○五里鎮在州西五里。因名。宣德三年。駕至五里鎮。遂前行至石門驛。是也。

雞薊砦

在州西。五代梁開平二年。劉守文以滄州之衆。并招契丹。吐谷渾。共討其弟守光。戰於雞蘇砦。爲守光所獲。

玉田縣

州東南八十里。西南至寶坻縣九十里。春秋時爲山戎無終子國。秦置無終縣。漢因之。屬右北平郡。後漢因之。晉屬北平郡。後魏屬漁陽郡。隋初屬元州。大業初爲漁陽郡治。隋末廢。唐乾封二年。復置無終縣。屬幽州。萬歲通天二年。改爲玉田縣。神龍初。改屬營州。開元四年。還屬幽州。八年。復屬營州。十八年。改屬薊州。遼因之。宋宣和四年。改置經州。金復曰玉田縣。今編戶十八里。

無終城

在縣治西。春秋時山戎國也。秦置無終縣。項羽封韓廣爲遼東王。都無終。漢初。臧荼擊殺廣於無終。并其地。漢滅荼。亦置無終縣。後漢初。更始以苗曾爲幽州牧。治無終。吳漢斬之。晉隆安三年。慕容盛使其將李旱。討叛將李朗於令支。朗請救於魏。自迎魏師於北平。旱克令支。遣別將孟廣平擊斬朗於無終。唐改玉田。而無終之名隱。五代志。玉田西至幽州三百里。五代梁開平初。劉守文引滄德之兵討劉守光。戰於玉田。敗還。

徐無城

在縣東。漢縣。屬右北平郡。後漢因之。晉爲北平郡治。咸康三年。後趙石虎攻段遼於令支。至徐無。後魏縣。屬漁陽郡。後周廢入無終縣。

徐無山

縣東北二十里。後漢末。田疇入徐無山。營深險平敞地而居之。百姓歸之。至五千餘家。建安十一年。曹操伐烏桓。令疇爲鄉導。上徐無山。是也。今其山綿延深廣。志云。縣東北二十五里有小泉山。泉源出石罅間。俗呼爲小泉。西南流五里許。合大泉。

山之水。入白龍港。二山即徐無之別阜矣。○無終山。縣東北三十里。圖經云。無終子國於此。春秋襄四年。無終子嘉父使孟樂如晉。又昭元年。晉終行穆子敗無終於太原。蓋無終本在晉陽之境。後爲晉所敗。因徙於此也。寰宇記。無終山一名翁同山。又名陰山。蓋亦徐無之支隴矣。又種玉山在縣北十里。縣以此名。

燕山。縣西北二十五里。志云。山自西山一帶。迤邐東來。延袤數百里。抵海峽。蘇轍詩。燕山如長蛇。千里限夷漢。首銜西山麓。尾掛東海岸。中間哆箕畢。末路牽一線。蓋是錄也。東晉咸康四年。石虎攻段遼。遼將北平相陽裕登燕山以自固。即此。○傍山在縣西北二十五里。回崖壁立。突兀嵯峨。有堡可以避兵。其相連者曰麻山。志云。麻山在縣北十五里。又縣西北二十里有石鼓山。

梨河。在縣東二十里。自遵化縣南流。經縣境。又南入寶坻縣界。縣東境諸水多流入焉。○藍水在縣西北二十里。出縣北境三樂臺山。西南流入州南北龍港。

庾水。縣東北四十里。水經注。庾水出徐無縣北塞中。南歷徐無山。有黑牛谷水。沙谷水。並西出山東流。注庾水。又有灑水。亦自徐無縣西北東南流。合於庾水。庾水下流。合於梨河。蓋即豐潤縣之溷水。

後湖莊。在縣北屯政攷。縣有清莊塢。導河可由後湖莊。疏湖可田。三里屯及大泉小泉。引泉可田也。○陽樊驛舊在縣西二十里。嘉靖二年。遷於縣之西關。又有雙橋。在縣東四十里。通道所經。

壕門戍。在縣北。唐志。玉田縣有壕門。米亭。三谷。疆石。方公。白楊等六戍。又偏林在縣境。金史。大定二十年。以玉田縣行宮之地。偏林爲御林。即此。

豐潤縣。州東南百七十里。東至永平府百六十里。本玉田縣之永濟務。金泰和中。置豐潤縣。屬薊州。元至元二年。省。四年。復置。明因之。編戶二十二里。本朝康熙十五年。改隸遵化州。

土垠廢縣

縣西北六十里。漢縣屬右北平郡。後漢爲郡治。晉屬北平郡。後魏屬漁陽郡。後屬安樂郡。魏收志：太平真君九年置土垠縣。似廢而復置也。舊志：土垠城在密雲東百里。陳宮山下。卽此城矣。後齊廢。昌平記：順義城北一里。又有廢土垠縣。疑後

魏所改置。未攷。今縣有垠城鋪。在

縣東十里。以舊縣名也。垠音銀。

俊靡廢縣

在縣北。漢縣屬右北平郡。靡音麻。後漢因之。建武中遣吳漢等擊尤來大槍賊。窮追至俊靡。是也。晉屬北平郡。後廢。

鴉鶻山

縣西北二十里。峯巒秀拔。高數百仞。有孟家趙家二洞。又西有兩山口。兩山者。狼山。管山也。兩崖對峙。中有路。通遵化縣。又有蓮花池。水注焉。○靈應山在縣西北四十里。其山懸崖壁立。巖畔有泉噴流而下。注於沙流河。

馬頭山

縣東二十里。其山數峰馳驟。最南一峰。昂若馬首。又有車軸山。在縣南二十里。山孤圓而高。如臥轂然。○朝月山在縣東八十里。兩峰突起。狀如偃月。山陰爲石坑岡。又腰帶山亦在縣東八十里。上有石崖繞山半。如束帶然。又西爲大嶺山。亦行旅

所經也。

陳宮山

縣北七十里。縈迴數十里。東臨還鄉河。西接黃土嶺。山南有峯。其色蒼翠。一名華山。○崖兒山在縣東北八十里。其山綿連而中斷。東爲崖兒口。西爲白霧口。有路自崖而入。因名。

漣水

在縣北八十里。一名還鄉河。或謂之雲漣水。源自遷安縣。歷崖兒口。西南流經縣境。入玉田縣界。合於梨河。又沙流河在縣西四十里。源出縣西北五十里之黨峪山下。經兩山口。又西南流。會於還鄉河。元致和初。懷王襲位。上都兵自遼東入討。撒敦等

拒之於薊州東。沙流河是也。

沙河。在縣南。源出灤州界。西北流經縣之越支社。又屈而東南流。入於海。志云。成祖北征三衛。還駐蹕沙河。即此。又韓城鎮。河在縣南五十里。韓城鎮。源出車軸山。經鎮北。又西流十餘里。入漫泊。下流會還鄉河。

越支社。在縣南百里。亦曰越支塲。今有宋家營鹽課司。又義豐驛。在縣東三十里。縣西北二十里。又有梁家務。皆津途所經。

鴉洪橋。在縣西。與玉田縣接界。一統志。還鄉河至鴉洪橋。合於梨河。屯政考。縣南有大寨及刺榆坨。史家河。大王莊之地。東則榛子鎮。西則鴉洪橋。夾河五十餘里。皆可屯之區也。又自水道沽關。黑巖子墩。至宋家營諸處。東西百餘里。南北百八十里。地皆

瀕海半
曠可耕。

遵化縣。州東百二十里。東至永平府遷安縣一百五十里。本無終縣地。唐於此置馬監及鐵冶。後唐始置遵化縣。遼置景州及清安軍治焉。宋宣和四年。仍曰景州。亦曰灤州郡。金州廢。縣隸薊州。元明因之。編戶二十里。國朝康熙十五年。升爲州。

鹽城。在縣北。唐守捉城也。唐志。出薊州雄武軍東北行百二十里。至鹽城守捉。又東北度灤河。即古盧龍鎮。或以爲即漢滑鹽縣。恐悞。○平安城在縣西南五十里。周五里。舊傳唐太宗征遼。遘疾。經此旋愈。因名。又喜峯口東北有小城。相傳徐達所築。亦謂之

徐太傅城。歲久彌堅。遠望如碧玉懸崖。陡聳。人跡罕到。

南龍山。縣南八里。其北有北龍山。兩山相望。蜿蜒如龍。又明月山在縣西南十三里。高百餘仞。上有石穴。南北相通。望之如月。縣南二十里。又有清風山。高三百餘仞。

五峯山。縣東北二十五里。山勢磅礴。突起五峯。又三臺山在縣東北九十里。其山盤曲三層。又東北二十里。爲大團亭山。山北爲小團亭山。皆縣境之險也。

靈靈山

縣東南六十里。山高九百餘丈。爲縣境羣山之冠。又磨臺山在縣南四十里。山高聳而頂圓如磨。○夾山在縣西南二十五里。以兩山相夾而名。又關山在縣西北五十里。以山近邊關而名也。

鹿兒嶺

在縣北塞外。明初常遇春討元餘孽。出遵化。度鹿路。嶺至會州。卽此。志云。嶺一名鹿路。或譌爲路兒嶺。

龍門峽

縣南十里。其山上合下開。開處高六丈許。水自懸崖傾瀉而下。觸石成井。奔盪之聲轟然若雷。一名獨固門。以憑藉險固。絕壁雲聳。疎通若門。故名也。水經注。以爲活水所逕。

灤河

在縣東北。自縣北塞外逕團亭寨。流入內地。東南入永平府遷安縣境。唐開元二年。幽州帥薛訥出檀州。擊契丹。至灤水山峽中。契丹伏兵遮其前後。從上山擊之。訥大敗。卽此地也。今詳大川灤河。

梨河

在縣西南。源出縣北山谷中。舊志云。出灤州界。流入縣境。縣西北有湯河。出鮎魚口。又有清水河。出道溝峪。俱流合焉。經玉田縣。入寶坻縣界。合於潮河。明建文三年。遼東兵圍遵化。燕兵敗之於清水寺橋。橋蓋在清水河上。○五里河在縣北五里。源自一片石谷口。流經沙坡峪。至縣西南。入於梨河。或謂之沙河。建文初。大寧帥劉

貞引兵至沙河。攻燕遵化。永樂二年。成祖北征三衛還。駐蹕沙河。卽五里河也。

湧泉河

在縣西南。湖不甚廣。而泉水澄渟不竭。徐貞明曰。縣西南平安城及沙河鋪。湧泉湖。韭菜溝。上素河。下素河。皆利於耕屯處也。

馬蘭峪關

縣西北七十餘里。爲守禦要地。有城。關外六十七里。曰擡馬嶺。又鮎魚石關。馬蘭關東第二關口也。正德四年。朵顏入寇。自鮎魚石毀垣入馬蘭峪。十年。兀良哈寇馬蘭峪。參將陳乾戰死。嘉靖三十四年。俺答亦自此入犯馬蘭峪。其東爲大安

口。亦要口也。嘉靖三十八年。嘗爲寇所陷。口北二十六里。曰柳林。又北二里。曰白棗林。又北十六里。曰新開嶺。又有沙坡峪口。在大安口東。○羅文峪關。在縣西北十里。馬蘭峪東第十四關口也。其北五十九里。曰窟窿山。又北七里。曰神山嶺。又北十三里。曰

白馬川。又北十一里曰石夾口。
又有三道嶺寨。在羅文峪東。

洪山口關

縣北三十里有城。其內爲松棚營。關北百十七里爲黃土嶺。又北三十里爲喬家嶺。又北四十里曰車河川。邊防攷。洪山口東。又有龍井兒關。賊衝也。其內爲三屯營。接遷安縣界。其東曰三臺山關。關北五十二里曰寺兒峪。又北十六里曰土松嶺。又北六十七里曰謝兒嶺。又北有惱奴河。傍牌川等處。皆賊徑也。○潘家口在縣東北四十里。嘉靖三十八年。朶顏導把都兒入犯。度灤河。山潘家口而西。大掠薊州。其東曰團亭寨。又東即喜峰口也。志云。自馬蘭峪至大喜峰。凡三十一關口。

喜峯口關

縣東北七十里。三衛屬夷入貢通衢也。關城周三里。關口有來遠樓。可容萬人。道里記。由喜峰口東北六十里。曰椴木峪。寬河。嘉靖十年。三衛連兵入犯喜峰口。自此益增兵戍守。爲薊邊重地。又李家口。喜峰口東第三口也。其北四十里曰天津峪。又北十里曰九估嶺。又有董家口。在李家口東。隆慶三年。三衛兵突犯。帥臣戚繼光禦却之。其北十里曰桃樹峪。又北六十五里。地名聶門。又北三十里曰龍鬚門。又北七十里。即廢會州也。志曰。自喜峰口至永平府。遷安縣之青山口。凡七口。萬歷初。朶顏犯喜峰。戚繼光勒兵出青山口。敗之。是也。

松亭關

在喜峰口北百二十里。遼人自燕京之中京。每至松亭。趣柳河。宋至和二年。劉敞奉使契丹。契丹導之行。自古北口至柳河。回環殆千里。欲夸示險遠。敞曰。自松亭。趣柳河。甚徑且易。不數日可抵中京。何爲故導此。譯相顧駭愧。明洪武二十年。大帥馮勝出松亭關。討納哈出。建文初。大甯帥劉貞等引兵出松亭關。駐沙河。攻遵化。燕王馳援。貞等退保松亭。旣而燕王謀取大甯。諸將曰。大甯必道松亭關。關門險塞。守備方嚴。恐難猝拔。乃從別徑。趣大甯。還收松亭。是也。大甯廢後。松亭亦棄不守矣。

平谷縣

州西北八十里。西南至三河縣四十里。本漢縣。屬漁陽郡。晉廢。在今通州北。今縣本唐漁陽縣之大王鎮。金始置平谷縣於此。元初廢。尋復置。屬薊州。今編戶十三里。

滑鹽廢縣

在縣西北。漢縣屬漁陽郡。後漢廢縣。明帝時謂之鹽田。世謂之斛鹽城。北魏時有斛鹽戍。水經注大榆河自密雲東南流。經斛鹽城西北去禦夷鎮三百里。孝昌三年安州石離穴城斛鹽三戍兵反應上谷城杜洛周洛周自松磧赴之石離穴

城二戍蓋在斛鹽戍西松磧唐自營州西北百里有松陘嶺或曰在今延慶州界其地多長松即今松林地也括地志滑鹽地宜五穀有鹽池之利

瑞屏山

縣北二十里連峰聳拔秀列若屏又妙峰山在縣東北二十五里峰巒峻秀下有九沽泉志云縣東北十里有漁子山上有大冢相傳爲黃帝陵也其北有漁子山堡與密雲縣熊兒峪相接

城山

縣東六十里四山高聳中寬平如城又碣山在縣東五十里峰巒峭拔林谷深邃志云縣南八里又有泉水山泉流入河民賴灌溉

洵河

在縣東南自薊州流入界又南入三河縣境志云縣東十里有馬莊河源出縣東北海子與縣東北三十里獨樂河及縣境之五百溝河鄉泰河俱合流入於洵河

洳河

在縣東南五里源出密雲縣石峨山流經縣境又西南流入三河縣界縣西十里有周村河源出口外下流入洳河

逆流河

在縣東南一名小碾河源出縣南泉水山西北流凡九十九曲而入洵河又有龍泉在縣東南十里成祖嘗駐蹕於此飲水而甘錫以今名

夏謙澤

縣東北百餘里晉隆安初後燕慕容寶爲拓拔珪所迫自中山至薊盡徙府庫北趨龍城珪將石河頭時屯漁陽引兵追之及於夏謙澤爲慕容會所敗胡氏曰澤去薊北二百餘里今縣東北有海子或以爲即故澤也水經注鮑邱水南入夏澤

南紆曲渚一十餘里北佩謙澤
眇望無垠蓋在路縣境內云

黃松峪關。

在縣東。又東與密雲縣將軍石關相接。關北爲熊兒峪關。又西爲營兒峪營。今邊界分爲密雲。而其地則逼近縣境。

龍家務莊。

在縣境。屯政攷。縣有水峪寺。龍家務莊。舊有耕屯處。

附見

薊州衛。

在州治東北。洪武八年建。

鎮朔衛。

在薊州衛西。永樂中建。又營州右屯衛在州治北。本在大寧衛境。永樂二年。移建於此。

興州左屯衛。

在玉田縣東南百四十里。舊在開平衛境。永樂初。移建於此。○興州前屯衛。在豐潤縣治西。永樂二年。移建。

遵化衛。

在遵化縣治南。洪武十年建。

東勝右衛。

在遵化衛西。永樂初。移建於此。○忠義中衛。在遵化州治東南。永樂初建。

營州中屯衛。

在平谷縣治東。永樂二年。移建於此。備邊錄。平谷縣西北十里有故城。今營州中屯衛戍於此。與黃松峪等關。熊兒峪等營。官軍互爲屯禦。常近數千人。

寬河守禦千戶所。在遵化州治南。
建文二年建。

